

ሉቃስ ፃፊዳ ዩሱስ ኪሪስቶስ ዋንጌላ ጋሳ ቆፋ

ዩሱስ ደሪዳ ታማኔ ናምዑ ሃዋሬታ ጊደን ሉቃስ ዳና። ሉቃስ ዋንጌላይ፡ ዩሱስ ኮይሮ ናቤታ ደናን ያና ጌቲቲዲ ኦዴቲዳይሳ፡ ኢስራዔሌቲ ካሴፕ ናጊሼ ዳዒዳ «ኪሪስቶስ» ጊዳይሳኔ ኣሳ ዜሬሊ ኡባ ኣሼይሳ ጊዳይሳ ቆንጨሴስ። ሉቃስ፡ ባ ማፃፋን ዩሱስ፡ «ማንቆታስ ዋንጌላ ሳባካናው» ባ ኣዋፕ ኪቲቲዳይሳ ጊዳይሳኔ ሄ ዋንጌላይ ኣሳስ ዳዒያ ዳማ ዳማ ሜቱዋፕ ኬሴይሳ ጊዳይሳ ኦዴስ። ሉቃስ ዋንጌላ ጊደን፡ ዩሱስ ዩሳባ ኦዲያ ኮይሮ ሹምፖታኒኔ ዩሱስ ፑዴ ሳሎ ኬዩዳይሳ ኦዲያ ወርሴላ ሹምፖታን ቆንጨዲ ኦዴቲዳይ ኡፋይሳባ። ዩሱስ ሳሎ ኬዩዳፕ ጉዬ ኣማኖይ ዋኒዲ ዲጨዳኮኔ ዳልጊዳኮ ኦዲያ ታሪኪያ ሃ ዋንጌላ ፃፊይ ሃዋሬታ ኦሶ ማፃፋን ፃፊስ።

ኪታንቸታ ማዘውሪያባ፡ ዩሱስ ዩሌቲዳ ዋዴ ሄንላቸቲ ቢዲ ቤዒዳይሳ ኦዲያ ታሪኪይ፡ ዩሱስ ናዓቲላን ያሳ ኬሊ ቢዳይሳ፡ ቃዴቲያ ሳማሪ ኣዲያባኔ ቆዩዲ ቤንቲዳ ናዓባ ኦዲያ ታሪኪይ፡ ሉቃስ ዋንጌላ ፃላላን ቤንቲያ ታሪኪይ። ሉቃስ ዋንጌላን ጋፃፕ ጋፃ ጋካናው ዳዒያ ዋና ቆፋቲ ዋሳባ፡ ጌሻ ኣያናባ፡ ዩሱስ ኦሱዋ ጊደን ማጨሳታስ ዳዒያ ቤሳኔ ያሳይ ናጋራ ማሪይሳ።

ሉቃስ ዋንጌላ ኣይፌ ቆፋታ

- ጌሎ ቆፋ 1:1-4
- ፃማቂያ ዮሃኒሳኔ ዩሱስ ዩሌቲላ 1:5-2:52
- ፃማቂያ ዮሃኒሳ ኦሱዋ 3:1-20
- ዩሱስ ፂንቃቲያኔ ፓጨቴላ 3:21-4:13
- ዩሱስ ጋለላን ኦሊዳ ኦሱዋ 4:14-9:50
- ጋለላፕ ዩሩሳላሜ ጋካናው 9:51-19:27
- ወርሴላ ሳሚንታ ዩሩሳላሜ ሄራን 19:28-23:56
- ሃይቆፕ ዴንዶ፡ ቆንጨሳኔ ሳሎ ኬሳ 24:1-53

1 ቦንቸ ቲዋፊሎሳ፡ ኑ ጊደን ፖሊቲዳባስ ዳርቲ፡ ባንታው ዳንዳዔቲዳ ማላ ፃፊደሶና። 2 ሄ ታሪኪያ ኤንቲ ፃፊዳይ ኮይሮፕ ደሚዲ ኣይፌ ማርካቲኔ ቃላ ሃጋዜይሳቲ ኑስ ኦዲዳይሳ። 3 ታካ ታ ባጋራ ኮይሮፕ ኣኬካ ጸሊዳፕ ጉዬ ሄ ታሪኪያ ሃኖታ ማራያዳ

ነው ፍርይ ታው ሎዎ ጊዲ በነቲሰ። 4 ሄሲካ፣ ኔ ታማሪዳባይ ቱማ ጊዳይሳ ኤሪሳና።

ፃማቂያ ዮሃንስ የሌቴላ

5 ዪሁዳ ካወዋ ሄርዲሳ ዎዴ እቢያ ያራፔ ጊዲዲ ዛካሪያሳ ጊያ አይሁዴ ካሂኔይ ዴዔስ። ኢያ ማቺያካ አርና ሹሻፔ። ኢ ሱንላይካ ኤልሳቤዎ። 6 ናምዓይካ ጎዳ ዎጋኔ ኪታ ኡባ ናጊዲ ቦሬይ ባይና ያሳ ሲንላን ሂሎቴላን ዴዒደሶና። 7 ሃናፔ ኣቲን ኤልሳቤዎ ማይንሉ ጊዲዳ ጊሾ ኤንታው ናዒ ባዎ። ናምዓይካ ቃሲ ጨሚደሶና።

8 ኢሲ ጋላስ ዛካሪያሲ ባ ጊሹዎ ማራን ያሳ ሲንላን ካሂኔቴላን ሃጋዜሰ። 9 ካሂኔቴላ ዎጋን ያሳ ኬሉ ጌሊዲ ኢፃኔ ጨዩሳናው ኢያ ሳሚ ጋኪሰ። 10 ኢፃኔይ ጨያ ዎዴ አሳይ ካሬን ዎሴሰ።

11 ጎዳ ኪታንቸይ ያርሹዎ ያርሹያ ቤሳፌ ኡሻቻ ባጋራ ኤቁዲ በነቲሰ። 12 ዛካሪያሲ ኢያ ቤዒዳ ዎዴ ዳጋሚዲ ዳር ያዩሰ። 13 ሺን ኪታንቸይ ኢያኮ፣ «ዛካሪያሳ ያዮፋ፤ ኔ ዎሳይ ሲዔቲሰ። ኔ ማቺያ ኤልሳቤዎ አዴ ናዒ ዩላና፣ ኢያ ዮሃንስ ጋዳ ኔ ሱንላና። 14 ኢ ኔው ኢንጃኔ ኡፋይሲ ጊዳና፤ ዳርቲ ኢያ ዩሌቴላን ኡፋይታና። 15 ጎዳ ሲንላን ኢ ጌታ ጊዳና፤ ዎይኔ ኡሻ ጊዲን ሃራ ማላያ ኡሻ ኡዬና። ባ አዬ ኡሎን ዴዒሹ ጌሻ አያናን ኩማና። 16 ኢሰራዔሌ አሳታፔ ዳርታ ባንታ ጎዳ፣ ያሳኮ ዛራና። 17 አዎታ ዎዛና ናይታኮ ዛራና፣ ኪቴቶናይሳታ ሂሎታ ጨንጨቴላኮ ዛራና ማላ፣ ጎዳስ ቤሲያ ዴሬ ጊሊሳናው ኤሊያሳ አያናኒኔ ዎልቃን ጎዳ ሲንላን ባና» ያጊሰ።

18 ዛካሪያሲ ኪታንቸዎኮ፣ «ታ ሄሳ አይቢን ኤራኔ? ታራኔ ታ ማቺራ ጨሚዳ» ያጊሰ።

19 ኪታንቸይ ዛሪዲ፣ «ታኒ ያሳ ሲንላን ኤቁያ ጋብሬሌ። ሃ ሚሺራቹዎ ኔው ኦዳናው ያሳፌ ኪቴታሰ። 20 ሄኮ፣ ዎዲያ ናጊዲ ፖሌቲያ ታ ቃላ ኔ አማናና ኢዲዳ ጊሾ ሃይሲ ፖሌታና ጋካናው ኔኒ ሙሜ ጊዳና፣ ኦዴታናዉካ ዳንዳዓካ» ያጊሰ።

21 ሄ ዎዴ ዛካሪያሲ ያሳ ኬሉ ጌሊዲ ጋምዒዳ ጊሾ አይቢ ሃኒዴ ጊዲ አሳይ ካሬን ናጊሹ ጋምዒሰ። 22 ኢ ካሬ ኬዩዲ ኤንታና ኦዲሳናው ዳንዳዒቤና። ማሊ ቤሶፔ ኣቲን ኦዴታናው ዳንዳዎናይሳ ቤዒዳ ዎዴ ቆንጨዩሉ ቤዒዳይሳ ኤሪደሶና።

1:5 1ታሪ 24:10 1:15 ታይ 6:3 1:17 ሚላ 4:5-6 1:19 ዳኔ 8:16፤ 9:21

23 ዛካርያስ ሃጋዞ ዋዲያ ፖሊዲ ባ ሶ ሲሚሰ። 24 ሄሳፌ ጉዬ፥ ኢያ ማቸያ ኤልሳቤፅ ቃንሳታሱ። ኢቻሹ አጌና ኩሜሌ ባና ጌንሳዳ ጋምዓሱ። 25 ኢያ፥ «ጎዳይ ባ ማርታን ታ ቦሪያ አሳ ጊደፌ ዲጋናው ቤዒዲ ሃ ዋዲያን ሃይሳ ኦሲሰ» ያጋሱ።

ዬሱሳ ዬሌቴላይ ኮይርቲዲ ኦይቲሰ

26 ኤልሳቤፅ ቃንሳቲን ኡሱፑንሳ አጌናን፥ ያሳይ ኪታንቸዋ ጋብሬሌ ጋለላ ቢታን ዳዒያ ናዚሬቴ ካታማ ኪቲሰ። 27 ካወዋ ዳዊቲ ሼሻፔ ጊዲዳ ዮሴፋ ጊያ ኡራሰ ኦይሹቲዳ ጌላዔኮ ኪቲሰ። ሄ ጌላዒያ ማይራዋ ጌቲታዉሰ። 28 ኪታንቸይ ኢኮ ቢዲ፥ «ዳሮ ዶሴቲዳሬ፥ ሳሮይ ኔው ጊዶ፥ ያሳይ ኔራ ዳዔሰ» ያጊሰ።

29 ማይራማ ኢያ ኦዳን ዳሮ ዳጋማዳ፥ «ሃይሲ አይቢ ሳርሉ» ጋዳ ሄታሱ። 30 ኪታንቸይ ዛሪዲ፥ «ማይራማ፥ ባቦፋ፤ ኔኒ ያሳ ስንሳን ሳባ ዳማዳሳ። 31 ሄኮ ኔኒ ቃንሳታና አዴ ናዓ ዬላና፥ ኢያ ስንሳካ ዬሱሳ ጋዳ ስንሳና። 32 ኢ ጌታ ጊዳና፥ ኡባፌ ቦላ ያሳ ናዓ ጌቲቲ ፀጌታና። ጎዳ ያሳይ ኢያ አዋ ዳዊቲ አራታ ኢያው ኢማና። 33 ኢ ያይቆባ ሼሻ ቦላ ሜሪናው ካዎታና፤ ኢያ ካዎቲሳሰ ዛዋ ባዋ» ያጊሰ።

34 ማይራማ ኪታንቸዋኮ፥ «ሄሲ ዋኒዲ ሃናኔ? ታ አዴ ኤሪኬ» ያጋሱ።

35 ኪታንቸይ ዛሪዲ፥ «ጌሻ አያናይ ኔ ቦላ ዋፋና፥ ኡባፌ ቦላ ያሳ ዋልቃይ ኔ ቦላ ኩያታና። ሄሳ ጊሹ፥ ዬሌቲያ ጌሻ ናዓይ ያሳ ናዓ ጌቲታና። 36 ሄኮ፥ ኔ ዳቢያ ኤልሳቤፅ ባ ጨማቲላ ላይላን አዴ ናዓ ቃንሳታሱ። ኢያ ማይንሳ ጌቲቲዳር፥ ሺን ሃዒ ኡሱፑንሳ አጌና ኦይካሱ። 37 ያሳ ያኒያባይ ባዋ» ያጊሰ።

38 ማይራማ፥ «ሄኮ፥ ታኒ ጎዳ አይለው፥ ኔ ቃላዳ ታው ሃሮ» ያጋሱ። ሄሳፌ ጉዬ፥ ኪታንቸይ ኢፔ ሻኬቲሰ።

39 ማይራማ ሄ ሳሚንታን ዳንዳዳ ዩሁዳ ቢታን ዳዒያ ኢሲ ጌዜ ካታማ ባሱ። 40 ዛካርያሳ ሶ ጌላዳ ኤልሳቤፅ ሳርላሱ። 41 ኤልሳቤፅ ማይራማ ሳርሉዋ ሲዒዳ ዋዴ ኢ ኡሉዋን ዳዒያ ናዓይ ኡፋይሳን ጉፒሰ። ኤልሳቤፅ ጌሻ አያናን ኩማዳ፥ 42 ባ ቃላ ጶቁ ኦሳዳ፥ «ኔኒ ማጫሳ ጊደፌ አንጃቲዳር፥ ኔ ቃንሳቲዳ ናዓይካ አንጃቲዳይሳ። 43 ሃሮሺን፥ ታ ጎዳ አዬ፥ ኔኒ ታኮ ያና ማላ ታኒ ኦኔ? 44 ሄኮ ኔ ሳርሉዋ ታ ሲዒዳ ዋዴ ታ ኡሉዋን

1:27 ማቶ 1:18 1:31 ማቶ 1:21 1:32 2ሳሙ 7:12-13፣ 16፤ ኢሳ 9:7 1:37 ሜዴ 18:14

ዳዒያ ናዓይ ኡፋይሳን ጉፒስ። 45 ጎዳይ ፖላና ጊዲ ኢሚዳ ቃላ ኣማኒዳራ፥ ኢያ ኣንጃቲዳሮ» ያጋሱ።

ማይራሚ ማዝሙሪያ

46 ማይራሚ ሃይሳዳ ያጋሱ፡

«ታ ሼምፒያ ጎዳ ቦንቻውሱ፡

47 ታ ኣያናይ ጳሊያ ያሳን ኡፋይቲስ።

48 ኢ ባ ኣይሌ ካወሻቲፋ ቤዒስ።

ሃቸፊ ዶሚዲ ዬሌቲሊ ኡባይ ታና ኣንጃቲዳሮ ጋና።

49 ኣይስ ጊኮ፥ ዎልቃማ ጊዲዳ ኢ፥ ታው ጊታባ ኦሊስ።

ኢያ ሱንፋይ ጌሻ።

50 ኢያ ቦንቹይሳታ ቦላ፡

ኢያ ማሮቲፋይ ሜሪናፔ ሜሪና ጋካናሳ።

51 ባ ቄሲያን ሚኖባ ኦሊስ፡

ባንታ ዎዛናን ኦቶርቲይሳታ ላሊስ።

52 ዎልቃማ ካዎታ ኣራታፔ ካወሺስ፤

ባንታና ካወሺዳይሳታ ካቦይስ።

53 ኮሻቲዳይሳታ ሎዎባን ካልሲስ፡

ሺን ዱሬታ ሜላ ኩሼ ዬዲስ።

54 ባ ማርታ ቆፒዲ፡

ባ ኣይሊያ ኢስራዔል ማዲስ።

55 ሄሲካ ኑ ኣዎታስ ኦዲዳ ቃላ፡

ኣብራሃሜሲኔ ኢያ ሼሻስ ጊዳይሳ ሜሪናው ፖላናሳ»

ያጋሱ።

56 ማይራሚ ኤልሳቤዒ ማታን ሄቩ ኣጌና ሜላ ጋምዓዳ ባ ሶ ሲማሱ።

ፃማቂያ ዮሃንሳ ዬሌቲፋ

57 ኤልሳቤዒስ ዬሎ ቃማይ ጋኪን ኣዳ ናዓ ዬላሱ። 58 ኢ ሾሮቲኔ ኢ ዳቦቲ ጎዳይ ጊታ ማርታ ኦሊዳይሳ ሲዒዲ፡ ኢራ ኢሲፊ ኡፋይቲዳሶና።

59 ሆስፑንፋ ጋላሳን ዮጋ ናዓ ቃፃራናው ዬደሶና። ኢያ ኣዎ ሱንፋን ዛካሪያሳ ጊዲ ሱንፋናው ኮዬደሶና።

60 ሺን ኣያ፡ «ኣካይ፡ ዮሃንሳ ጌቲታናው ቤሴስ» ያጋሱ።

61 ኤንቲካ፡ «ኔ ዳቦታፔ ሃ ሱንፋን ዪጌቲዳይ ኦኒካ ባዎ»

ያጊደሶና። 62 ኢያ ኣዎይ ኦና ጊዲ ሱንፋንኮ ኤራናው ኮዬዲ ኢያ

1:46 1ሳሙ 2:1-10 1:48 1ሳሙ 1:11 1:52 እዮ 5:11፤ 12:19
1:55 1ሳሙ 2:1-10 1:55 ሜዴ 17:7 1:59 ሉዌ 12:3

ማላ ኦይቸዶሶና። 63 ኢ ፃፊያባ ኦይቸ ኤኪዲ፡ «ኢያ ሱንላይ ዮሃንሳ» ገዲ ፃፊሰ። ኡባይ ኢ ፃፊዳይሳ ቤዒዲ ማላሌተዶሶና። 64 ኢራ ዛካሪያሳ ኢንፃርሳይ ቢሌተሰ፡ ያሳ ጋላቲሼ ኦይቴሌ ኦይኪሰ። 65 ሾርቲ ኡባይ ያሻን ኩሚዶሶና። ሃ ሃኒዳባይ ጌዜ ዪሁዳ ቢታን ኦይቲሰ። 66 ሄሳ ሲዒዳ ኡባይ፡ «ሃ ናዓይ ኣይ ሃናንዳሻ» ገዲ ባንታ ገዶን ኦይቲዶሶና። ጎዳ ኩሼይ ኢያራ ዴዔሰ።

ዛካሪያሳ ማዝሙሪያ

67 ዮሃንሳ ኣዋይ ዛካሪያሲ ጌሻ ኣያናን ኩሚዲ ሃይሳዳ ያገዲ ቲንቢቲ ኦዲሰ።

68 «ኢሰራዔሊያ ጎዳይ ጋላቴቶ፡ ዪዲ ባ ኣሳ ዋዚሰ።

69 ባ ኣይሊያ ዳዊቲ ኬላን ኣቶቴላ ካጨያ ዴንሊሰ።

70 ሄሲካ ቤኒ ዋዴ ጌሻ ናቤታ ዶናን ኦይቲዳይሳ ሜላ፡

71 ኢያ ኣሾይ ኦ ሞርኬታፔኔ ኦራ ኤቁቲያ ኡባ ኩሺያፔ።

72 ሄሳ ኢ ኦሊዳይ ኦ ኣዋታሰ ባ ማርታ ቤሳናሲኔ፡ ባ ጌሻ ጫቁዋ ናጋናሳ።

73 ኦ ኣዋ ኣብራሃሜሰ ጫቁዳ ጫቁዋ ቆፓናሲኔ

74 ኦ ሞርኬታ ኩሼፔ ኬሲዲ ያሺ ባይና ኢያ ሃጋዛና ሜላሳ።

75 ኦ ላይላ ኡባን ጌሻቴላኒኔ ዪሎቴላን ባ ሲንላን ኦና ኤሳናሳ።

76 ቃሲ ላ ናዓው፡ ኔኒ ኡባፌ ቦላ ያሳ ናቤ ጌቲታና። ጎዳ ኦጊያ ሎይላናው ኔ ኢያ ሲንላን ባና።

77 ኤንታ ናጋራይ ቁሼቲን፡ ኤንቲ ኣቶቴሊ ዴማናይሳ ኔ ጎዳ ዴሪያሰ ኦዳና።

78 ኦ ያሳ ሎዖ ማርቴላፌ ዴንዶይሳን ዋንታ ያልቄይ ኦሰ ሳሎዋፔ ኬዪሰ።

79 ሄሲካ ቋሚኒኔ፡ ሃይቆ ኩያ ጋርሳን ዴዔይሳታሰ ፖዒሳናሳ፡ ኦ ቶሁዋካ ሳር ኦጊያኮ ዛራናሳ»

ያገሰ።

80 ናዓይ ዲጪስ፣ ኣያናን ሚኒስ፣ ኢስራዔል ኣሳስ ቆንጫና ጋካናው ባዙ ቢታን ዳዒስ።

2

ዮሴፍ ዮሌቴሳ (ማቶ 1:18-25)

1 ሄ ዎዴ ሮሜ ቢታን ዳዒያ ኣሳ ኡባይ ታይቤታና ሜላኔ ሱንሳይ ፃፊታና ሜላ ካዎይ ኣወጊስፎሲ ኪቲስ። 2 ሄሲካ ቁሬናሲ ሶሬ ቢታ ኣይሲያ ዎዴ ኦሴቲዳ ኮይሮ ታይቡዎ። 3 ሄሳ ጊሾ፣ ኢሲ ኢሲ ኣሲ ባ ሱንሳ ፃፊታናው ባ ዮሌቴዳ ቢታ ቢስ።

4 ዮሴፊካ ዳዊቲ ኬላፊኔ ያራፔ ጊዲዳ ጊሾ ጋሊላ ናዚሬቲ ካታማፔ ዳንዲዲ ዳዊቲ ካታማ ጊዲዳ ዪሁዳ ቤቴሌሜ ቢስ።

5 ቢሹ፣ ዮላናው ዎዴይ ዉሪዳ ኢ ኦይቺ ዎሊዳ፣ ማይራማራ ዎላ ፃፊታናው ቢስ። 6 ኤንቲ ያን ዳዒሺን ኢው ዮሎ ዎዴይ ጋኪስ። 7 ባ ባይራ ናዓ ዮላሱ። ጩርቃራ ፃፃዳ ኢማሊ ኣቋያሶን ቤሲ ቆዩዳ ጊሾ ዳራን ሜሄ ሙዚያ ጎንጌን ዚንዒሳሱ።

ሄንሳንቸታኔ ኪታንቸታ

8 ሄ ጋዲያን ቃማ ዶርሳ ዉዲያ ናጊሹ ካሬን ኣቋያ ሄንሳንቸቲ ዳዎሶና። 9 ጎዳ ኪታንቸይ ሃሳዮና ዩዲ ኤንታ ማታን ኤቂስ። ጎዳ ቦንቸይ ኤንታ ዩሹዎን ፖሲስ፤ ኤንቲካ ዎልቃማ ያሺ ያዩዶሶና።

10 ሺን ኪታንቸይ፣ «ያዮፊቲ! ሄኮ፣ ኣሳ ኡባስ ጊዲያ ጊታ ኡፋይሳ ሚሺራቸዎ ኤካዳ ያስ። 11 ሄሲካ፣ ዳዊቲ ካታማን ኣሺይሲ ሂንቲው ሃቺ ዮሌቴስ። ኢ ጎዳ ኪሪስቶሳ። 12 ዘቃሌ ናዓይ ጩርቃራ ፃፃቲዲ ጎንጌን ዚንዒዳይሳ ሂንቲ ዳማና፤ ሄሲካ ሂንቲው ማላ ጊዶ» ያጊስ።

13 ቆፖና ዳሮ ሳሎ ኪታንቸቲ ኪታንቸውራ ኢሲፊ ቆንጪዲ፣

14 «ቦንቸይ ያሳስ ቶቃ ሳሎዎን፣
ሳሮይ ቢታ ቦላ ያሳይ ዶሲያ ኣሳስ ጊዶ»
ያጊዲ ጋሳቲዶሶና።

15 ኪታንቸቲ ኤንታፊ ሻኬቲዲ ሳሎዎ ኬዩዳፔ ጉዬ ሄንሳንቸቲ፣ «ኣኔ ጎዳይ ኑስ ቆንጪሲዳባኔ ሂኒዳባ ቤዓናው ቤቴሌሜ ቦስ» ያጊዶሶና።

16 ኤንቲካ ኤሌሲዲ ቢዶሶና። ማይራዎ፣ ዮሴፋኔ ዘቃሌ ናዓ ጎንጌን ዚንዒዳይሳ ቤዒዶሶና። 17 ቤዒ ሲሚዲ ናዓባ ኤንታው ኦዴቶይሳ፣ ቆንጪሲዲ ሄ ቤሳን ዳዒያ ኣሳስ ማርካቲዶሶና።

18 ሄሳ ሲዲዳ ኡባይ ሄንጻንቸቲ ኦዲዳይሳን ማላሌቲዶሶና።
 19 ማይራማ ሃሊዳባ ኡባ ባ ዋዛናን ቆፓሼ ዴዓሱ። 20 ሄንጻንቸቲ ኤንታው ኦዲቲዳይሳዳ ሃሊን ቤዲዶሶና። ሄሳ ገሾ፣ ባንታ ሲዲዳባሲኔ ቤዲዳባ ኡባሰ ያሳ ቦንቲሼኔ ኃላቲሼ ሲሚዶሶና።

ዩሱሳ ያሳ ኬሌ ኤፊዶሶና

21 ሆሰፑንጎሳ ቃማን፣ ቃፃሮ ዋዳይ ጋከን፣ ኢ ቃንጎታናፔ ሲንሌ ከታንቸይ ዋሊዳ ሱንጎን ዩሱሳ ጌቲቲሰ። 22 ሙሴ ዋጋ ማላ ኤንታ ጌሻቴላ ዋዳይ ፖሌቲዳፔ ጉዬ ዮሴፋራኔ ማይራሚራ ዮጋ ናዓ ባንታ ጎዳሰ ኢማናው ዩራሳላሜ ቢዶሶና። 23 ሄሲካ፣ ጎዳ ዋጋን፣ «ኣዴ ገዲዳ ባይራ ናዒ ኡባይ ጎዳሰ ዲማቲዳይሳ ገዶ» ጌቲቲዲ ፃፊቲዳይሳ ፖላናሳ። 24 ቃሲ ጎዳ ዋጋን፣ ናሞቡ ኩራቾ ዋይኮ ሆሌ ያርሻናው ኤፊዶሶና። 25 ሄ ዋዳ ጌሼኔ ኣማናራ ሚኖ ገዲዳ ሲሞና ጌቲቲያ ኣሲ ዩራሳላሜን ዴዔሰ። ኢ ኢሰራዔሌታ ኣቶቴላ ናገሼ ዴዔሰ። ጌሻ ኣያናይካ ኢያ ቦላ ዴዔሰ። 26 ቃሲ ከሪሰቶሳ ቤያና ሃይቆናይሳ ጌሻ ኣያናይ ኢያው ቆንጨሲን ኤሪዲ ዴዔሰ። 27 ኢ ሄ ጋላሰ ኣያናይ ካሌሌን ያሳ ኬሌ ቢሰ። ናዓ ኣይራኔ ኣሞሮ ዋጋ ፖላናው ዮጋ ናዓ ዩሱሳ ኤኪዲ ጌሊዳ ዋዳ

28 ሲሞኒ ሞኪ ኤኪዲ ናዓ ኢዲሚዲ፣

29 «ጎዳው ኔ ታው ጌሊዳ ቃላ ማላ፣ ሃዒ ኔ ኣይሊያ ሳሮን ሞይዛ።

30 ታ ኣይፊይ ኣሳ ኡባ ሲንጎን ኔ ገገሲዳ፣

31 ኔ ኣሹዋ ቤዒሰ።

32 ሄሲካ ካዋቴላታ ኡባሰ፣

ያሳ ኦጊያ ቆንጨሲያ ፖያ፣

ኔ ኣሳ ኢሰራዔሌሰካ ቦንቸ»

ያገዲ ያሳ ጋላቲሰ።

33 ዮሴፋራኔ ማይራሚራ ኢያው ኦዲቲዳባን ማላሌቲዶሶና።
 34 ሲሞኒ ኤንታ ኣንጂሰ። ኣዬ ማይራሚኮ፣ «ሄኮ ዳሮ ኣሳ ዋዛና ቆፋይ ቆንጨና ማላ፣ ኢሰራዔሌን ዴዔያ ዳርታሰ ኤንታ ከንዴላሰኔ ዴንዲዋሰ ያሳን ዳሬቲሰ። 35 ቃሲ ኤቁቲይሳታሰ ማላ ገዳና። ኔ ሼሞፑዋራካ ቃሲ ማሺ ኣቆና» ያገሲ። 36 ቃሲ ኣሴሬ ያራፔ ገዲዳ ፋኑዔላ ናዒያ ሃና ጌቲቲያ ናቤይ ዴዓዉሱ። ኢያ ዳሮ ጨማሱ፣ ኢያ ባ ኮይሮ ኣዚናራ ላፑን ላይሌ ዴዓሱ። 37 ኢ ኣዚናይ ሃይቁን ሆሰፑን ታማኔ ኦይዲ ላይሌ ገዳና ጋካናው

2:21 ሉዌ 12:3፤ ሉቃ 1:3 2:22 ሉዌ 12:6-8 2:23 ኬሳ 13:2፣ 12
 2:32 ኢሳ 42:6፤ 49:6፤ 52:10

ቃማኔ ጋላስ ፓጩይ ባይና ዋሳኒኔ ፆማን ፆሳ ከላን ሃጋዛሱ።
 38 ኢያ ሄ ሳቲያን ባዳ ፆሳ ጋላታሱ፤ ዩሩሳሌም ዋዜቱላ ናጊያ
 ኡባስ ዮጋ ናዓባ ማርካታሱ። 39 ዮሴፋራኔ ማይራሚራ ሳዳ
 ሂጊያን ከቲቲዳ ዋጋ ኡባ ፖሊዳፔ ጉዬ ጋሊላ ቢታን ዴዒያ
 ባንታ ካታማ ናዚሬቲ ሲሚዶሶና። 40 ናዓይ ዲጨሽኔ ሚኒሽ
 ቢስ። ጨንጫቲላን ኩሚስ፤ ፆሳ ኣቶ ከሃቲላይ ኢያ ቦላ ዴዔስ።

ዮሱሲ ፆሳ ከሌ ቢስ

41 ዮሴፋራኔ ማይራሚራ ፋሲካ ባሌ ቦንቻናው ላይላን ላይላን
 ዩሩሳሌም ቦሶና። 42 ዮሱሳስ ታማኔ ናምዑ ላይሌ ጊዲያ
 ዋዴ ካሴ ማዜቲዳይሳዳ ባሊያ ቦንቻናው ቢዶሶና። 43 ባሊያ
 ቦንቻዳፔ ጉዬ ሶ ሲሚያ ዋዴ ናዓይ ዮሱሲ ዩሩሳሌምን ኣቲስ።
 ሸን ዮሴፋራኔ ማይራሚራ ኢ ዩሩሳሌምን ኣቶይሳ ኤሪቦኮና።
 44 ኢ ሶ ሲሚያ ኣሳራ ዋላ ዴዒያ ዳኒን ኤንቲ ኢሲ ጋላሳ ኦጌ
 ቢዶሶና። ኢ ባይናይሳ ኤሪዳፔ ጉዬ ባንታ ዳቦታኔ ላጌታ ማታን
 ኮዩዶሶና። 45 ኢ ያን ጳዩን ኮዩሽ ጉዬ ዩሩሳሌም ጋካናው
 ቢዶሶና።

46 ሄ፹ ጋላሳፔ ጉዬ ፆሳ ከላን ኣስታማሬታ ጊደን ኡቲዲ
 ኤንታባ ሲዒሽኔ ኤንታ ኦይቸሽ ዴዒሽን ዴሚዶሶና። 47 ኢያ
 ሲዒያ ኡባይ ኢያ ኣኮካኒኔ ዛረዋን ማላሌቲዶሶና።

48 ሶ ኣሳይ ኢያ ዴሚዳ ዋዴ ማላሌቲዶሶና። ኢያ ኣያካ፥ «ታ
 ናዓው፥ ኣይስ ኦና ሃይሳዳ ኦላዲ? ኔ ኣዋራኔ ታራ ኔና ኮዩሽ
 ኡንዔቲዳ» ያጋሱ።

49 ዮሱሲ ኤንታኮ፥ «ታና ኣይስ ኮዩቲ? ታ፥ ታ ኣዋ ከላን
 ዳናው ቤሴይሳ ኤሬኮቲ» ያጊሱ። 50 ሸን ኢ ኤንታኮ ጊዳባ
 ኤንቲ ኣኮኪቦኮና።

51 ሄሳፌ ጉዬ፥ ኤንታራ ኢሲፌ ናዚሬቲ ካታማ ቢስ። ኤንታው
 ከቲቲሽ ዴዒስ። ኢያ ኣያ ሄ ኡባ ባ ዋዛናን ዋላዳ ናጋሱ።
 52 ዮሱሲ፥ ጨንጫቲላን፥ ጌሳኒኔ ቲማን ፆሳ ሲንሳኒኔ ኣሳ ሲንሳን
 ዲጨስ።

3

**ፆማቂያ ዮሃኒሳ ቲሚርቲያ
 (ማቶ 3:1-12፤ ማር 1:1-8፤ ዮሃ 1:19-28)**

2:39 ማቶ 2:23 2:41 ኬሳ 12:1-27፤ ዛሬ 16:1-8 2:52 1ሳሙ 2:26፤
 ሌሚ 3:4

1 ካዎይ ዲባርዮሲ ሮሜ ቢታን ካዎቲን፡ ታማኔ ኢቻሻንሉ ላይላን፡ ጳጳስ ጳጳሳይሲ ዩሁዳ ሃሪያ ዎዴ ሄሮዲሲ ጋለላ ሃሪያ ዎዴ ኢያ ኢሻ ፊልጶስ ኢጮሪያሳኔ ዲራኮንዶሳ ሃሪያ ዎዴ ሊሳኒዮሲ ኣብላኒሳ ሃሪያ ዎዴ 2 ሃናራኔ ቃያፋራ ካሂኔ ሃላቃ ጊዲ ዴሲሸን፡ ያሳ ቃላይ ዛካሪያሳ ናሳ ዮሃንሳኮ ባዘ ቢታ ዩሰ። 3 ዮሃንሲ፡ «ሂንቴ ናጋራፔ ሲሚቴኔ ፀማቄቲቴ። ያሳይ ሂንቴ ናጋራ ኣቶ ጋና» ያጊዲ ታማርሲሼ ዮርዳኖሴ ሻፋ ሄራን ዴሲያ ቢታ ኡባ ቢሰ። 4 ሄሲካ ናቤይ ኢሳያሲ ባ ማፃፋን፡

«ባዘ ጊደን ባ ቃላ ጶቁ ኦሊዲ፡

ዋሲያ ኡራ ቃላይ፡

ሳሳዳ ኦጊያ ገገሲቴ፡

ሆሮጋካ ፒዲ ኦሊቴ።

5 ኣፎ ኡባይ ኩማና፡

ዙማይኔ ዴሬይ ዚቁ ጋና።

ዎቤ ኦጊይ ሉላና፡

ገሳና ሆሮጋይ ቁንዲ ጋና።

6 ኣሾ ማሲዳ ኡባይ፡

ያሳ ኣሾዋ ቤዓና »

ጊዲ ፃፊዲይሳሳ ሃንሰ።

7 ዮሃንሲ፡ ባ ኩሼን ፀማቄታናው ዩዳ ኣሳኮ፡ «ሂንቴኖ፡ ሾሻ ናይቶ ያናው ዴሲያ ሃንቁዋፊ ኣታና ሜላ ሂንቴና ዘራዲይ ኦኔ? 8 ሂዛ፡ ሂንቴ ሲሙዋ ቆንጨሲያ ሎዎ ኦሶ ኦሊቴ፡ ሂንቴ ዎዛናን፡ ኦኩ፡ ኦ ኣዎይ ኣብራሃሜይ ዴሲሰ ጊዲ ጨቁቶፊቴ።» ሃ ሲባቴ፡ ሃ ሹቻታፔ ያሳይ ኣብራሃሜሰ ናሳ ኬሳናው ዳንዳዴሰ። 9 ሄኮ፡ ቤዳይ ሚላ ፃጶን ዴሲሰ። ሂዛ፡ ሎዎ ኣይፊ ኣይፎና ሚላ ኡባይ ቃንዲቲዲ ታማን ዩጌታና» ያገሰ።

10 ኣሳይ፡ «ያቲን ኦኒ ኣይ ኦሊኖ?» ያገዲ ኦይቺዶሶና።

11 ዮሃንሲ ዛሪዲ፡ «ናሞዑ ኣፊሊ ዴሲያ ኣሲ ባይናይሳሰ ኣሞ። ካሊ ዴሲይሲ ባይናይሳሰ ኣሞ» ያገሰ።

12 ቃራፃ ቃንዲሴይሳቲ ፀማቄታናው ዩዲ፡ «ኣሰታማሪያው፡ ኦኒ ኣይ ኦሊኖ?» ያገደሶና።

13 ኢ ዛሪዲ፡ «ሂንቴ ቃንዲሳናው ከቴቶይሳፊ ኣሊዲ ኤኮፊቴ» ያገሰ። 14 ቃሲ ዎታዳሬቲ ዩዲ፡ «ኦኒ ኣይ ኦሊኖ» ያገዲ ኣይቺዶሶና።

3:4 ኢሳ 40:3-5 3:7 ማቶ 12:34፤ 23:33 3:8 ዮሃ 8:33 3:9 ማቶ 7:19 3:12 ሉቃ 7:29

የሃኒሲ፡ «ኦዳባካ ዋለቃን ዳፊዲ ኤኮፊቲ፣ ኦናካ ዋርደን ሞቶፕቲ፣ ሂንቲ ዳሞዜይ ሂንቲው ጊደ፤ ኡፋይቲዲ ደዒቲ» ያገሰ።

15 አሳይ ከሪሰቶሳ ናጊሼ ደዒያ ገሾ የሃኒሳ፡ «ኢ ከሪሰቶሳ ጊደንደሻ?» ጊዲ ቆፒደሶና። 16 የሃኒሲ ኡባሰ ዛሪዲ፡ «ታኒ ሂንቲና ሃላን ፃማቃይሰ፡ ሺን ታፔ ኦዲዲ ዋለቃሜይሲ ያና። ታኒ ኢያ ጫማ ዋደሩዋ ቢላናው ቤሶና ኣሲ። ኢ ሂንቲና ጌሻ ኣያናኒኔ ታማን ፃማቃና። 17 ዉዲማን ደዒያ ካላ ፖሎ ጌሻናው ፒሐይ ኢያ ኩሺን ደዒሰ። ጌሻ ካላ ባ ሻሊያን ቆላና፤ ካሊያ ቆየና ታማን ፀጋና» ያገሰ።

18 ቃሲ የሃኒሲ አሳ ዳር ዘሬ ዘሪዲ ዋንጌላ * ኦዲሰ።

19 ሺን የሃኒሲ ሄርዲሲ ባ ኢሻ ማቸው፡ ሄርዲያዳ፡ ኤኪዳ ጊሾኔ ሃራ ኢታ ኦሶታ ገሾ ካጨዳ ዋደ 20 ሄርዲሲ ካሴይሳ ቦላ ሃራባ ኡባ ጉጂዲ የሃኒሳ ዋይኔ ጌልሲሰ።

ዬሱሳ ፃማቄቲላ
(ማቶ 1:1-17፤ 3:13-17፤ ማር 1:9-11)

21 የሃኒሲ ቃሺታናፕ ሲንሐ አሳ ኡባ ፃማቄዲ ሲሚን፡ ዬሱሲካ ቃሲ ፃማቄቲሰ። ኢ ዋሲሺን ሳሎይ ደዬቲሰ። 22 ጌሻ ኣያናይ ሆሌዳ ቤንቲሼ ኢያ ቦላ ኡቲሰ። ሳሎፔ «ታኒ ደሲያ ናዒይ ኔና፤ ኔ ታና ኡፋይሳሳ ያገያ» ቃላይ ዩሰ።

23 ዬሱሲ ታማርሶ ኦይኪያ ዋደ ኢያው ሃስታው ላይሐ ጊዲሺን፡ አሳይ ኢያ የሴፋ ናዒ ጊዲ ቆፒሰ።
የሴፊ ኤሌ ናዒ፡ 24 ኤሌይ ማቲ ናዒ፡
ማቲይ ለዌ ናዒ፡ ለዌይ ማልካ ናዒ፡
ማልኪይ የና ናዒ፡ የኒ የሴፋ ናዒ፡
25 የሴፊ ማታቲ ናዒ፡ ማታቲይ ኣሞፃ ናዒ፡
ኣሞፃይ ናሆሜ ናዒ፡ ናሆሜይ ኣሲሊሜ ናዒ፡
ኣሲሊሜይ ናጌ ናዒ፡ 26 ናጌይ ማዓቲ ናዒ፡
ማዓቲይ ማታቲዬ ናዒ፡ ማታቲዬይ ሳማዬ ናዒ፡
27 ሳማዬይ ዩሁዳ ናዒ፡ ዩሁዳ የናኔ ናዒ፡ የናኔይ ራሴ ናዒ፡
ራሴይ ዜሩባቤላ ናዒ፡ ዜሩባቤሌይ ሳላቲያሌ ናዒ፡
ሳላቲያሌይ ኔሬ ናዒ፡ 28 ኔሬይ ማልካ ናዒ፡

* **3:18** ዋንጌላ፡ ገሪኬ ደናን ዋንጌላ ገያ ቃላይ ዳር ኡፋይሲያ ኦዳ ዋይኮ ሚሺራቾ ጉሰ። ሄ ሚሺራቾይካ ከሪሰቶሲ አሳ ዜሬሐ ኡባ ሜሪና ፐርዳሬ ኣሻናው ከቲቲዲ ዩዳ ገታ ኡፋይሳ (ሉቃ 1:19፤ 2:10)። **3:19** ማቶ 14:3-4፤ ማር 6:17-18 **3:22** ሜዴ 22:2፤ ማዝ 2:7፤ ኢሳ 42:1፤ ማቶ 3:17፤ ማር 1:11፤ ሉቃ 9:35

ማልኬይ ሃዳ ናባ፡ ሃዳይ ቆሳሚ ናባ፡
 ቆሳሚይ ኤልሞዳኔ ናባ፡ ኤልሞዳኔይ ኤሬ ናባ፡
 29 ኤሬይ ዮሴጌ ናባ፡ ዮሴጌይ ኣላዛራ ናባ፡
 ኣላዛራ ዮራሚ ናባ፡ ዮራሚይ ማቲ ናባ፡
 ማቲይ ለዌ ናባ፡ 30 ለዌይ ሲሞና ናባ፡
 ሲሞኒ ዪሁዳ ናባ፡ ዪሁዲ ዮሴፋ ናባ፡
 ዮሴፊ ዮናኔ ናባ፡ ዮናኔይ ኤሊያቄሚ ናባ፡
 31 ኤሊያቄሚይ ማሊዬ ናባ፡ ማሊዬይ ማይናኔ ናባ፡
 ማይናኔይ ማቲ ናባ፡ ማቲይ ናታኔ ናባ፡
 ናታኔይ ዳዊቲ ናባ፡ 32 ዳዊቲይ ኢሴዬ ናባ፡
 ኢሴዬይ ኢዮቤዳ ናባ፡ ኢዮቤዳይ ቦዔዛ ናባ፡
 ቦዔዛ ሳልሞና ናባ፡ ሳልሞኔይ ናባሶና ናባ፡
 33 ናባሶኔይ ኣሚናዲቤ ናባ፡ ኣሚናዲቤይ ራሚ ናባ፡ ራሚይ ኣርኔ
 ናባ፡
 ኣርኔይ ኣሰሮሚ ናባ፡ 34 ኣሰሮሚይ ፋሬሴ ናባ፡
 ፋሬሴይ ዪሁዳ ናባ፡
 ዪሁዲ ያይቆባ ናባ፡
 ያይቆቢ ዪሳቃ ናባ፡ ዪሳቄ ኣብራሃሚ ናባ፡
 ኣብራሃሚይ ታራ ናባ፡ 35 ታሪ ናኮሬ ናባ፡
 ናኮሬይ ሳሩጌ ናባ፡ ሳሩጌይ ሬሁ ናባ፡
 ሬሁይ ፋሌቄ ናባ፡ ፋሌቄይ ኤቤራ ናባ፡
 ኤቤሮይ ሴላ ናባ፡ 36 ሴሊ ቃይናሚ ናባ፡
 ቃይናሚይ ኣርፋኪሳዳ ናባ፡ ኣርፋኪሳዳይ ሴሚ ናባ፡
 ሴሚይ ሮሄ ናባ፡ ሮሄይ ላሚሄ ናባ፡
 37 ላሚሄይ ማቲሳላ ናባ፡ ማቲሳሊ ሄኖኬ ናባ፡
 ሄኖኬይ ያሬዳ ናባ፡ ያሬዳይ ማላልዔላ ናባ፡
 ማላልዔላ ቃይናኔ ናባ፡ 38 ቃይናኔይ ሄኖሳ ናባ፡
 ሄኖሴይ ሴታ ናባ፡ ሴቲይ ኣዳሚ ናባ፡
 ኣዳሚይ ዖሳ ናባ፡፡

4

ዬሱሲ ፓጩተሰ
 (ማቶ 4:1-11፤ ማር 1:12-13)

1 ዬሱሲ ጌሻ ኣያናን ኩሚዲ ዮርዳኖሴ ሻፋፔ ሲሚዳ ማላ
 ኣያናይ ኢያ ባዘ ኤፊሰ። 2 ያን ኦይታሙ ጋላሲኔ ቃማ ዓላሄን
 ፓጩተሰ። ሄ ጋላሳታን ኣይኮካ ሞና ጋሞዒዳ ጊሾ ዉርሴላን
 ኮሻተሰ።

3 ጻላሄይ ኢያሱ፡ «ኔኒ ያሳ ናዓ ጊዲኮ ኣኔ ሃይሲ ሹቻይ ኡይሉ ጊደ ጋዳ ኪታ» ያጊሰ።

4 ዩሱሲ ዛሪዲ፡ «ኣሲ ኡይላ ጻላላን ዳና ጌቴቴዲ ፃፌቲሰ» ያጊሰ።

5 ሄሳፌ ጉዩ፡ ጻላሄይ ዩሱሳ ኣዲሳ ዳሬ ቦላ ኬሲዲ ሃ ኣላሚያ ካዎቴላታ ኣይፌ ቁጲ ዛራናው ቤሲሰ። 6 ጻላሄይ፡ «ሃ ኡባሰ ማታይኔ ቦንቾይ ታው ኢሜቲሰ። ታኒ ዶሲዳ ኦዳሰካ ኢሚያ ጊሾ ኔው ኢማና። 7 ሄሳ ጊሾ፡ ኔኒ ታው ጎይኒኮ ኡባይ ኔው ጊዳና» ያጊሰ።

8 ዩሱሲ ዛሪዲ፡ «ኔ ጎዳ፡ ኔ ያሳ፡ ኢያ ጻላላ ጎይና ጌቴቴዲ ፃፌቲሰ» ያጊሰ።

9 ወርሴላን ጻላሄይ ዩሱሳ ዩሩሳላሚ ኤፊዲ ያሳ ኬላሰ ሁዒያ ቦላ ኤሲዲ፡ «ኔኒ ያሳ ናዓ ጊዲኮ ኣኔ ዲጌ ሳዓን ኔና ዩጋ። 10 ኣይሰ ጊኮ፡

ኣና ናጊያ ኪታንቾታ
ያሳይ ኔ ጊሾ ኪታና።

11 ኤንቲ ኔ ቶሆይ ሹቻን ቶቤቶና ሜላ፡
ባንታ ኩሺያን ቶቁ ኦሲዲ ኔና ዳንላና) ጌቴቴዲ ፃፌቲሰ» ያጊሰ።

12 ዩሱሲ ዛሪዲ፡ «ኔ ጎዳ ያሳ ፓጮፋ ጌቴቴዲ ፃፌቲሰ» ያጊሰ።

13 ጻላሄይ ዩሱሳ ፓጪያ ወርሲዳፔ ጉዩ ሃራ ኢንጄ ዋዴ ዳማና ጋካናው ኢያፔ ሻኬቲሰ።

ዩሱሲ ጋለላን ታማርሶ ኦይኪሰ
(ማቶ 4:12-17፤ ማር 1:14-15)

14 ዩሱሲ ኣያና ዋልቃን ኩሚዲ ጋለላ ሲሚሰ። ኢያ ሰንላይ ሄራን ዳዒያ ቢታ ኡባን ኬዩሰ። 15 ኢ ኣይሁዴ ዋሳ ኬላ ጌሊዲ ታማርሲሰ፤ ኣሳ ኡባይ ኢያ ጋላቲዶሶና።

16 ያፔ ኢ ዲጪዳ ካታማ ናዚሬቲ ዩሰ። ካሴ ሜዜቲዳይሳዳ ሳሞባታ ጋለሰ ኣይሁዴ ዋሳ ኬላ ጌሊሰ። ናባባናዉካ ዳንዲ ኤቁሰ። 17 ናቢያ ኢሳያሳ ማፃፋይ ኢያው ኢሜቲን፡ ዶዩዲ፡ ሃይሳዳ ያጊዲ ፃፌቲዳይሳ ዳሚሰ።

18 «ጎዳ ኣያናይ ታ ቦላ ዳዒሰ፡
ማንቆታሰ ዋንጌላ ኦዳና ሜላ
ያሳይ ታና ዶሪሰ።

ቃሾቲዳይሳታስ ቢሌቴሉ፡
 ቆቂዳይሳታ ፃሊሳናሲኔ
 ኡንዔቲዳይሳታ ቢርሻና ሜላ፡

19 ያሳይ ከሃናው ቆፒዳ ላይላ ኦዳና ሜላ ታና ከቲስ» ያጊስ።

20 ሄሳፌ ገዬ፡ ማፃፋ ፃዲዲ ሃጋዜይሳስ ኢሚዲ ታማርሳናው ኡቲስ። አይሁዴ ዋሳ ከላን ዳዒያ አሳቲ ኡባይ ጫዲ ፃሎሶና።

21 ኢ፡ «ሃይሲ ሂንቱ ሃይላን ሂንቱ ሲዒያ ሃ ማፃፋ ቃላይ ሃቸ ፖሌቲስ» ያጊስ።

22 ኡባይ ኢያባ ዳርሲዲ ኦዴቶሶና። ቃሲ ኢያ ዶናፔ ከያ አጾ ከሃቴላን ኩሚዳ ቃላን ማላሌቲሾ፡ «ሃይሲ ዮሴፋ ናዓ ጊዴኔዬ?» ያጊዶሶና።

23 ኢ፡ « ሳና ጳሌ አዋው ኔና አሻ፡ ቂፊርናሆሜን ኔ ኦሊዳባ ኑ ሲያይሳ ቃሲ ሃይሳን ኔ ካታማን ኦላ» ያጊያ ለሚሱዋን ሂንቱ ታና ጋናይሳስ ሲጼይ ባዋ» ያጊስ። 24 ቃሲ፡ «ቱማ ኦዳይስ፤ ናቤይ ባ ዬሌቲዳ ቢታን ቦንቸቲና።

25 «ታ ሂንቱው ቱማ ኦዳይስ፤ ሳሎይ ሃቸ ላይሊኔ ባጋ ሳርዴቲን ሚኖ ኮሺ ቢታ ኡባን ዳዒያ ኤሊያሳ ዋዴ ዳሮ አምዔቲ ኢሰራዔሌን ዳዶሶና። 26 ኤሊያሲ ኤንታፌ ኢሲኔኮካ ከቲቲቤና። ሺን ሳራፕታን ዳዒያ አምዔኮ ከቲቲስ። 27 ናቤያ ኤልሳዔ ዋዴ ኢሰራዔሌን ዳሮ ባሮ ሃርጋንቸቲ ዳዶሶና። ሺን ሶሬ ኡራ ኒዒማኔፔ አቲን አኒካ ፓዲቤና» ያጊስ።

28 አይሁዴ ዋሳ ከላን ዳዒያ አሳ ኡባይ ሄሳ ሲዒዳ ዋዴ ዳሮ ዩሎቲዶሶና። 29 ባንታ ኡቲዳ ቤሳፌ ዴንዲዲ ዙማ ቦላ ከፃቲዳ ካታማፔ ጋፃ ከሲዲ ሱጊ ዬዳናው አፎ ዶና ኤፊዶሶና።

30 ሺን ኢ ኤንታ ጊዶራ ካንሊዲ አጲስ።

ዬሱሲ ቱና አያና ኬሲስ
 (ማር 1:21-28)

31 ያፔ ጋሊላ ቢታን ዳዒያ ቂፊርናሆሜ ካታማ ቢስ። ያን ሳምባታ ጋሳስ አሳ ታማርሲስ። 32 ኢ ታማርሴይ ማታራ ጊዲያ ጊሾ ኡባይ ኢያ ቲሚርቲያን ማላሌቲዶሶና።

33 አይሁዴ ዋሳ ከላን ቱና አያናይ ኦይኪዳ ኡራይ ዳዔስ። 34 ኢ፡ «ናዚሬቲ ዬሱሳ ኑና አይስ ዋይሳይ ኑፔ ሃካ፤ ኔኒ ዩዳይ

4:18 ኢሳ 61:1-2 4:24 ዮሃ 4:44 4:25 1ካዎ 17:1 4:26 1ካዎ 17:8-16 4:27 2ካዎ 5:1-14 4:32 ማቶ 7:28-29፤ ማዝ 91:11-12

ኑና ጳይሳናሴዬ? ኔኒ ኦኔኮ ታኒ ኤራይሰ። ኔኒ ያሳፌ ዪዳ ገሻ» ያጊዲ ዋሲሰ።

35 ዬሱሲ ቱና ኣያናኮ፡ «ሲዒ ጋዳ ሃ ኡራፔ ኬያ» ያጊዲ ሃንቂሰ። ቱና ኣያናይ ኡራ ኣሳ ኡባ ሲንላን ሆሊ ዩጊዲ ኣይኮካ ቆሆና ዬዲዲ ኬዩሰ።

36 ኣሳ ኡባይ ማላሌቲዶሶና። ዋሊኮ፡ «ሃናሰ፡ ሃይሲ ኣይቢ ቲሚርቲ? ቱና ኣያናታ ማታኒኔ ዋልቃን ኪቲሰ፤ ኤንቲካ ኬዮሶና» ያጊዶሶና። 37 ኢያ ሱንላይ ሄራ ኡባን ኬዩሰ።

ዬሱሲ ዳር ሃርጋንቾታ ፓሌሰ
(ማቶ 8:14-17፤ ማር 1:29-34)

38 ሃሳፌ ጉዬ፡ ዬሱሲ ኣይሁዴ ዋሳ ኬላፌ ኬዩዲ ሲሞና ሶ ጌሊሰ። ሲሞና ማቼ ኣያ ሚኖ ቆያ ሚሻ ሃርጌን ሳኬታሱ። ኢዮ ፓላና ሜላ ዬሱሳ ዋሲዶሶና። 39 ኢ ሃፃኮ ሸቂ ሆኪዲ ኢ ሃርጊያ ሃንቂሰ። ሚሻይ ኣጊን ኤሌሳ ዴንዳዳ ኤንታ ሞካሱ።

40 ኣዋይ ዉላና ሃኒሺን ዲማ ዲማ ሃርጊያን ኦይኬቲዳ ኣሳ ኢያኮ ኤሂዶሶና። ኢ ኢሱዋ ኢሱዋ ቦላ ባ ኩሺያ ዋሊዲ ፓሌሰ።

41 ቱና ኣያናቲ ቃሲ፡ «ኔኒ፡ ያሳ ናዓ» ጊዲ ዋሲሾ ዳር ኣሳፔ ኬዩዶሶና። ሺን ኢ ኤንታና ሃንቂሰ። ኢ ኪሪሰቶሳ ጊዴይሳ ኤንቲ ኤሪያ ጊሾ ኢሲባካ ኦዴቶና ሜላ ዲጊሰ።

42 ቡር ዋንቲያ ዋዴ ዬሱሲ ኢሲ ጌማ ቤሲ ቢሰ። ኣሳይ ኮዩሾ ኢ ዴዒያ ቤሳ ዩዶሶና። ኤንታፌ ኢ ሻኬቲዲ ቦና ሜላ ቡቲቲዶሶና። 43 ሺን ኢ፡ «ታኒ ሃራ ካታማታ ባዳ ያሳ ካዋቲላ ዋንጌላ ማርካታናው ቤሴሰ። ታ ኪቲቲዳይ ሄሳሳ» ያጊሰ።

44 ዪሁዳ ቢታን ዴዒያ ኣይሁዴ ዋሳ ኬላን ሳባኪሰ።

5

ዬሱሲ ዶሪዳ ኮይር ታማሬታ
(ማቶ 4:18-22፤ ማር 1:16-20)

1 ኢሲ ጋላሰ ዬሱሲ ጌንሳሬፄ ኣባ ማታን ኤቁዳሺን ዳር ኣሳይ ኢያ ዩሹዋ ኦንዔሊዲ፤ ኢ ታማርሲያ ያሳ ቃላ ሲዶሶና።

2 ያን ሃላ ጋፃን ዴዒያ ናሞዑ ዋጎሎታ ቤዒሰ። ሞሎ ኦይኪያ ኣሳቲ ዋጎሎታፔ ዋዲዲ ባንታ ጊቲያ ሜጮሶና። 3 ሄ ዋጎሎታፔ ሲሞናይሳን ጌሊዲ ቢታፌ ጉሊ ጊዶ ሺሻና ሜላ ኦይቹሰ። ያቲዲ፤ ሄ ዋጎሎዋ ቦላ ኡቲዲ ኣሳ ታማርሲሰ።

5:1 ማቶ 13:1-2፤ ማር 3:9-10፤ 4:1

4 ባ ታማርሱዋ ኦንጊዳፕ ጉዬ ሲሞናኮ፡ «ጌዳ ጨሙዋኮ ሺሻዳ ሞሉዋ ኦይካናው ሂንቲ ጌቲያ ዩጌቲ» ያገሰ።

5 ሲሞኒ ዛሪዳ፡ «አስታማሪያው፡ ቃማ ኩሜፋ ዳቡሪሼ አቂዳ ኣይኮካ ኦይኪቦኮ፡ ሺን ኔ ጌኮ ጌቲያ ዩጋና» ያገሰ።

6 ኤንቲ ጌቲያ ዩጌዳ ዎዴ ጌቲይ ዳኬታና ጋካናው ዳሮ ሞሎ ኦይኪደሶና። 7 ሃራ ዎጎሉዋን ዴሲያ ባንታ ላጌቲ ዩዲ፡ ባንታና ማዳና ሜላ ዉቲዲ ዪጊደሶና። ኤንቲ ዩዲ ናሞዑ ዎጎሎታ፡ ሃፋን ሚቲታና ጋካናው ሞሎን ኩንሊደሶና።

8 ሲሞን ጳዒርሲ ሂሳ ቤዒዳ ዎዴ ዩሱሳ ሲንፋን ኩንዲዲ፡ «ጎዳው፡ ታኒ ናጋራንቾ አሲ ጌዲያ ጊሾ ታፕ ሻኬታ» ያገሰ።

9 ሂሳ ኢ ጌዳይ ኢኔ ኢያራ ዴዔይሳቲ ኦይኪዳ ሞሉዋ ዳሮቲፋን ማላላቲዳ ጊሾሳ። 10 ቃሲ ሲሞና ላጌ ጌዲዳ ዛብዲዮሳ ናይቲ ያይቆባራኔ ዮሃኒሳራ ማላላቲደሶና። ዩሱሲ ሲሞናኮ፡ «ባቦፋ! ሂዛፕ ኔኒ አሴ ኦይኪያ አሲ ጌዳና» ያገሰ። 11 ኤንቲ ዎጎሎታ ጋፃ ሺሻዳፕ ጉዬ ኡባ አገዲ ዩሱሳ ካሊደሶና።

ዩሱሲ ባሮ ሃርጋንቾዋ ፓሊስ
(ማቶ 8:1-4፤ ማር 1:40-45)

12 ዩሱሲ ካታማታፕ ኢሱዋን ዴዒሺን አሲ ባሮ ሃርጌን * ኦይኬቲዳ አሲ ሂ ካታማን ዴዒስ። ሂ ኡራይ ዩሱሳ ቤዒዲ ኢያ ሲንፋን ጉፋኒዲ፡ «ጎዳው፡ ኔ ሸኔ ጌዲኮ ታና ጌሻናው ዳንዳዓሳ» ጌዲ ዎሲስ።

13 ዩሱሲ ባ ኩሺያ ዩዲ ቦቹዲ፡ «ኤ፡ ታ ሸኔ፤ ጌያ» ያገሰ። ኢራ ባሮ ሃርጌይ ኡራፕ ኪቹስ።

14 ዩሱሲ፡ «ሃይሳ ኦዴስካ ኦደፓ፡ ሺን ባዳ ኔናቲፋ ኣይሁዴ ካሂያ ቤሳ። ኔ ጌዩዳይሳስ ማርካ ጌዳና ሜላ ሙሴይ ኪቲዳ ያርሹዋ ያርሻ» ጌዲ ኪቲስ።

15 ጌደሺን፡ ኢያ ሱንፋይ ካሴፕ አፏዲ ዳልጊሼ ቢስ። ዳሮ አሳይ ኢ ኦዲያባ ሲዓናዉኔ ባንታ ሃርጊያፌ ፓፃናው ዮሶና።

16 ሺን ዩሱሲ ዳሮ ዎዴ ጌማ ቤሲ ቢዲ ዎሴስ።

ዩሱሲ ጉንዳ ፓሊስ
(ማቶ 9:1-8፤ ማር 2:1-12)

5:5 ዮሃ 21:3 5:6 ዮሃ 21:6 * 5:12 ባሮ ሃርጌ፡ ባሮ ሃርጌይ ኣሳ ጋልባ ቦላ ኬያ ሃርጌ፡ ኢሲራዔሌ ቢታን ባሮ ሃርጋንቾቲ ሃራ ኣሳፕ ዲማቲዲ ዴዎሶናፕ ኣቲን ኣሳራ ጋሂቶኮና። 5:14 ሉዌ 14:1-32

17 ኢሲ ጋላስ ዩሱሲ ታማርሲሺን ጋሊላፔኔ ዪሁዳ ሄራ ኡባሬ ቃሲ ዩሩሳላሜፔካ ዪዳ ፋሪሳዊቲኔ ሂጌ አስታማሪቲ ያን ኡቲዶሶና። አሳ ፓሊያ ጎዳ ዋልቃይካ ኢያራ ደዔሶ። 18 ሄ ዋዴ አሳይ ኢሲ ጉንዳ አሲ ሃላራ ቶኪዲ ኤሂዶሶና። ሶ ጌልሲዲ ኢያ ሲንሳን ዋላናው ቆፒዶሶና። 19 ሺን አሳ ዳሮቴላፌ ዴንዶይሳን ሶ ጌልሳናው ያኔቲዲ ከላ ቦላ ከዪዲ፣ ካራ ቃወዲዲ፣ ሃርጋንቸዋ ሃላራ አሳ ሻኪዲ ዩሱሳ ሲንሳን ዩጊዶሶና።

20 ዩሱሲ ኤንታ አማኑዋ ቤዒዲ፣ «ላ አዲያው፣ ኔ ናጋራይ ቁሼቲስ» ያጊሰ።

21 ሂጌ አስታማሪቲኔ ፋሪሳዊቲ፣ «ሃይሲ ያሳ ቦላ ያጊዲ ኦዴቲይ ኦኔ? ኢሲ ያሳፌ አቲን ሃሪ ናጋራ ቁቻናው ዳንዳዔይ ኦኔ?» ያጊዲ ቆፒዶሶና።

22 ዩሱሲ ኤንታ ቆፋ ኤሪዳ ጊሾ ኤንታኮ፣ «ሂንቴ ዋዛናን ሄሳሶ አይስ ቆፔቲ? 23 ኔ ናጋራይ ቁሼቲስ ጌይሳፌኔ ዴንዳዳ ባ ጌይሳፌ አዉሲ ካዉዪ?» 24 ሺን ታ ሄሳ ጊዳይ አሳ ናዓይ ሳዓ ቦላ ናጋራ ቁቻናው ማቲ ዴዔይሳ ሂንቴ ኤራና ሜላሳ።» ሄሳፌ ካሊዲ፣ ጉንዳ ኡራኮ፣ «ዴንዳ፤ ኔ አልጋ ቶካዳ ኔ ሶ ባ» ያጊሰ። 25 ኢ ኤሌሲ ዴንዲዲ ኤንታ ሲንሳን ኤቁስ፤ ኢ ቶከቲዲ ዪዳ አልጋ ቶኪዲ ያሳ ጋላቲሼ ባ ሶ ቢስ። 26 ሄ ዋዴ ኡባይካ ማላሌቲዶሶና። ያሳ ጋላቲሼ፣ «ሃቺ ጌታ ማላታ ቤዒዳ» ያጊዲ ያሼቲዶሶና።

ዩሱሲ ለዌ ዪጊስ
(ማቶ 9:9-13፤ ማር 2:13-17)

27 ሄሳፌ ጉዬ፣ ዩሱሲ ያፔ ከዪዲ ቢስ። ለዌ ጌቲቲያ ኢሲ ቃራፃ ቃንዲሴይሲ ቃራፃ ቃንዲሴያ ቤሳን ኡቲዳይሳ ቤዒዲ፣ «ታና ካላ» ያጊሰ። 28 ኢ ኡባባ አጊ ዴንዲዲ ኢያ ካሊስ።

29 ሄ ለዌይ ባ ሶን ጌታ ጊቢራ ጊጊሲስ። ዳሮ ቃራፃ ቃንዲሴይሳቲኔ ሃራ አሳቲ ካላ ማናው ኡቲዶሶና። 30 ፋሪሳዊቲኔ ሂጌ አስታማሪቲ፣ «ቃራፃ ቃንዲይሳታራኔ ናጋራንቸታራ አይስ ሜቲኔ ኡዬቲ?» ያጊዲ ዩሱሳ ታማሪታ ቦላ ዙዙሚዶሶና።

31 ዩሱሲ ኤንታኮ፣ «ሃርጋንቸታሳፌ አቲን ፓፃታስ አኪሜ ኮሺና። 32 ታኒ ናጋራንቸታ ማርታኮ ዛራናሳፌ አቲን ጌሻታ ዪጋናው ያቢኬ» ያጊዲ ዛሪስ።

33 ከንቲ ዩሱሳኮ፡ «የሃኒሳ ታማራቲ ዳሮ ዋዴ የሞሶና፡ ዋሶሶና፤ ቃሲ ፋሪሳዊታ ታማራቲካ ሄሳሉ ኦሎሶና፡ ሺን ኔይሳቲ ኡባ ዋዴ ሞሶናኔ ኡዮሶና» ያገደሶና።

34 ዩሱሱ ከንታኮ፡ «ሙሹራይ ከንታራ ዳዒሺን ጻጌቲዳ አሳይ ያማና ማላ ኦላናው ዳንዳዒቲ? 35 ሺን ሙሹራይ ከንታፊ ቫኬታና ጋላሳይ ያና፡ ሄ ዋዴ ከንቲ ያማና።»

36 ቃሲ ያገደዱ ለሚሶ ኦዲሰ፤ «ኦራሳ ማዖፔ ፔዲዲ ጋልዓ ማዖ ቦላ ሲኬይ ኦኒካ ባዋ። ሄሳሉ ኦሊኮ ኦራሳ ማዖፎ ፔዲሰ፡ ኦራሳይ ጋልዓሰ ገጌና። 37 ማልዓንቶ ዋይኒያ ጋልዓ ኦጎሮን ቆሊያ ኦኒካ ባዋ። ሄሳ ኦሊኮ፡ ኦራሳ ዋይኔይ ጋልዓ ኦጎሮን ቆሊሰ፤ ዋይኔይ ጉኬሰ ኦጎሮይካ ማደናባ ገዴሰ። 38 ሄሳ ገሹ፡ ኦራሳ ዋይኔይ ኦራሳ ኦጎሮን ቆሊታናው ቤሰሰ። 39 ሄዛ፡ ጫላይ ሎዖ ገያ ገሹ ጫላ ዋይኔ ኡዩ ሲሚዲ ማልዓንቶ ኮዩይ ኦኒካ ባዋ» ያገሰ።

6

ዩሱሱ ሳምባታባ አይሼቲስ (ማቶ 12:1-8፤ ማር 2:23-28)

1 ኢሲ ሳምባታ ጋላሰ ዩሱሱ ገሰቲ ጋዴ ገደራ አዴሰ። ዩሱሳ ታማራቲ ቲያ ባንጋ ዲሉዲ ባንታ ኩሼን ሺርኪዲ ሞሶና። 2 ሺን ፋሪሳዊታ ገደፌ ኢሶቲ ኢሶቲ፡ «ሳምባታ ጋላሰ ኦላናው ቤሶናባ አይሰ ኦላቲ?» ያገደሶና።

3 ዩሱሱ ከንታኮ ዛሪዲ፡ «ዳዊቲይ ኮሻቲዳ ዋዴ ባራ ዴዔይሳታራ ኢሲፌ ኦላይሳ ናባቢቤኬቲ? 4 ያሳ ኬላ ጌሊዲ አይሁዴ ካሄኔታ ፃላላሰ ቤሲያ ዳቡዋ ሚሰ፤ ባራ ዴዔይሳታሰካ ኢሚሰ» ያገሰ። 5 ቃሲ ዩሱሱ፡ «አሳ ናዓይ ሳምባታ ጎዳ» ያገሰ።

6 ሃራ ሳምባታ ጋላሰ ዩሱሱ አይሁዴ ዋሳ ኬላ ጌሊዲ ታማርሴሰ። ሄ ቤሳን ኡሻቻ ኩሼይ ጉንዲዳ ኢሲ አሲ ዴዔሰ። 7 ሃጌ አስታማራቲኔ ፋሪሳዊቲ ኢያ ሞታናው ጋሶ ኮዩዲ ሳምባታ ጋላሰ ፓሊኮ ቤዓና ገዴ ናጎሶና። 8 ሺን ዩሱሱ ከንታ ቆፋ ኤሪዲ ኩሼይ ጉንዲዳ ኡራኮ፡ «ዴንዳዳ አሳ ገዲዋን ኤቃ» ያገሰ። ኡራይካ ዴንዲ ኤቂሰ።

6:1 ዛሬ 23:25 6:3 1ሳሙ 21:1-6 6:4 ለዌ 24:9

9 ዩሱሲ፡ «አኔ ታ ሂንቴና ኢሲባ ኦይቻይስ፤ ሳምባታ ጋላስ ኦላናው ቤሴይ ሎዖባዬዬ ኢታባዬ? ሼምፖ አሾዬ ወይኮ ዳይሶ?» ያገሰ።

10 ቃሲ ዩሱሲ ኢያ ዩሹዋን ዳዒያ አሳ ዩሺ ዌሊዲ ኡራኮ፡ «ኔ ኩሺያ ፒዲ ኦላ» ያገሰ። ኡራይካ ኢ ገዳይሳዳ ኦሊን ኩሺይ ፓዲሰ። 11 ሺን ሂጌ አስታማሬቲኔ ፋሪሳዌቲ ዳሮ ዩሎቲዶሶና። ዩሱሳ ቦላ አይ ኦሊኖ ገዲ ባንታ ገደን ማቄቲዶሶና።

ዩሱሲ ታማኔ ናምዑ ሃዋሬታ ዶሪስ
(ማቶ 10:1-4፤ ማር 3:13-19)

12 ሄ ወዴ ጋላሳታፔ ኢሱዋን ዩሱሲ ዋሳናው ዳሪያ ቦላ ከዩሰ። ቃማ ኩሜላ ያሳ ዋሲሼ አቁሰ። 13 ዋንቴሌ ባ ታማሬታ ዌገዲ ኤንታ ገደፌ ታማኔ ናምዓታ ዶሪዲ፡ ኤንታና፡ «ሃዋሬታ» ገዲ ሱንሳሰ። 14 ኤንቲካ፡ ጳዊሮሳ ገዲ ሱንሳዲ ሰሞና፡ ኢያ አሻ ኢንዲሪያሳ፡ ያይቆባ፡ ዮሃንሳ፡ ፊልጶሳ፡ ባርቶሎሚዮሳ፡ 15 ማቶሳ፡ ቶማሳ፡ ኢልፊዮሳ ናዓ ያይቆባ፡ ባ ቢታስ ሚሼቲያ ሰሞና፡ 16 ያይቆባ ናዓ ዩሁዳኔ ዩሱሳ አሉ ኢሚዳ አስቆሮታ ዩሁዳ።

17 ዩሱሲ ኤንታራ ኢሲፌ ዳሪያፔ ዋዲዲ ዳንባ ቤሳን ኤቁሰ። ኢያ ታማሬታፔ ዳሮቲ ሄ ቤሳን ዳዖሶና ዩሁዳ ቢታ ኡባፌ ዩሩሳላሜፔ፡ ዊሮሳፔኔ ሲዶና አባ ጋፃፔ ዩዳ ዳሮ አሳይ ዳዔስ። 18 ኤንቲ ዩዳይ ኢ ታማርሲያባ ሲዓናዉኔ ባንታ ሃርገያፌ ፓፃናሳ። ቱና አያናን ዋዬቲያ አሳቲካ ፓዲዶሶና። 19 ዋልቃይ ኢያፔ ከዩዲ አሳ ኡባ ፓሊያ ገሾ አሳይ ኢያ ቦቻናው ኮዮሶና።

20 ባ ታማሬታኮ ዌሊዲ ሃይሳዳ ያገሰ።
«ሂንቴኖ፡ ማንቆቶ፡ ሂንቴ ኢንጃቲዳይሳታ፤
ያሳ ካዋቴላይ ሂንቴሳ።

21 ሂንቴ ሃዒ ኮሻቴይሳቲ ኢንጃቲዳይሳታ፡
ሂንቴ ካላና።
ሂንቴ ሃዒ ዩኬይሳቲ ኢንጃቲዳይሳታ
ሂንቴ ሚጫና።

22 አሳይ ሂንቴና አሳ ናዓ ገሾ
ኢዲያ ወዴ
ሂንቴና ሂሊያ ወዴ
ሂንቴና ኤንቲ ቶቲያ ወዴ፤
ኢታ ሱንሳ ኤንቲ ሂንቴው ኢሚያ ወዴ
ሂንቴ ኢንጃቲዳይሳታ።

23 «ሄኮ፡ ሂንቴ ወይቶይ ሳሎን ጊታ ጊዲያ ጊሾ ሄ ዎዴ ኡፋይሳን ጉጉጉ። ኣይሰ ጊኮ፡ ቤኒ ኤንታ ኣዋቲ ናቤታ ቦላ ሄሳዲ ኦሊደሶና።»

24 «ሺን ዱሬቶ ሂንቴና ኣዬ፤ ሂንቴ ሃዒ ሎዎ ዱሳ ኤኪዴታ።

25 ሃዒ ካሊዲይሳቶ ሂንቴና ኣዬ፤ ሂንቴ ኮሻታና።

ሃዒ ሚጠይሳቶ ሂንቴናሾ ሂንቴ ካዮታናኔ ዬካና።

26 ኣሲ ኡባይ ሂንቴ ሎዎቴላ ፃላላ ኦዲያ ዎዴ ሂንቴና ኣዬ። ኤንታ ኣዋቲ ቤኒ ዎርዳንቾ ናቤታ ቦላ ሄሳዲ ኦሊደሶና።

ሂንቴ ሞርኬታ ሲቂቴ
(ማቶ 5:38-48፤ 7:12)

27 «ሺን ታና ሲዒያ ሂንቴሰ ታ ኦዲይሰ፤ ሂንቴ ሞርኬታ ሲቂቴ፤ ሂንቴና ኢፃይሳታሰ ሎዎባ ኦሊቴ። 28 ሂንቴና ቃንጌይሳታ ኣንጂቴ፡ ሂንቴና ናቂይሳታሰ ዎሲቴ። 29 ኢሲ ባጋ ሻካላ ባቂይሳሰ ሃንኮ ባጋካ ቤሳ። ኔ ላፃና ኤካና ጌይሳሰ ኔ ሻሚዚያካ ጉጃዳ ኢማ። 30 ኔና ዎሲያ ኡባሰ ኢማ፤ ኔፔ ኤኪዲ ኦናካ ዛሮ ጋዳ ኦይቾፋ። 31 ኣሳይ ሂንቴው ኦላና ማላ ሂንቴ ኮያባ ኡባ ሂንቴካ ኣሳሰ ኦሊቴ።

32 «ሂንቴ ሂንቴና ዶሲያ ኣሳታ ፃላላ ዶሲኮ፡ ኣይ ጋላቲ ሂንቴው ዴዒ? ሃሪ ኣቶሺን፡ ናጋራንቾቲካ ባንታና ሲቂይሳታ ሲቆሶና። 33 ሂንቴው ሎዎባ ኦሊይሳታ ፃላላሰ ሎዎባ ኦሊኮ ሂንቴው ኣይ ጋላቲ ዴዒ? ናጋራንቾቲካ ሄሳዲ ኦላሶና። 34 ታልዔ ዛራና ኣሳ ፃላላሰ ሂንቴ ታልዒኮ ኣይ ዴማ ጋላቴቴቲ? ናጋራንቾቲካ ጉዬ ዛራና ኣሲ ቤዒዲ ታልዎሶና።»

ሃራታ ቦላ ፒርዶፊቴ

35 «ሺን ሂንቴ ሞርኬታ ሲቂቴ፤ ኤንታው ሎዎባ ኦሊቴ። ጉዬ ኤካናው ቆፖና ታልዒቴ። ሄሳን ሂንቴ ኤካና ወይቶይ ጊታ ጊዳና። ሂንቴ ኡባፌ ቦላ ያሳ ናይታ ጊዳና። ኢ ባና ጋላቶናይሳታሰኔ ኢታታሰ ኬሃ። 36 ሂንቴ ኣዋይ ኬሃ ጊደይሳዳ ሂንቴካ ኬሃ ጊዲቴ።

37 «ኣሳ ቦላ ፒርዶፊቴ፤ ሂንቴ ቦላ ፒርዶቴና። ሂንቴ ቦሬቶና ማላ ኦናካ ቦርጉቴ። ኣቶ ጊቴ፤ ያሳይ ሂንቴው ኣቶ ጋና።

38 እሚቲ፤ ሂንቲው እሚታና። ሂንቲ ማኪዳባን ሂንቲው ዛሬ ማኪታና፤ ኡባራካ ሎዎ ማኪያባን ባቁዲ፤ ሱዲ ኩንሊዲ፤ ላሌታና ጋካናው ሂንቲው ማኪቲ እሚታና» ያገሰ።

39 ቃሲካ ዩሱሲ ያገዲ እንታው ለሚሶ እዲስ፤ «ቆቄይ ቆቄ ካሌላናው ዳንዳዒ? ካሌሊኮ ናምዓይካ ዋሊ ኤኪዲ እኛን ወሎኮናዬ? 40 ታማሪይ እስታማሬፔ አዴና። ሺን ሎይሊ ታማሪዳ ኡራይ ባ እስታማሪያሉ ሃኔሰ።

41 «ኔ እሻ አይፊያን ዳዒያ ቡሪያ አይሰ ቤዓይ? ኔ አይፊያን ዳዒያ ቱሲ ዳኔይሳ አይሰ ቤዒኪ? 42 ኔ አይፊያን ዳዒያ ቱሲ ዳኔይሳ ቤዖና ኔ እሻኮ፤ ማ ከሻው ኔ አይፊያን ዳዒያ ቡሪያ ኬሶ ጋናው ዋና ዳንዳዒይ? ኔኖ ጨቡዋው፤ ከይርታዳ ኔ አይፊያን ዳዒያ ቱሲ ዳኔይሳ ኬሳ። ሃሳፌ ጉዬ፤ ኔ እሻ አይፊያን ዳዒያ ቡሪያ ኬሳናው ጌሻዳ ዪላና።

ሚላኔ ኢያ አይፊያ

43 «ሎዎ ሚሊ ኢታ አይፌ አይፊና፤ ሃሳዳካ ኢታ ሚሊ ሎዎ አይፌ አይፊና። 44 አይፌ አይፊያ ሚሊ ኡባይ ባ አይፊያን ኡሬቲስ። አጉንሳፌ ባላሴ ሚላ አይፌይ ማጻፎና ቃሲ ላዴፔ ዋይኔ አይፌይ ማጻፎና። 45 ሎዎ እሲ ባ ዋዛናን ኩሚዳ ሎዎባፔ ሎዎባ ኬሴስ። ኢታ እሲ ባ ዋዛናን ኩሚዳ ኢታባፔ ኢታባ ኬሴስ። እሲ ባ ዋዛናን ኩሚዳ ፓላሂዳባፔ ባ ዶናን ሃሳዬስ።

ኬፍ ኬጂያ ናምዑ አሳታ

(ማቶ 7:24-27)

46 «ታ ጌይሳ እፍኬታ፤ ሺን ያቲን አይሰ ታና፤ ሳዳው፤ ጎዳው፤ ጌቲ?» 47 ታኮ ዩይኔ ታ ቃላ ሲዒዲ ፖሊያ ኡባይ ኦና ዳኒያኮ ታ ሂንቲና ቤሳና። 48 ኢ ኬፍ ኬጃናው ዘቄ ኦሊ፤ ኦላ ቦኪዲ፤ ጋርሳን ዳዒያ ዛላ ቦላ ኬላ ኤሲዳ ጨንጫ ኡራ ዳኔስ። ዲያይ ዲዒዲ ሄ ኬላ ሱጊስ። ሺን ሚንሊዲ ኬጂዳ ጊሾ ቃጻናው ዳንዳዒቤና። 49 ሺን ታ ቃላ ሲዒዲ ኦላናይ ባ ኬላ ሻፌ ቢታ ቦላ ኬጂዳ ኡራ ዳኔስ። ዲያይ ዲዒዲ ሄ ኬላ ሱጊዳ ዋዴ ኤሌሲዲ ኩንዲስ። ሄ ኬላይ ዋልቃማ ኩንዴሊ ኩንዲስ» ያገሰ።

7

ማቶ ሃላቃ አማኑዋ

(ማቶ 8:5-13፤ ዮሃ 4:43-54)

1 ዬሱሲ ሄሳ ኡባ አሳ ሲንፋን ታማርሲዲ ኦንጊዳፔ ጉዬ፥ ቀፊርናሆሜ ካታማ ቢስ። 2 ሄ ቤሳን ኢሲ ማቶ ሃላቃይ ዳዔስ። ኢ ዳሮ ደሲያ አይሌይ ሃርጌቲዲ ሃይቆስ ጋኪስ። 3 ኢ ዬሱሳባ ሲዲዳ ዎዴ ባ አይሊያ ፓላና ሜላ ኢያ ዎሶ ጊዲ ኢሲ ኢሲ አይሁዳ ጨማታ ዬሱሳኮ ከቲስ። 4 ከቲቲዳይሳቲ፥ ዬሱሳኮ ቢዲ፥ «ኔ ኢያው ሃይሳ ኦላናው ቤሴስ። 5 አይስ ጊኮ፥ ሃ ኡራይ ኑ አሳ ደሴስ፥ አይሁዳ ዎሳ ኬላካ ኬዳስ» ጊዲ ሚንፊ ዎሲደሶና 6 ዬሱሲካ ኤንታራ ቢስ።

ማቶ ሃላቃ ሶኮ ማቲያ ዎዴ ባ ላጌታ ኢያኮ ከቲዲ፥ «ጎዳው፥ ታ ካራፔ ጋርሳን ኔ ቤላናው ታ ቤሶና ጊሾ ዳቡርፓ። 7 ታካ ታና ኔ ሲንፊ ሺቃናው ቤሲያ አሲ ጋዳ ቆፒኬ። ሺን ኔ ኢሲ ቃላ ኦዳ፤ ታ አይሌይ ፓዎና። 8 ታው ታፔ ቦላራ ሃላቃይ ዳዔስ፥ ታፔ ጋርሳን ታ ከቲያ ዎታዳሬቲ ዳዎሶና። ኢሱዎ፥ «ሳ ጊኮ ቤስ፥ ሃንኩዎ፥ «ሃያ» ጊኮ ዬስ። ታ አይሊያኮ፥ «ሃኖ ኦላ» ጊኮ ኦፊስ» ያጊስ።

9 ዬሱሲ ሄሳ ሲዲዳ ዎዴ ማላሌቲስ። ጉዬ ሲሚዲ ባራ ያ አሳኮ፥ «ታኒ ሂንቲው ቱማ ኦዳይስ፤ ሃሪ አቶሺን ኢስራዔልንካ ሃይሳ ሜላ ጊታ አማኖ ዳማቢኬ» ያጊስ። 10 ከቲቲዳይሳቲ ሶ ሲሚያ ዎዴ አይሌይ ፓዳን ዳሚደሶና።

አምቤ ናዓ

11 ጉላ ዎዴፔ ጉዬ ዬሱሲ ናይኔ ካታማ ቢስ። ኢያ ታማሬታራኔ ሃራ ዳሮ አሳቲ ኢያራ ቢደሶና። 12 ኢ ካታማ ጌላና ሃኒያ ዎዴ አሃ ቶኪዳ ዳሮ አሳቲ ካታማፔ ኬዮሶና። ሃይቁዳ ናዓይ ባ አዬስ ኢሱዎ፥ ኢያካ አምዎ ጊዳዳ ዳዓዉሱ። ካታማ አሳፔ ዳርቲ ኢራ ዳዎሶና። 13 ጎዳይ ኢዮ ቤዲዳ ዎዴ ቃዴቲዲ፥ «ዮኮፋ» ያጊስ።

14 ሺቁዲ ሃላ ቦቺን ቶኪዳ አሳቲ ኤቁደሶና። ዬሱሲ፥ «ላ፥ ያላጋው ዳንዳ» ያጊስ። 15 ሃይቁዳይሲ ዳንዲ ኡቲዲ ኦዳ ኦይኪስ። ዬሱሲ ናዓ ኤኪዲ አዬስ ኢሚስ።

16 አሳ ኡባይ ያሸቲዲ፥ «ጊታ ናቤይ ኑ ጊደን ዳንዲስ፤ ዎሳይ ባ አሳ ቤዲስ» ያጊዲ ዎሳ ጋላቲደሶና። 17 ኢያ ሱንፋይ ዪሁዳኒኔ ሄ ሄራን ዳዔያ ቢታ ኡባን ሲዔቲስ።

ዬሱሳኔ ፃማቂያ ዮሃንሳ

18 ፃማቂያ ዮሃንሳ ታማሬቲ ሄሳ ኡባ ዮሃንሳስ ኦዲደሶና። ኢ ኤንታ ጊደፊ ናምዓታ ያጊዲ፥ 19 «ያና ጌቲቲዳይ ኔኔዬ? ዎይኮ ሃራ ናጊኖ?» ያጊዲ ኦይቺቲ ጊዲ ጎዳኮ ከቲስ።

20 አሳቲ ዬሱሳኮ ቢዲ፥ ፃማቂያ ዮሃንሲ፥ «ያና ጌቲቲዳይ ኔኔዬ? ዎይኮ ሃራ ናጊኖ?» ጌቲ ጊዲ ኑና ኔኮ ከቲስ ያጊደሶና።

21 ሄ ሳቴንካ ዩሱሲ ዳሮ አሳ ሃርጊያፌ ፓሊስ። ቱና አያናታ ኬሲስ፣ ቆቋዳ አይፊያካ ያሊሲስ። 22 ዮሃንስ ማታፔ ከቲቲዲ ዩዳይሳታኮ፣ «ቢዲ ሂንቲ በዒዳይሳኔ ሲዒዳይሳ ዮሃንስስ ኦዲቲ። አይፌ ቆቋቲ ያሎሶና፣ ጉንዳቲ ቢርሼቲዲ ሃሙቶሶና፣ ባሮ ሃርጋንቾቲ ጌዮሶና፣ ቱሌቲ ሲዖሶና፣ ሃይቋዳይሳቲ ሃይቆፔ ዴንዶሶና፣ ማንቆታስ ዋንጌላይ ሳባኬቲስ። 23 ታናን ቆሴቶና ኦኒካ አንጃቲዳይሳ።»

24 ዮሃንስ ከቲዳይሳቲ ቢዳፔ ጉዬ ዩሱሲ አሳስ ዮሃንስ ባያገዲ ኦዲስ። «ሂንቲ አይ በዓናው ባዞ ቢታ ከዩዳቲ? ጫርኮይ ቃሊያ ማታ በዓናሴዬ? 25 ያቲን፣ አይ በዓናው ከዩዳቲ? ኮይሴ ማዖ ማዒዳ አሳ በዓናሴዬ? ኮይሴ ማዖ ማዒዳይሳቲኔ ሳዒ አንጃቲዳ አሳይ ካዎ ከላን ዴዖሶና። 26 ያቲን፣ አይ በዓናው ከዩዳቲ? ናቢያ በዓናሴዬ? ኤ፣ ታ ያጋይስ። ሂንቲ በዓናው ከዩዳይ ናቤፔ አጄይሳ።»

27 ሳ ኦሊያ ኔ ሲንላን ጊሊያ ታ ከታንቹዋ ኔፔ ሲንሴ ታ ከታና

ጌቲቲዲ ያፌቲዳይ ኢያሳ። 28 ታ ሂንቲው ኦዳይስ፤ ማጫሳፔ ዩሌቲዳይሳታ ጊዶፌ ዮሃንስፔ አጄይ ባዎ። ያሳ ካዎቲላን ኡባፌ ጉዳይስ፣ ኢ ኡባፌ ጌታ ጊዳና» ያገሰ።

29 ሃሪ አቶሺን፣ ዩሱሳ ቃላ ሲዒዳ ቃሪፃ ቃንዲሴይሳቲ ኡባይ ዮሃንስ ኩሼን ፃማቋቲዲ ያሳይ ያሎ ጊዳይሳ ቆንጨሲዶሶና።

30 ሺን ፋሪሳዊቲኔ ሂጌ አስታማሬቲ ዮሃንስ ኩሼን ፃማቋቶና ኢዲዲ ያሳ ዞሪያ ለቁሲዶሶና።

31 ዩሱሲ ካሊዲ ሃይሳዳ ያገሰ። «ሂዛ፣ ሃ ዎዲያ ዩሌቲላ አይቢራ ዳኒሶ? ኤንቲካ ኦና ዳኖና? 32 ጊያ ጊዶን ኡቲዲ ዎሊ ያገዲ፣ ሱ ሂንቲው ሱሱልዔ ፑኒን፣ ሂንቲ ዩዳኬታ። ኦ ሳቢዲ ዙሌሊን፣ ሂንቲ ዩኬኬታ) ያገያ ናይታ ዳኖሶና። 33 ፃማቋያ ዮሃንስ ሞናኔ ኡዮና ዩን፣ ሳታ አያናራ ዴዔስ ጊዳታ።»

34 አሳ ናባይ ሚሼኔ ኡዩሼ ዩን፣ ሳራሞባኔ ኡሻንቾ፣ ቃሪፃ ቃንዲሴይሳታኔ ናጋራንቾታ ዳቦ) ጊዳታ። 35 ሂዛ፣ ጨንጫቲላ ቱማቲላይ ኢያ ናይታ ኡባ ማታን ኤሬቲስ» ያገሰ።

ኢሲ ማጫሲያ ዩሱሳ ሺቶ ቲያሱ

36 ኢሲ ፋሪሳዊይ ዩሱሳ ካሊ ሙዛናው ባ ሶ ያገሰ። ኢ ፋሪሳዊያ ሶ ቢዲ ጋይታ ቦላ ኡቲስ። 37 ሄ ካታማን ኢሲ ናጋራንቾ ማጫሲ ዴዒያራ ዩሱሲ ፋሪሳዊያ ሶን ጊቢራ ቦላ ዴዔይሳ ሲዒዳ

7:22 ኢሳ 35:5-6፤ 61:1 7:27 ሚል 3:1 7:29 ማቶ 21:32፤ ሉቃ 3:12

ዎዴ ዳር አልፎ ጲልቃፄ ሺቶ ኤካዳ ያሱ። 38 ዬሱሳስ ጉዬ ባገራ፡ ኢያ ቶሁዋ ማታን ኤቃዳ ዬካሼ ኢያ ቶሁዋ ባ አፋላራ ላኬላውሱ። ባ ቢናናራ ኢያ ቶሁዋ ቁቻሼኔ ዬራሼ ሺቶ ቲያሱ።

39 ገቢራ ገሊሲዳ ፋሪሳዌይ ሄሳ ቤዒዳ ዎዴ ባ ዎዛናን፡ «ሃይሲ ናቤ ገዲያኮ ሃ ማጫሲያ ኢያ ቦቺያራ ኦኔኮ ቃሲ ኢያ ናጋራንቸ ገዴይሳካ ኢ ኤራናሺን» ያገሰ።

40 ዬሱሲ፡ «ሲሞና፡ ታ ኔው ኦዲያባይ ዴዔሰ» ያገሰ።

ኢ፡ «አስታማሪያው፡ ታው ኦዳ» ያገሰ።

41 ዬሱሲ ኢያኮ፡ «ናሞው አሳቲ ኢሲ ኡራፔ ሚሹ ታልዒደሶና። ኢሶይ ኢቻሹ ፃቱ ቢራ ሃንኮይ ቃሲ አሻታሙ ቢራ ታልዒደሶና። 42 ናሞዒይካ ታልዒያ ጨጋናው ያኔቲን፡ ናሞዒታሰካ ታልዒያ ማሪሰ። ሂዛ፡ ሃ ናሞዒታፔ ሄ ኡራ ዳር ደሳናይ ኔው አዉሳ ዳኒ» ያገሰ።

43 ሲሞኒ፡ «ዳር አጮይ ማሬቲዳ ኡራይ ዳር ደሳና ዳኔሰ» ያገሰ። ዬሱሲ፡ «ኔ ቱማ ፒርዳዳሳ» ያገሰ። 44 ሄሳፌ ጉዬ፡ ዬሱሲ ማጫሴኮ ሲሚ ፃሊዲ፡ ሲሞናኮ፡ «ሃና ማጫሲው ቤዒይ? ታኒ ኔ ሶ ጌሊን ሃሪ አቲን ኔ ታው ቶሆ ሃፍ ኢማባካ፡ ሺን ኢያ ታ ቶሁዋ ባ አፋላን ላኮላዳ ባ ቢናናን ቁቻሱ። 45 ኔኒ ታና ዬራ ኤካባካ፡ ሺን ኢያ ታ ኔ ሶ ጌሎዴፔ ደማዳ ታ ቶሁዋ ዬሮ አጋቡኩ። 46 ኔኒ ታ ሁዒያን ዛይቱ ቲያባካ፡ ሺን ኢያ ታ ቶሁዋ ሺቶ ቲያዉሱ። 47 ኢያ ታና ዳር ደሲዳ ገሾ ኢ ዳር ናጋራይ አቶ ጌቴቲሰ። ኢያ ጉላ ናጋራይ አቶ ጌቴቲዳይ ጉላራ ደሴሰ።»

48 ዬሱሲ ማጫሴኮ፡ «ኔ ናጋራይ አቶ ጌቴቲሰ» ያገሰ።

49 ኢያራ ኢሲፌ ጋይታን ኡቲዲ ሚያ ኢማላቲ፡ «ናጋራ አቶ ያጌይ፡ ኢ ሃይሲ ኦኔ?» ያገዲ ባንታ ዎዛናን ቆፒደሶና።

50 ዬሱሲ ማጫሴኮ፡ «ኔ አማሮይ ኔና አሺሰ፤ ሳር ባ» ያገሰ።

8

ዬሱሳ ሞኪዳ ማጫሳታ

1 ሄሳፌ ጉዬ፡ ዬሱሲ ያሳ ካዎቱላ ዎንጌላ ሳባኪሽ ካታማራኔ ጉታራ አዲሰ። ሄ ዎዴ ታማኔ ናሞው ሃዋሬቲ ኢያራ ዴዖሶና። 2 ቃሲ ቱና አያናፔኔ ዲማ ዲማ ሃርገያፌ ፓዲዳ ኢሲ ኢሲ ማጫሳቲ ኢያራ ዴዖሶና። ኤንቲካ፡ ላፑን ቱና አያናቲ ከዪዳ ማግደላ

7:37 ማቶ 26:7፤ ማር 14:3፤ ዮሃ 12:3

ማይራሞ፡ 3 ሄሮዲስ ሹማ ኩዛ ማቸው ዮሃና፡ ሶሲናራኔ ቃሲ ሃራ ዳሮቲ ኤንታና ሚሼን ማዳይሳቲ ዳዎሶና።

4 ዳሮ አሳይ ዲማ ዲማ ካታማፔ ኢያኮ ሺቁን ለሚሶን ኤንታው ኦዲስ። 5 «ኢሲ ጎሻንቸይ ዜሬሌ ዜራናው ከዩስ። ኢ ዜሬሺን ኢሲ ኢሲ ዜሬላይ ኦጌ ጋዎን ዎዲዲ ዩዴቲስ፡ ሳሎ ካፎቲ ማደደሶና። 6 ሃራቲ ሻሎይ ጋርሳን ዳዲያ ቢታ ቦላ ዎዲደሶና። ቡሮ ዶሊዳ ማላ ቢታን ላሆይ ባይና ጊሾ ሚጨደሶና። 7 ሃራ ዜሬላይ ቃሲ አጉንላ ጊደን ዎዲስ። አጉንላራ ዎላ ዲጨዳ ጊሾ አጉንላይ ጨሊዲ ቤሳን አሺስ። 8 ሃራቲ ሎዎ ቢታ ቦላ ዎዲደሶና። ዶሊዳ ዎዴ ያቲ ኩሼ አይፊደሶና።» ሄሳ ኦዲ ኦንጊዲ፡ ባ ቃላ ዶቁ ኦሊዲ፡ «ሲዲያ ሃይሌ ዳዲያ ኡባይ ሲዎ» ያገሰ።

9 ኢያ ታማሬቲ፡ «ሃ ለሚሱዋ ቢርሼላይ አይቤ?» ያገዲ ኦይቸደሶና 10 ኢ፡ «ዎሳ ካዎቴላ ፀራ ኤራና ማላ ሂንቲው ኢማቲስ። ሺን ሃራቲ ቤዲሼ ዳሞና ማላ፡ ሲዲሼ አኬኮና ማላ ለሚሶን ኦዲይስ።

11 «ሂዛ፡ ሃ ለሚሱዋ ቢርሼላይ ሃይሳ፡ ዜሬሌ ያጌቲዳይ ዎሳ ቃላ። 12 ኦጌ ጋዎን ዎዲዲ ዜሬላይ ቃላ ሲዔይሳታ። ጊደሺን፡ ኤንቲ አማኒዲ አቶና ማላ ዓላሄይ ቃላ ኤንታ ዎዛናፔ ማዲ ዲጌስ። 13 ሻሎይ ጋርሳን ዳዲያ ቢታ ቦላ ዎዲዲ ዜሬላይ ቃላ ሲዲዲ ኡፋይሳን ኤኬይሳታ። ኤንቲ ሃዲስ አማናሶናፔ አቲን ዓጾይ ባይና ጊሾ ፓጩይ ጋኪያ ዎዴ ኤሌሲዲ ካደሶና። 14 አጉንላ ጊደን ዜሬቲዳይሳቲ ቃላ ሲዔይሳታ። ኤንቲካ አላሚያ ቆፋን፡ ዲሬቴላኒኔ ሳዓ ዲሳ ሚኮቴላን ጨሊቲዲ ቤሴይሳዳ አይፊሶኮና። 15 ሎዎ ቢታን ዎዲዲ ዜሬላይ ሎዎ ዎዛናን ቃላ ሲዲዲ ናጌይሳታኔ ዳንዳዒን ሚኒዲ አይፊ አይፊይሳታ።

16 «ዎምፔ ዎምፒዲ፡ ዳቾ ካሚይ ዎይኮ ኦርሳፌ ጋርሳን ዎሌይ ዳና። ጌሊያ አሲ ቤዓና ማላ ዶቃ ቤሳን ዎሌስ።

17 «ሄሳ ጊሾ፡ ቆንጨፎ ከዮና ቆሴቲዲ አቲያባይ፡ ኤሬቶና ጌሚዲ አቲያባይ ዳና።

18 «ሂዛ፡ ሂንቲ ቃላ ዋቲ ሲዲያኮ አኬኪቲ። ዳዲያ ኡባስ ጉኩቴዲ ኢማታና፡ ባይናይሳስ ሃራ አቶሺን ኢያው ዳዲያ ጉሊያካ ኢያፔ ኤኬታና» ያገሰ።

8:2 ማቶ 27:55-56፤ ማር 15:40-41፤ ሉቃ 23:49 8:10 ኢሳ 6:9 8:16 ማቶ 5:15፤ ሉቃ 11:33 8:17 ማቶ 10:26፤ ሉቃ 12:2 8:18 ማቶ 25:29፤ ሉቃ 19:26

ዩሱሳ አዩራኔ አሻታራ
(ማቶ 12:46-50፤ ማር 3:31-35)

19 ዩሱሳ አዩራኔ አሻታራ ኢየሱ ዩደሶና። ሺን አሳ ዳርቴላፊ ዳንደይሳን ኢያ ዳማናው ዳንደቢቦኮና። 20 ኢሲ አሲ ዩሱሳኮ። «ኔ አዩራኔ ኔ አሻታራ ኔና ኮዩዲ ካሬን ናጎሶና» ያገሰ።

21 ዩሱሲ ዛሬዲ። «የሳ ቃላ ሲዲዲ ኦሶን ፔሼይሳቲ ኡባይ ታው አዮኔ ታው አሻ» ያገሰ።

ዩሱሲ ሃላ ዙሊያ ሴሪስ
(ማቶ 8:23-27፤ ማር 4:35-41)

22 ኢሲ ጋላስ ዩሱሳራኔ ኢያ ታማሬታራ ኢሲፊ ዋጎሎን ጌሊዲ። «አባ ፒናስ» ያገሰ። ኤንቲካ ባናው ዳንዲደሶና። 23 አባ ቦላራ ኤንቲ ፒናናው ቢሺን ዩሱሲ ጲስኪስ። ቆፖና ሚኖ ጫርኮይ አባ ቦላ ዳንዲሰ። ሃላይ ዋጎሎዋን ጌሊን ዋጎሎይ ሚቴቴላ ኦይኪያ ዋዴ ኡባይ ባቢደሶና።

24 ኢያ ታማሬቲ ኢየሱ ሺቂዲ። «ኑ ጎዳው፣ ኑ ጎዳው፣ ኑ ቆጎሰ ያገዲ» ዩሱሳ ዳንሲደሶና።

ዩሱሲ ዳንዲዲ ጫርኮዋኔ ጎቲያ ሴሪስ። ኤሌሲዲ ጫርኮይኔ ጎቲይ ዋፑ ገሰ። ሳርቴላይካ ሰሚስ። 25 ዩሱሲ ባ ታማሬታኮ። «ሂንቲ አማናይ አወኔ» ያገሰ። ኤንቲካ፣ ያዩሼኔ ማላላቲሼ ኢሶይ ኢሱዋኮ። «ጫርኮይኔ ሃላይ ኪቴቴይሲ፣ ኢ ሃይሲ ኦኔ» ያገደሶና።

ቱና አያናፔ ዩዳቲዳ ኡራ
(ማቶ 8:28-34፤ ማር 5:1-20)

26 አባ ፒኒዲ ጋሊላ ባጋራ ዳዒያ ጌርጌሶኔ ቢታ ጋኪደሶና።

27 ዩሱሲ ዋጎሎዋፔ ከዩዲ ሳዓን ዋጲሺን ቱና አያናን ኦይኬቲዳ ኡራይ ካታማፔ ከዩዲ ኢያራ ጋሂቲስ። ዳሮ ላይላ ኣፊሊ ማዖና ካሎ ዳፎን ዳዔሲፔ ኣቲን ሶ ጌሌና። 28 ዩሱሳ ቤዒዳ ዋዴ ኢያ ሲንላን ፑፋኒዲ፣ ባ ቃላ ቶቁ ኦሲዲ። «ኡባፊ ቦላ ያሳ ናዓው ዩሱሳ ኔራ ታው ኣይቢ ኢሲፊቴላ ዳዒ? ሃያና ታና ሃዒ ኡንዔላፋርኪ» ያገሰ። 29 ሂሳ ኢ ገዳይ፣ ቱና አያናይ ኡራፔ ከያና ሜላ ዩሱሲ ሃንቁቲዳ ገሾሳ። ዳር ዋዴ ቱና አያናይ ኢያ ሃሪዳ ገሾ ሳንላላታኒኔ ቶሆ ቃቺያ ቢራታን ቃሼቲዲ ናጌቴስ። ሺን ቃሹዋ ዱሲዲ ቱና አያናን ላጌቲዲ ባዞ ጌሊስ።

30 ዩሱሲ፣ «ኔ ሱንላይ ኦኔ» ያገዲ ኦይቺስ።
ኢ፣ ዳሮ ቱና አያናቲ ኢያ ኦይኪዲ ገሾ ባና፣ «ሌገዮና» ገሰ።
31 ቱና አያናቲ ባንታና ሲዖሌ ኪቶና ሜላ ዋሲደሶና።

32 ሄ ቤሳን ዘዜ ቦላ ሚያ ጉዲንፉ ወዳይ ሃሙቴስ። ሂኒ ጉዲንፉታን ጌሊኖ ጊዲ ዋሲዶሶና፣ ኢካ «ጌሊቴ» ጊስ። 33 ቱና ኢያናቲ ኡራፔ ከዪዲ ጉዲንፉታን ጌሊዶሶና። ወዳይ ዳሪያፔ ዲጌ ጉርጉዲዲ ኣባን ጌሊስ።

34 ሂንፋንቸቲ ሃኒዳይሳ ቤዒዳ ዎዴ ዎዲ ቢዲ፣ ካታማኒኔ ጉታ ኡባን ኡዲዶሶና። 35 ኣሳይ ሃኒዳባ ቤዓናው ከዪዲ ዬሱሳኮ ዪዶሶና። ቱና ኢያናይ ከዪዲ ኡራይ ማዎ ማዒዲ፣ ኢያ ዎዛናይ ስሚን፣ ዬሱሳ ቶሆ ማታን ኡቲዳይሳ ዴሚዲ ያዪዶሶና። 36 ኢያ ቤዒዳ ኣሳይ ቱና ኢያናን ኦይኬቲዳ ኡራይ ዋኒዲ ፓዲዳኮ ኦዲዶሶና። 37 ጌርጌሶኔ ዩሹዋን ዴዒያ ኣሳይ ጊታ ያሺ ያሹቲዲ ዬሱሲ ባንታ ማታፔ ባና ሚላ ዋሲዶሶና። ኢ ዎጎሉዋን ጌሊዲ ጉዬ ስሚስ።

38 ቱና ኢያናይ ከዪዲ ኡራይ ዬሱሳራ ዳናው ዋሲስ። 39 ሺን ዬሱሲ ኢያኮ፣ «ኔ ሶ ስማ፣ ያሳይ ኣይ ሚላ ጊታባ ኔው ኦሊዳኮ ኦዲ» ያጊዲ ዋይዚስ። ኡራይካ ዬሱሲ ኣይ ሚላ ጊታባ ኢያው ኦሊዳኮ ካታማ ኡባን ማርካቲሽ ቢስ።

ሃይቂዳ ናዒወኔ ዬሱሳ ማዑዋ ቦቺዳ ማጫሲው
(ማቶ 9:18-26፤ ማር 5:21-43)

40 ኣሳይ ናጊዲ ጋምዒዳ ጊሾ ዬሱሲ ስሚያ ዎዴ ዋኪ ኤኪዶሶና። 41 ኣይሁዴ ዎሳ ከፋ ሃላቃ ጊዲዳ ኢያሮሳ ጊያ ኡራይ ባ ሶ ያና ሚላ ዬሱሳ ቶሆዋ ቦላ ዎዲዲ ዋሲስ። 42 ኢያው ታማኔ ናምዑ ላይሊ ጊዲዳ ማጫ ናዒ ዴዒያራ ሳኬታዳ ሃይቆስ ጋካዳ ዴዒወሱ። ዬሱሲ ቢያ ዎዴ ኣሳይ ኢያ ኡንዔሌስ። 43 ታማኔ ናምዑ ላይሊ ሱሊ ጎጊሽ ጋምዒዳ ማጫሲ ዴዒያራ ዴዒወሱ። ኢያ ባው ዴዒያ ሚሺያ ኣኪሚታስ ኢማዳ ኦንጋሱ። ሺን ፓፃናው ዳንዳዓቡኩ። 44 ኢያ ዬሱሳስ ጉዬ ባጋራ ሺቃዳ፣ ኢያ ኣፊላ ማጫራ ቦቻሱ፣ ሶሆዋራ ጎጊያ ሱሳይ ኤቂ ኣጊስ።

45 ዬሱሲ፣ «ታና ቦቺዳይ ኦኔ?» ያጊስ። ኡባይ «ኑ ቦቺቦኮ» ያጊን፣ ጴጋሮሲ፣ «ኣስታማሪያው፣ ዳሮ ኣሳይ ካሊሺኒኔ ኡንዔሊሺን ቤዓሽ ዋናዳ፣ «ታና ቦቺዳይ ኦኔ?» ጋይ» ያጊስ።

46 ሺን ዬሱሲ፣ «ኢሲ ኣሲ ታና ቦቺስ፤ ኣይስ ጊኮ፣ ዎልቂ ታፔ ከዮይሲ ታው ኤሬቲስ» ያጊስ።

47 ማጫሲያ፣ ኢባይ ቆንጨዳይሳ ኤሪዳ ዎዴ ኮኮራሽ ያዳ ዬሱሳ ቶሆዋ ቦላ ኩንዳሱ። ኣይስ ቦቺዳኮኔ ዋናዳ ኤሌሳዳ ፓዲዳኮ ኣሳ ኡባ ስንፋን ማርካታሱ። 48 ኢ፣ «ታ ናቴ፣ ኔ ኣማናይ ኔና ፓሊስ፤ ሳሮን ባ» ያጊስ።

49 ዩሱሲ ኦዳ ኦንጎና ደዒሺን፣ ኣይሁዳ ዋሳ ኬላ ሃላቃ፣ ኢያሮሳ ሶፔ ኢሲ ኣሲ ዩዲ፣ «ኢያሮሳ፣ ኔ ናዒያ ሃይቃሱ፤ ኣስታማሪያ ማላ ዳቡሪሶፋ» ያገሰ።

50 ሺን ዩሱሲ ሄሳ ሲዒዲ ኢያሮሳኩ፣ «ባቦፋ! ኣማና፣ ኔ ናዒያ ፓፃና» ያገሰ።

51 ዩሱሲ ኢያሮሳ ሶ ጋኪዳ ዋደ ጳዒሮሳፔ፣ ዮሃንሳፔ፣ ያይቆባፔ፣ ናዔ ኣዋፔኔ ኣዬፔ ኣቲን ሃሪ ጌላና ማላ ኮዬቤና።

52 ሄ ቤሳን ደዒያ ኣሳ ኡባይ ናዔሰ ማሸቲዲ ዩኪሺን፣ ዩሱሲ፣ «ዩኮፊቴ! ናዒያ ጳሰካሱፔ ኣቲን ሃይቃሱኩ» ያገሰ።

53 ኣሳይ ናዒያ ሃይቂዳይሳ ኤሪያ ጊሾ ኢያ ኦዳ ለቂዲ ማጠደሶና። 54 ሺን ዩሱሲ ናዔ ኩሺያ ኦይኪዲ፣ «ናቴ ዴንዳ» ያገሰ። 55 ናዔሰ ሽምፖይ ሰሚን ዴንዳ ኤቃሱ። ዩሱሲ ኤንታኩ፣ «ኢዉ ሚያባ ኢሚቴ» ያገሰ። 56 ናዔ ኣዋራኔ ኣዬራ ማላሌቲደሶና። ሺን ዩሱሲ ሃይሳ፣ «ኦዴሰካ ኦዶፔቴ» ያገሰ።

9

ዩሱሲ ታማኔ ናምዑ ሃዋሪታ ኪቲሰ (ማቶ 10:5-15፤ ማር 6:7-13)

1 ዩሱሲ ታማኔ ናምዑ ሃዋሪታ ባኮ ያገዲ፣ ቱና ኣያናታ ኬሳና ማላኔ ሃርጌ ኡባ ፓላና ማላ ዋልቃኔ ማታ ኢሚሰ። 2 ያሳ ካዋቲላባ ማርካታናዲኔ ሃርጋንቾታ ፓላናዳ ኪቲሰ። 3 ኢ ኤንታኩ፣ «ፃምዓ ጊዲን ኦጎር ጊዲን ካላ ጊዲን ማሸ ጊዲን ላሚ ማዒያ ኣፊላ ጊዲን ኦጌሰ ጊዲ ኣይኮካ ኣይኮፊቴ። 4 ሄ ካታማፔ ሂንቴ ኬያና ጋካናው ኣማላቲላን ሂንቴ ጌሊዳሱዋን ጋምዒቴ። 5 ኦኒካ ሂንቴና ሞኮና ኢዲኮ ሄ ካታማፔ ኬዩሺ ኤንታው ማርካ ጊዳና ማላ ሂንቴ ቶሁዋን ደዒያ ባና ፒቲዲ ኬዩቴ።» 6 ኤንቲካ ኪቲቲዳይሳዳ ኬዩዲ ዋንጌላ ኦዲሽኔ ዲማ ዲማ ጉታታን ሃርጋንቾታ ፓላሽ ኣጲደሶና።

7 ጋለላ ቢታ ሃሪያ ሄሮዲሲ ዩሱሲ ኦላዳባ ኡባ ሲዒዳ ዋደ ዳጋሚሰ። ኣይሰ ገኮ፣ ኢሲ ኢሲ ኣሳቲ ዮሃንሲ ሃይቆፔ ዴንደና ኣጌና ያጎሶና። 8 ባጋቲ፣ «ኤሊያሲ ቆንጨሰ» ጎሶና፤ ሃራቲ ቃሲ፣ «ቤኔ ናቤታፔ ኢሶይ ሃይቆፔ ዴንዲሰ» ያገዲ ኦዴቶሶና። 9 ሺን ሄሮዲሲ፣ «ዮሃንሳ ቆጲያ ታ ቃንዲሳዳ ዋዳሰ። ያቲን፣ ሃይሳሉ ያጌቲዲ ኢያባ ኦዴቴይ፣ ኢ ኦኔ?» ያገዲ ባ ኣይፊን ቤዓናው ኮዩሰ።

ዩሱሲ ኢቻሹ ሙኩሉ አሳ ሙዚስ
(ማቶ 14:13-21፤ ማር 6:30-44፤ ዮሃ 6:1-14)

10 ታማኔ ናምዑ ሃዋሬቲ ገዬ ሲሚ ዩዲ፣ ኤንቲ ኦሊዳባ ኡባ ዩሱሳስ ኦዲደሶና። ኢ ኤንታና ኤኪዲ ቤቴሳይዳ ካታማፔ ጋፃ ኤፊስ። 11 ሺን ዳሮ አሳይ ዩሱሳ ገዴይሳ ኤሪዲ ኢያ ካሊደሶና። ኢ ኤንታ ሞኪ ኤኪዲ ያሳ ካዋቴፋባ ታማርሲስ፤ ፓፃናው ኮዩይሳታካ ፓሊስ።

12 ሳሩ ኦማርሲያ ዋዴ ታማኔ ናምዑ ሃዋሬቲ ኢያኮ ሺቁዲ፣ «ኑ ዴዔይ ባዞ ቢታ ገዲያ ገሾ አሳይ ዴማ ዴማ ጉታታኔ ካታማታ ቢዲ፣ ካሊኔ አቁያሶ ኮያና ሜላ አሳ ሞይዛ» ያገደሶና።

13 ሺን ኢ፣ «ኤንታው ሚያባ ሂንቴ ኢሚቴ» ያገሰ።
ኤንቲ፣ «ኑስ ዴዔይ ኢቻሹ ኡይሊኔ ናምዑ ሞሎ ገዲያ ገሾ ሃ አሳስ ገዲያ ካሊ ኑኒ ቢዲ ሻሞና ኢፃኮ ገዴና» ያገደሶና።

14 ሄ ቤሳን ኢቻሹ ሙኩሉ ገዲያ አዴቲ ዴያሶና።
ዩሱሲ ባ ታማሬታኮ፣ «ኢሻታማን ኢሻታማን ሻኪ ሻኪ አሳ ኡቴሰቴ» ያገሰ።

15 ኢያ ታማሬቲ፣ ኢ ከቲዳይሳዳ አሳ ኡቴሲደሶና። 16 ኢ ኢቻሹ ኡይላኔ ናምዑ ሞሎታ ኤኪዲ፣ ሳሎ ጂሊዲ፣ ያሳ ጋላቲዲ፣ ሚንሊዲ አሳ ኡባ ጋፋና ሜላ ባ ታማሬታስ ኢሚስ። 17 ኡባይ ሚዲ ካሊደሶና። ኤንታፊ አቲዳ ቲፊይ ታማኔ ናምዑ ጋይታ ኩሜሊ ገዲስ።

ጳጳርሲ፣ ዩሱሲ ኦኔኮ ማርካቲስ
(ማቶ 16:13-19፤ ማር 8:27-29)

18 ዩሱሲ ባ ፃላላ ዋሲሺን፣ ኢያ ታማሬቲ ኢያኮ ዩደሶና። ኢ፣ «አሳይ ታና ኦና ጎና?» ገዲ ኦይቺስ።

19 ኤንቲ ዛሪዲ «ኢሶቲ ኢሶቲ፣ ሳማቁያ ዮሃኒሳ፣ ባጋቲ ኤሊያሳ፣ ሃራቲ ቃሲ፣ ቤኒ ናቤታፔ ኢሶይ ሃይቆፔ ዴንዲስ» ያገሰና።

20 ኢ ዛሪዲ፣ «ያቲን ሂንቴ ታና ኦና ጌቲ» ያገሰ። ጳጳርሲ፣ «ኔኒ ያሳፊ ከቴቲዳ ከሪስቶሳ» ያገዲ ዛሪስ።

21 ዩሱሲ ሃይሳ ኦዴሰካ ኦዶፒቴ ገዲ ሚንሊዲ ኦዲስ። 22 ቃሲካ ዩሱሲ፣ «አሳ ናዓይ ዳሮ ሜቱዋ ኤካና። ቢታ ጨማታን፣ ካሂኔ ሃላቃታን፣ ሂጌ አሰታማሬታን አጴ ኢሜታና። ኤንቲ ኢያ ዋቆና፣ ሺን ኢ ሄቫንሶ ጋላስ ሃይቆፔ ዴንዳና» ያገሰ።

9:19 ማቶ 14:1፣ 2፤ ማር 6:14-15፤ ሉቃ 9:7-8 9:20 ዮሃ 16:20-28፤ ማር 8:30-9:1

23 ዩሱሲ አሳ ኡባኮ፡ «ታና ካላናው ኮይይ ኦኒካ ዳዒኮ ባና ካዶ፡ ባ ማሰቃሊያ ጋላስ ጋላስ ቶኪዲ ታና ካሎ። 24 ባ ሼምፕው አሻናው ኮያ ኡባይ ኢዮ ጳይሴስ፡ ባ ሼምፕው ታ ጊሾ ጊዲ ጳይሴያ ኦኒካ ኢዮ አሼስ። 25 አሲ አላሜ ኡባ ሃሪዲ፡ ጊዶሺን ባ ሼምፕው ጳይሴያባ ወይኮ ቆሂያባ ጊዲኮ ኢያ አይ ማዲ? 26 ኦኒካ ታናኒኔ ታ ቃላን ዩላቲኮ አሳ ናዓይ ባ ቦንቹዋራ ሄሳዳካ አዋ ቦንቹዋራኔ ጌሻ ኪታንቸታ ቦንቹዋራ ያ ወዳ ኢያን ዩላታና። 27 ታ ሂንቴው ቱማ ኦዳይስ፤ ሃይሳን ኤቁዳይሳታ ጊዶፊ ያሳ ካዋቴላ ቤያናሺን ሃይቆና አሳቲ ዳያሶና» ያጊስ።

ዩሱሳ ማላይ ላሚቲስ
(ማቶ 17:1-8፤ ማር 9:2-8)

28 ዩሱሲ ሄ ኦዳ ኦዲን፡ ሆሰፑን ጋላሳፔ ጉይ ጳይሪሳ፡ ያይቆባኔ ዮሃኒሳ ባራ ኤኪዲ ዋሳናው ዳሪያ ቦላ ኮይሰ። 29 ኢ ዋሳ ቦላ ዳዒሺን ኢያ አይፊ ካሬይ ላሚቲስ፤ አፊላይካ አዋ ማላ ጳሊዲ ቦዲስ። 30 ናምቡ አሳቲ፡ ኤንቲካ ሙሴራኔ ኤሊያሳራ ቦንቸን ቆንጫዲ፡ 31 ዩሩሳላሚን ፖሊታናው ዳዒያባ፡ ሄሰካ፡ ኢ ሃ አላሚያፔ ሻኬታናባ ኢያራ ኦዳቶሶና። 32 ጳይሪሳኔ ኢያራ ዳዒይሳታ ጳሰኮይ ኤፊን፡ ኤንቲ ጳሰኮፊ ባርኪያ ወዳ ኢያ ቦንቹዋኔ ኢያራ ኤቁዳ ናምቡ አሳታ ቤዒዶሶና። 33 አሳቲ ዩሱሳፔ ሻኬቲዲ ባና ሃኒሺን፡ ጳይሪሲ ዩሱሳኮ፡ «ጎዳው፡ ሃይሳን ጊዳይሲ ኮስ አይ ማላ ሎያ! ኢሲኖ ኔው፡ ኢሲኖ ሙሴስ፡ ኢሲኖ ኤሊያሳስ ኦላዲ ሄቱ ሻቃራ ሻቃሪስ» ያጊስ። ሺን ኢ አይ ጊዳኮ ኤሬና።

34 ኢ ያጊዲ ኦዳቲሺን ሻራይ ዩዲ ኤንታና ካሚስ፡ ኤንቲ ሄ ሻራ ጊዶ ጌሊሼ ባቢዶሶና። 35 ሻራ ጊዶፊ፡ «ታ ዶሪዳ ናዓይ ሃይሳ ኢያ ሲዒቱ» ያጊያ ቃላይ ሲዒቲስ። 36 ሄ ቃላይ ሲዒቲዳፔ ጉይ ዩሱሲ ባርካ ዳዒሼ ቤንቲስ። ሄ ወዳ ኤንቲ ቤዒዳባ ኦዳስካ ኦዳና፡ ባንታ ዋዛናን ኦይኪዲ ሲዒ ጊዶሶና።

ዩሱሲ ቱና አያና ኢሲ ናዓፔ ኮሲስ
(ማቶ 17:14-18፤ ማር 9:14-27)

37 ዋንቴሌ ኤንቲ ዳሪያፔ ዋዲያ ወዳ ዳር አሳይ ዩዲ ኢያራ ጋሄቲዶሶና። 38 ሄ ወዳ አሳ ጊዶፊ ኢሲ አሲ፡ «አስታማሪያው፡ ታ

9:23 ማቶ 10:38፤ ሉቃ 14:27 9:24 ማቶ 10:39፤ ሉቃ 17:33፤ ዮሃ 12:25
9:28 2ጳጳ 1:17-18 9:35 ኢሳ 42:1፤ ማቶ 3:17፤ 12:18፤ ማር 1:11፤ ሉቃ 3:22

ኢሲ ናባ ያዳ ቤዓርኪ። 39 ቱና አያናይ ቆፖና ኦይኪዲ ዋሲሴሰ፤ ጎፖንቶ ዩጊሲዲ ቃኬሬሴሰ፤ አሳቴላ ቆሂዲ ኡንዔሊዲ ዩዴሰ። 40 ኔ ታማሬቲ ኬሳና ሜላ ዋሳሰ፤ ሺን ኤንቲ ዳንዳቢቦኮና» ያጊዲ ዋሲሰ።

41 ዩሱሲ፡ «አማኖይ ባይና ጌላ ዩሌቴላቶ፣ አዉዴ ጋካናው ታ ሂንቴራ ዳኔ፣ ሂንቴና ዳንዳዓኔ? ኔ ናባ ባዳ ሃ ኤካያ» ያጊሰ።

42 ናባ ኤኪዲ ያ ዋዴ ቱና አያናይ ሳባን ሆሊ ዩጊዲ ኮኮርሲሰ። ሺን ዩሱሲ ቱና አያና ሃንቁዲ ናባ፤ ኬሲሰ። ናባካ ናባ አዋሰ አሚሰ። 43 አሳይ ኡባይ ያሳ ጌታ ዋልቃን ማላሌቲዶሶና። ኤንቲ ኢ ኦሊዳባን ማላሌቲሺን፣ ዩሱሲ ባ ታማሬታኮ፣ 44 «ሃይሳ ታ ሂንቴው ኦዴይሳ ሎይሊ ሲባቴ፤ አሳ ናባይ ሞርኬታ ኩሺን አጂ አሜታና» ያጊሰ። 45 ሺን ኢ ጊዳባይ ኤንታሬ ጌሚዳ ጊሾ አኬኪቦኮና። ሄሳ ጊሾ፣ ዛሬዲ ኦይቻናው ባቢዶሶና።

ኡባሬ ጌታ ጊዳናይ ኦኔ?
(ማቶ 18:1-5፤ ማር 9:33-37)

46 ዩሱሳ ታማሬቲ፡ «ኦ ጊደን ጌታ ጊዳናይ ኦኔ?» ጊዲ ፓላማ አይኪዶሶና። 47 ዩሱሲ ኤንታ ዋዛና ቆፋ ኤሬዲ ዮጋ ናባ ባ ማታን ኤሲዲ፣ 48 «ሃ ዮጋ ናባ ታ ሱንላን ሞኪያ ኦኒካ ታና ሞኬሰ፣ ታና ሞኬይ ታና ከቲዳይሳ ሞኬሰ፣ ሂንቴ ኡባሬ ጉዳይሰ፣ ኢ ጌታ ጊዳና» ያጊሰ።

49 ዮሃኒሲ፡ «ሳዳው፣ ኢሲ ኦሲ ኔ ሱንላን ቱና አያናታ ኬሲሺን ቤቢዲ ኢ ኦራ ጊደና ጊሾ ዲጊዳ» ያጊሰ።

50 ዩሱሲ ዛሬዲ፡ «ሂንቴራ ኤቁቶናይሰ፣ ኢ ሂንቴ ባጋ። ሄሳ ጊሾ፣ ኢያ ዲጎሬቲ» ያጊሰ።

ሳማሬ አሳይ ዩሱሳ ኢዲዶሶና

51 ዩሱሲ ሳሎ ቢያ ዋዴይ ማታቲዳ ጊሾ ዩሩሳላሜ ባናው ቃንዲዲ ዳንዲሰ። 52 ሳማሬ ቢታን ዳዒያ ኢሲ ጉታ ቢዲ፣ ኡባባ ኢያው ጊጊሳና ሜላ ኦሴ ያ ከቲሰ። 53 ሺን ኢ ቤይ ዩሩሳላሜ ጊዲያ ጊሾ ኤንቲ ኢያ ሞኪ ኤኪቦኮና። 54 ዩሱሳ ታማሬቲ ያይቆባራኔ ዮሃኒሳራ ሄሳ ቤቢዲ፡ «ሳዳው፣ ሳሎ፤ ታሚ ዋጂዲ ኤንታ ሞ ጋና ሜላ ኔ ኮያይ» ያጊደሶና። 55 ሺን ዩሱሲ ጉዩ ሲሚ ኤንታ ሃንቁቲዲ፡ «ሂንቴ ጋርሳን ኦይቤ ኦያኒ ዳዒያኮ ሂንቴ

ኤሬኬታ። አሳ ናዓይ አሴ አሻናው ዪሲፔ አቲን ጳይሳናሳ ገዴና» ያገሰ። 56 ያፔ ዳንዲዲ ሃራ ጉታ ቢደሶና።

ዩሱሳ ካሎይ ጨገሲያ ጋቲያ (ማቶ 8:19-22)

57 ኤንቲ ኦጊያራ ቢሺን፣ ኢሲ አሲ፣ «ኔ ቢያሶ ኡባ ታ ካላና» ያገሰ።

58 ዩሱሲ ዛሪዲ፣ «ዎርካናታሰ ኦሊ፣ ሳሎ ካፎታሰ ከሌ ዴዔስ፣ ሸን አሳ ናዓይ ባ ሁዒያ ሸምፒሲያሶይ ባዋ» ያገሰ።

59 ሃንኩዋኮ፣ «ኔጊ ታና ካላ» ያገሰ። ሸን ኡራይ፣ «ጎዳው፣ ኮይርታዳ ታ አዋ ዋጋዳ ያና» ያገሰ።

60 ሸን ዩሱሲ፣ «ሃይቋዳይሳቲ ሃይቋዳይሳታ ዋጋና ማላ ኤንታው አጋጋ፤ ኔጊ ባዳ ያሳ ካዎቴላ ሳባካ» ያገሰ።

61 ቃሲ ሃራ አሲ፣ «ጎዳው፣ ታ ኔና ካላና፣ ሸን ኮይርታዳ ታ ሶ አሳ ሳርላዳ ያና» ያገሰ።

62 ዩሱሲ ዛሪዲ፣ «ኮፄ ኦይኪዲ ጉዬ ጃሊያ ኦኒካ ያሳ ካዎቴላሰ ቤሴና» ያገሰ።

10

ዩሱሲ ላፑን ታማኔ ናምዑ ታማሪታ ኪቲስ

1 ሂሳፌ ጉዬ፣ ጎዳይ ሃራ ላፑን ታማኔ ናምዑ * አሳታ ዶሪስ። ኢ ባናው ቆፒዳ ካታማኔ ጉታ ኡባ ሲንሳቲዲ ባናዳ ናምዓ ናምዓ ኦሊዲ ኪቲስ። 2 ዩሱሲ ኤንታኮ፣ «ሃኮ ሺቃና ካላይ ዳር ሸን ኦሳንቸቲ ጉላ። ያኒያ ገሾ፣ ካላ ጎዳይ ኦሳንቸታ ኪታና ማላ ዋሲቲ። 3 ሃዛ፣ ቢቲ፣ ዶርሳታዳ ሱጵማታ ገዶ ሂንቴና ታኒ ዩዳና። 4 ሂንቴ ቢያ ኦጊያሰ አይኮካ አይኮፊቲ፣ ሚሼ ገዲን ካሊ ገዲን ጨማ ኦይኮፊቲ። ኦጊ ቦላ ኦናካ ሳርሶፊቲ። 5 ሂንቴ ጌሊያ ከላ ኡባ ኮይርቲዲ፣ ሳርይ ሃ ከላሰ ገዶ» ያገቲ። 6 ሳር ዶሲያ አሲ ሄ ቤሳን ዴዒኮ፣ ሂንቴ ሳርይ ያን ሸምፓና፤ ኢፃሰ ገኮ ሂንቴ ሳርይ ሂንቴው ሲማና። 7 ኦሳንቸሰ ዳሞዜ ቤሲያ ገሾ ሂንቴ ጌሊዳ ከላን ሂንቴው ሸሺዳባ ኡባ ሚሼኔ ኡዩሼ ያን ጋምዒቲ። ኢሱዋ ሶፔ ኢሱዋ ሶ ዩዮፒቲ። 8 አይ ካታማካ ሂንቴ ጌሊያ ዋዶ አሳይ ሂንቴና ሞኪዲ፣ ሂንቴው ሸሺዳባ ኡባ

9:61 1ካዎ 19:20 * 10:1 ላፑን ታማኔ ናምዑ፣ ኢሲ ኢሲ ማፃፋቲ ላፑን ታማ ጎሶና፤ ቃሲ ፓይዶ 17 ጃላ። 10:2 ማቶ 9:37-38 10:3 ማቶ 10:16 10:4 ማቶ 10:7-14፤ ማር 6:8-11፤ ሉቃ 9:3-5 10:7 1ቆር 9:14፤ 1ጊዎ 5:8

ሚቱ። 9 ሄ ካታማን ዴዲያ ሃርጋንቸታ ፓሊሹ፣ «የሳ ካዎቲላይ ሂንቴኮ ማቲስ» ያጊዲ ኦዲቱ። 10 ሺን ኢሲ ካታማ ጌሊያ ዎዴ አሳይ ሂንቴና ሞኮና ኢዲኮ ዳባባ ከዪዲ ሃይሳዳ ጊቱ። 11 ሉቃስ ቆሆ ሰላ ዴዲያ ሂንቴ ካታማ ባና ፒቶስ፣ ሺን የሳ ካዎቲላይ ሂንቴኮ ማታቲዳይሳ ኤሪቱ።» 12 ፒርዳ ጋላሳን ሃ ካታማፔ ሶዶሜ ካታማስ ፒርዳይ ካወሼ ጊዳናይሳ ታ ሂንቴው ኦዳይስ» ያጊሱ።

አማኖና ጊሾ ቦሬቲዳ ካታማታ
(ማቶ 11:20-24)

13 ካሊዲካ፣ ዩሱሲ፣ «ኔኖ ኮራዚኔ፣ ኔኖ ቤቲሳይዳ፣ አዬ፣ ሂንቴናን ኦሴቲዳ ማላታቲ ዲሮሳኒኔ ሲዶናን ኦሴቲዳኮ ያን ዴዲያ አሳይ ካሌ ማዲዲ፣ ቢዲንሳ ሰላ ኡቲዲ ቤኒ ማርታን ጌሊ አጋናሺን። 14 ሄሳ ጊሾ፣ ሂንቴፌ አሊዲ ዲሮሳሲኔ ሲዶናስ የሳ ፒርዳይ ካወያና። 15 ኔካ ቂፊርናሆሜ፣ ሳሎ ጋካናው ኔና ቶቁ አላናው ኮያይ? ኔ ዱጌ ሲያሌ ሆሌታና» ያጊሱ።

16 ቃሲካ ዩሱሲ ባ ታማሬታኮ፣ «ሂንቴና ሲዔይ ታና ሲዔስ፣ ሂንቴና ኤኮናይ ታና ኤኬና፣ ታና ኤኮናይ ታና ኪቲዳይሳ ኤኬና» ያጊሱ።

ላፑን ታማኔ ናምዓቲ ሲሚዶሶና

17 ላፑን ታማኔ ናምዑ ታማሬቲ ኪቲቲዳ ቤሳፌ ከሂ ኡፋይቲሽ ሲሚዶሶና። ዩሱሳኮ ሸቂዲ፣ «ሳዳው፣ ኔ ሱንላን ቱና አያናቲካ ኑስ ኪቲቲዶሶና» ያጊዶሶና።

18 ዩሱሲ ኤንታኮ፣ «ፃላሂይ ሳሎፔ ዎልዓንላዳ ዎዲሺን ታ ቤዓስ። 19 ሂኮ፣ ሸሻኔ ኮርኔ ዩቆና ሜላኔ ሞርኪያ ዎልቃ ዛራና ሜላ ማታ ሂንቴው አማስ። ሂንቴና ቆሃናባይ አይኮይካ ዴና። 20 ጊዶሺን፣ ሂንቴ ሱንላይ ሳሎ ማዝጋባን ፃፊቲዳ ጊሾ ኡፋይቲቴፔ ኦቲን ቱና አያናቲ ኪቲቲዳ ጊሾ ኡፋይቶፊቴ» ያጊሱ።

ዩሱሲ ባ ኡፋይሳ ቆንጨሲስ
(ማቶ 11:25-27፤ 13:16-17)

10:10 ሃ.ኦ 13:51 **10:11** ማቶ 10:7-14፤ ማር 6:8-11፤ ሉቃ 9:3-5
10:12 ሜዴ 19:24-28፤ ማቶ 10:15፤ 11:24 **10:13** ኢሳ 23:1-18፤ ሂዝ 26:1-21፤ ኢዩ 3:4-8፤ አዎ 1:9-10፤ ዛካ 9:2-4 **10:15** ኢሳ 14:13-15
10:16 ማቶ 10:40፤ ማር 9:37፤ ሉቃ 9:48፤ ዮሃ 13:20 **10:19** ማዝ 19:13

21 ሄ ዎዴ ዩሱሲ ጌሻ ኣያናን ኡፋይቲዲ፡ «ሳሉዋ ሳዓ ጎዳው፡ ሃይሳ ጨንጫታፔ ኤራንቸታፔ ጌንጻዳ ያላጋታስ ቆንጨሲዳ ጊሾ ጋላቲታ። ኤ ታ ኣዋው፡ ሃሳ ኔ ኦፋናው ሎዖ ሸኔ ጊዲሰ።

22 «ኡባባይ ታ ኣዋፔ ታው ኣሜቲሰ። ናዓይ ኦኔኮ ኣዋፔ ኣቲን ሃሪ ዎይኮ ናዓይ ቆንጨሳናው ኮዩይሳፊ ሃሪ ኦኒካ ኣዋ ኤሬይ ባዋ» ያጊሰ።

23 ካሊዲካ፡ ዩሱሲ ዲማ ባ ታማሬታኮ፡ «ሂንቲ ቤዔይሳ ቤዔይሳቲ ኣንጄቲዲይሳታ። 24 ቱማ ዲሮ ናቤቲኔ ካዎቲ ሂንቲ ቤዔይሳኔ ሲዔይሳ ቤዓናውኔ ሲዓናው ኣዎቲደሶና፡ ሺን ቤዒቦኮና፡ ሲዒቦኮና» ያጊሰ።

ቱማ ሲቆ

25 ሄኮ፡ ኢሲ ጋላስ ሙሴ ዎጋ ኤሪያ ኢሲ ኡራይ ዴንዲዲ ዩሱሳ ያጊዲ ፓጨ ኦይሾ ኦይቸሰ። «ኣስታማሪያው፡ ሜሪና ዴዑዋ ላታናው ታኒ ኣይ ኦፋ?» ያጊሰ።

26 ዩሱሲ፡ «ሙሴ ማፃፋን ፃፊቲዲይ ዎይገ? ኔ ዎታ ናባባይ?» ያጊሰ።

27 ኣዴይ ዛሪዲ፡ « ነፅ ጎዳ ኔ ያሳ፡ ኔ ኩሜጻ ዎዛናፔ፡ ኔ ኩሜጻ ሸምፑዋፊ፡ ኔ ኩሜጻ ዎልቃፊኔ ኔ ኩሜጻ ቆፋፔ ደሳ። ቃሲ ኣሴ ኔ ሾሩዋ ኔ ሁዒያዳ ደሳ» ያጊሰ።

28 ዩሱሲ ኢያኮ፡ «ኔኒ ሊኬ ዛራዳሳ፡ ኔካ ሄሳዳ ኦፋ። ኔኒ ሜሪናው ዴዖን ዳና» ያጊሰ።

29 ሺን ኡራይ ባና ዒሎ ኦፋናው ኮዩዲ፡ «ሃኖስ ኢ ታ ሾርይ ኦኔ?» ያጊሰ።

30 ኢያ ኦይሻስ ዩሱሲ ያጊዲ ዛሮ ኢሚስ፡ «ኢሲ ኣሴ ዴዔይሲ ዩሩሳላሜ ካታማፔ ዲጌ ኢያርኮ ካታማ ቢሺን ኦጌ ቦላ ፓንጋቲ ኬዩዲ ሾጨደሶና። ኢያ ማዑዋ ቃሪ ኤኪዲ ሃይቆፔኔ ፓፃፔ ጊደን ዩጊዲ ቢደሶና። 31 ጉዩፔ፡ ኣይሁዴ ካሂኔ ኢሶይ ሄ ኦጊያራ ባ ቡሱ ቢሽ ኡራ ቤዒዲ ዴሺ ጊዲ ኣጲሰ። 32 ቃሲ ኢሲ ለዌ ዴዔይሲ ሄ ቤሳ ጋኪሽ ኡራ ቤዒዲ ሃራሶራ ኣጲዲ ቢሰ። 33 ሺን፡ ኢሲ ሳማሬ ቢታ ኣሴ ዴዔይሲ ሄ ኦጊያራ ዩሽ ኡራ ቤዒዲ ኢያው ቃጴቲስ 34 ኢያኮ ሺቁዲ፡ ኢያ ማደንጻ ቦላ ዛይቲኔ ዎይኔ ቲጊዲ ቃቸሰ። ባ ሃሪያ ቦላ ኡቲሲዲ ኢማሊ ኣቁያ ኬሊ ኤፊሰ። ሄ ቤሳን ኢያው ኮሺያባ ኡባ ኦሊሰ። 35 ዎንቴሌ ናምዑ ዲናሬ ኬሲዲ ኢማላ ኬላዎስ ኢሚዲ፡ ነሃና ሃ ኡራ

10:22 ዮሃ 3:35፤ 10:15 10:25 ማቶ 22:35-40፤ ማር 12:28-34 10:27 ሉዌ 19:18፤ ዛሬ 6:5 10:28 ሉዌ 18:5 10:33 2ታሪ 28:15

ሎይላ ያለ። ታኒ ኔው ኢሚዳይሳፌ ቦላራ ኔ ኬሲያባ ኡባ ታ ኔው ጨጋና) ያገለገለ።

36 «ሂዛ፣ ሃ ሄጁ አሳታፔ ፓንጋቲ ሾጪዳ ኡራስ ሾሮቴይ ኔው ኦና ዳኒ?»

37 ኡራይ ዛሪዲ፣ «ኢያው ቃጴቲዳይሳካ» ያገለገለ።

ዩሱሲ፣ «ኔካ ባዳ ሄሳዳ ኦላ» ያገለገለ።

ዩሱሲ ማርታኔ ማይራሚ ሶን

38 ዩሱሲ ባ ታማራታራ ኦጌ ቢሼ ኢሲ ጉታ ጋኪስ። ያን ማርታ ጌቲቲያ ኢሲ ማጫሲያ ኢያ ባ ሶን ሞካሱ። 39 ኢዉካ ማይራሚ ጊያ ሚቹያ ዴዓዉሱ፣ ማይራሚ ቃላ ሲዓሼ ጎዳ ቶሁዋ ማታን ኡታሱ። 40 ሺን ማርታ ዳሮ ኦሶን ኡንዔታዳ ዩሱሳኮ ሺቃዳ፣ «ጎዳው፣ ታ ሚቹያ ኦሱዋ ታ ፃላላስ ዩጋዳ ኡታ ኣጊን ታ ዳቡሪያ ዋዳ ኔኒ ቤዓሼ ሲዒ ጋይ? ኢያ ታና ማዳና ሜላ ኦዲኪ» ያገለገለ።

41 ሺን ጎዳይ ሃይሳዳ ጊዲ ዛሪስ፣ «ማርታ፣ ማርታ፣ ኔኒ ዳሮባን ኡንዔታሳኔ ሜቶታሳ። 42 ጊደሺን፣ ኮዬቴይ ኢሲባ ፃላላ። ማይራሚ ሎፖባ ደራሱ፣ ሄሲካ ኢፔ ኤኬቴና» ያገለገለ።

11

ዩሱሲ ዋሳባ ታማርሲስ

(ማቶ 6:9-13፤ 7:7-11)

1 ኢሲ ጋላስ ዩሱሲ ኢሲ ቤሳን ዋሴስ። ዋሳ ዉርሲዳ ዋዳ ኢያ ታማራታፔ ኢሶይ፣ «ጎዳው፣ ዮሃኒሲ ባ ታማራታ ዋሳ ታማርሲዳ ሜላ ኔካ ኦና ዋሳ ታማርሳ» ያገለገለ።

2 ዩሱሲ፣ «ሃይሳዳ ያገለገሉ ዋሴቴ፡

ሳሉዋን ዴዒያ ኦ ኣዋው

ኔ ጌሻ ሱንላይ ኣንጄቶ፤

ኔ ካዋቴላይ ዮ።

3 ኦ ጋላሳ ካላ ሃቹ ሃቹ ኦስ ኢማ።

4 ኦና ቆሄይሳታ ኦኒ ኣቶ ጌይሳዳ፣

ኦ ናጋራ ኣቶ ጋ፤

ፓጩን ኦና ጌልሶፋ) ያገለገሉ» ያገለገለ።

5 ካሊዲካ፣ ዩሱሲ ባ ታማራታኮ ያገለገለ። «ሌሚሶስ ሂንቴፌ ኢሱዋስ ላጌይ ዴዒስ። ኢ ጊዲ ቢላሄ ባ ላጊያ ሶ ቢዲ፣ ታ

ላጊያው፡ ሄዡ ሶሎ ታው ታልዓርኪ። 6 ታው ላጌ ገዲዳ ኢሲ ኢሲ ኦጌፔ ዪን፡ ኢያው ኣሊያባ ሳያሰ) ያገኑ፡

7 «ኢያ ላጌይ ከላ ገደን ገዲዲ፡ ላያና ታና ዋይሶፓ፡ ወላይ ጎርዳቲሰ። ታ ናይቲካ ታራ ኣርሳ ቦላ ዚንዒደሶና። ያኒያ ገሹ፡ ዴንዳዳ ኔ ኮያባ ኢማናው ዳንዳዒኮ) ያገኛ? 8 ታ ሂንቲው ኦዳይሰ፤ ላጌቲላ ገሹ ዴንዲዲ ኢማናው ኮኖና ኢደካካ ዋሳን ሳሌሊዳ ገሹ ዴንዲዲ ኮሺያባ ኡባ ኢሜሰ።

9 «ሂሳ ገሹ፡ ታኒ ሂንቲው ኦዳይሰ፤ ዋሲቲ ሂንቲው ኢሜታና፤ ኮዩቲ ሂንቲ ዴማና፤ ካሬ ዪዲ ያጌቲ ሂንቲው ደዬታና። 10 ጋሶይካ ዋሲያ ኡባይ ኤኬሰ፤ ኮዬይ ዴሜሰ፤ ካሬ ዪዲ ያጌይሳሰ ደዬቲሰ።

11 «ሂንቲኖ፡ ኣዋቶ ሂንቲ ገደፌ ናዒ ኡይሊ ዋሲን ሹቹ ኢሜይ ኦኔ? ሞሎ ዋሲን ሹሺ ኢሜይ ኦኔ? 12 ዋይኮ ጰጰሌ ዋሲኮ ኮርኔ ኢሚ? 13 ሂንቲ ኢታታ ገዲሼ ሂንቲ ናይታሰ ሎያባ ኢሞ ኤሪኮ፡ ሳሎን ዴዒያ ሂንቲ ኣዋይ ዋሲይሳታሰ ጌሻ ኣያና ዋቲ ኣሊ ኢሜኔ?» ያገሰ።

ዩሱሳኔ ቢዔልዜቡላ

14 ኢሲ ጋሳሰ ዩሱሲ ዶና ሙሚሲዳ ቱና ኣያና ኢሲ ኡራፔ ኬሲሰ። ቱና ኣያናይ ኬዩዳ ማላ ሙሚ ኡራይ ኦዳቲሰ። ኣሳይካ ማላሌቲሰ። 15 ሺን ኢሶቲ ኢሶቲ፡ «ቱና ኣያና ሃላቃ፡ ቢዔልዜቡላ ዋልቃን ቱና ኣያናታ ኬሴሰ» ያገደሶና። 16 ሃራቲ ቃሲ ፓጩሰ ሳሎፔ ማላ ቤሳና ማላ ኮዩደሶና።

17 ሺን ዩሱሲ ኤንታ ቆፋ ኤሪዲ ኤንታኮ፡ «ዋሊ ገደን ሻኬቲያ ካዋቲሊ ኡባይ ሳዩሰ፤ ዋሊ ገደን ሻኬቲያ ኬሊ ከንዳሰ።

18 ዓላሃይ ዋሊ ገደን ሻኬቲኮ ኢያ ካዋቲላይ ዋኒዲ ሚኒዲ ኤቃኔ? ሂንቲ ታና፡ ሓ ቱና ኣያናታ ቢዔልዜቡላ ዋልቃን ኬሴሰ) ያጌታ። 19 ሂዛ፡ ታኒ ቱና ኣያና ቢዔልዜቡላ ዋልቃን ኬሲያባ ገዲኮ ሂንቲ ናይቲ ኦዳ ዋልቃን ኬሶናሻ? ሂሳ ገሹ፡ ኤንቲ ሂንቲ ቦላ ፐርዳይሳታ ገደና። 20 ሺን ታኒ ቱና ኣያናታ ያሳ ቢራዴን ኬሲያባ ገዲኮ ሂዛ ያሳ ካዋቲላይ ሂንቲኮ ማቲዳይሳ ኤሪቲ።

21 «ሚኖ ኢሲ ዳንጨቲዲ ባ ከላ ናገያባ ገዲኮ፡ ኢያ ሻሎይ ቦሼቲና። 22 ሃኖሺን፡ ኢያፔ ኣጂ ሚኖ ገዲዳ ኢሲ ዩዲ፡ ኢያ ቆሂዲ ያኒኮ ኣማኔቲዲ ዳንጨዳ ዳንጨዋ ቢሊሲዲ፡ ኢያ ሻሎዋ ቦንቁዲ ሃራሰ ሻኬሰ።

23 «ታራ ገደናይሲ ታና ኢዳሰ፤ ታራ ሺሾናይሲካ ላሌሰ።

24 «ቱና አያናይ አሳፔ ከዩዳ ዋዴ ሽምፒያሶ ኮዩዲ ሃሊ ባይናሶራ ዩዩስ። ሽምፒያሶ ቋዩዳ ዋዴ ሩታ ከዩዳሱዋ ሲማና) ያገሰ። 25 ኢ ሲሚያ ዋዴ ከላይ ፒቴቲዲ ሎዲዲ ዴዲሺን ዴሚስ። 26 ሄሳፌ ጉዩ፣ ቢዲ ኢያፔ አዲዲ ኢቲዲ ሃራ ላፑን ቱና አያናታ ኤኪዲ ዩስ። ኢያን ጌሊዲ ዲሱ ኦይኬስ። ሄ ኡራስ ኮይሮይሳፌ ጉዩይሲ አዲዲ ኢታ ገዴስ» ያገሰ።

27 ዩሱሲ ሄሳ ኦዳ ቦላ ዴዲሺን ኢሲ ማጫሲ አሳ ጋላፌ ዴንዳዳ፣ ባ ቃላ ቶቁ ኦላዳ፣ «ኔና ቶኪዳ ኡሎይኔ ኔኒ ቋሚዳ ቋንላቲ አንጃቲዶሶና» ያጋሱ።

28 ሺን ኢ፣ «አንጃቲዳይሳቲ ያሳ ቃላ ሲዲዲ ከቴቴይሳታ» ያገሰ።

ዮናሳ ማላ

29 ዳሮ አሳይ ሺቁዳ ዋዴ ዩሱሲ፣ «ሃ ዩሌቴላይ ኢታ፤ ኦራላ ማላ ኮዩስ። ሺን ዮናሳ ማላታፔ አቲን ሃሪ ኤንታው ኢሚቴና።

30 ዮናሲ ናናዌ አሳስ ማላ ገዲዳ ማላ አሳ ናዳይካ ሃ ዩሌቴላስ ማላ ገዳና። 31 ዳጌሃ ካዊያ ፐርዳ ጋላስ ሃ ዩሌቴላራ ዴንዳዳ ፐርዳና። ጋሶይካ፣ ኢያ ሶሎሞኔ ጨንጫቴላ ሲዳናው ቢታ ጋፃፔ ዴንዳዳ ያሱ። ሄኮ ሶሎሞኔፔ አዴይሲ ሃይሳን ዴዴስ 32 ናናዌ አሳቲ ፐርዳ ጋላስ ሃ ዩሌቴላራ ዴንዳዳ ኤንታ ቦላ ፐርዳና። ጋሶይካ ዮናሳ ሲብካቲያን ማርታ ጌሊዶሶና። ሄኮ፣ ዮናሳፔ አዴይ ሃይሳን ዴዴስ» ያገሰ።

አሳቴላ ፖያ

33 «ፆሞፔ ፆሞፐዲ ቆሳ ቤሳን ዋይኮ ኦቶ ገደን ዋሊያ አሲ ዴና። አሲ ፖዑዋ ቤዓና ማላ ቶቃ ቤሳን ዋሌስ። 34 ኔ አሳቴላስ ፖያይ ኔ አይፊያ። ኔ አይፊይ ሎዎ ገዲኮ፣ ኔ ኩሚላ አሳቴላይ ፖዴስ። ኔና አይፊይ ሳኪኮ ኔ አሳቴላይ ኡባይ ቋሚስ። 35 ሄሳ ገሹ፣ ኔ ጋርሳን ዴዲያ ፖያይ ቋሞና ማላ ናጌታ። 36 ሄዛ፣ ኔ ኩሚላ አሳቴላይ ፖያ ገዲኮ፣ ኔ አሳቴላንካ ሃሪ ቋማ ቤሲ ቋዩኮ፣ ኔ አሳቴላ ኩሚላይ ዋሊሌ ፖያ ማላ ገዴስ» ያገሰ።

ኡሱፑን አዩታ

(ማቶ 23:1-36፤ ማር 12:38-40)

37 ዩሱሲ ባ ኦዳ ኦንጊዳ ማላ ኢሲ ፋሪሳዌይ ባራ ካሊ ማና ማላ ያገሰ። ኢ ኢያራ ኢሲፌ ጌሊዲ ገቢራ ቦላ ኡቲስ።

11:29 ማቶ 16:4፤ ማር 8:12 11:30 ዮሃ 3:4 11:31 1ካዎ 10:1-10፤
2ታሪ 9:1-12 11:32 ዮሃ 3:5 11:33 ማቶ 5:15፤ ማር 4:21፤ ሉቃ 8:16

38 ፋሪሳዊዎች ይሁሉ ካሏ ማና፤ ሲንጹ ኩሼ ሜጮናይሳ በዓዲ ማላሌቲስ።

39 ጎዳይ አያኮ፡ «ሂንቴ ፋሪሳዊቲ ቁሊያኔ ሻቲያ ቦላ ባጋ ማጮታ። ሺን ሂንቴ ጋላይ ኡዜቴላኒኔ ኢታቴላን ኩሚስ።

40 ሂንቴኖ፡ ኤያቶ፡ ካሬ ባጋ ማዲዳይሲ ጋላ ማዲዳይ አያ ገዴኔዬ? 41 ሺን ቁሊያኒኔ ሻቲያን ዳዔይሳ ማንቆታስ አሚቴ። ሄ ዎዴ ሂንቴው ኡባባይ ጌሺ ገዳና።

42 «ፋሪሳዊቶ ሂንቴና አዬ፡ ሳዎ፤ ፃሎቴ፤ ሄሳ ማላባ፤ አስራታ ከሴታ። ሺን ዲሎቴሌኔ ያሳ ደሶይ ሂንቴናን ባዎ። ሃራታ አጎና ሃይሳታካ አላናው በሴስ፡ ሺን አገዳታ።

43 «ፋሪሳዊቶ ሂንቴና አዬ፡ አይሁዴ ዎሳ ከላን ቦንቾ ኦይዳ፡ ገያ ገደን ቦንቾ ሳርሶ ደሴታ።

44 «ማላይ ቆዩን አሳይ ኤርና ቦላራ ቢያ ዱፎ ዳኔይሳቶ ሂንቴና አዬ» ያገሰ።

45 ሂጌ አስታማሬይ ዛሪዲ፡ «አስታማሪያው፡ ኔ ሄሳ ጋሼ ኑና ጫያሳ» ያገሰ።

46 ዬሱሲ፡ «ሂንቴና፡ ሂጌ አስታማሪቶ፡ ሂንቴናካ አዬ፡ አሳይ ቶካናው ዳንዳያና ዴያ ቶሆ ቶሴታ፡ ሺን ሂንቴ ሂንቴ ሁዔስ ሃሪ አቶሺን ቢራጼ ያራካን ቦቼከታ።

47 «ሂንቴ አዎቲ ዎዲዳ ናቤታ ዱፋዎ ሂንቴ ገገሲያ ገሾ ሂንቴና አዬ። 48 ሂዛ፡ ሂንቴ አዎታ ኡሱዎ ሚንላናው ኤንቲ ዎዲዳ ናቤታ ዱፋዎ ሂንቴ ሎይሊያ ገሾ ኤንታ ኢታ ኡሱዎስ ሂንቴ ማርካ። 49 ሄሳ ገሾ፡ ያሳይ ባ ጪንጫቴላን፡ ሩቤታኔ ሃዎሬታ ታ ሂንቴው ከታና፡ ሺን ሂንቴ ባጋታ ዎዳና፤ ሃራታ ጎዳና» ያገሰ።

50 ሄሳ ገሾ፡ ሃ ዬላቴላይ አላማይ ማዲቶሳ፤ ሃሩ ጋካናው ጉኪዳ ናቤታ ኡባ ሱላስ አይሼታና። 51 አቤላ፤ ደሚዲ ያርሾ በሳሲኔ ያሳ ከላሬ ገዱዎን ጉኪዳ ዛካሪያሳ ሱላ ገሾ ሃ ዬላቴላይ አይሼታና።

52 «ሂጌ አስታማሪቶ፡ ሂንቴና አዬ፡ ኤራቴላ ቁልፊያ ሂንቴ ኩሼን አይከዳታ፡ ሺን ሂንቴው ጌሌከታ ሃራታካ ጌልሴከታ።» ያገሰ።

53 ዬሱሲ ያ፤ ባናው ከያ ዎዴ ሂጌ አስታማሪቲኔ ፋሪሳዊቲ አያራ ኤቁቲዲ አይሾን ዎይሶሶና። 54 አያ ደና፤ ከያ ቃላን አያ አይካናው ኮዩዲ ሄሳ አሊደሶና።

12

አያና ሚንጤሶ

(ማቶ 10:26-27)

1 ሄ ዎዴ ዳር ሙኩሉን ታይቤቲያ አሳይ ዎሊ ቦላ ዩዴታና ጋካናው አሲ አሳ ቦላ ሸቀዲ ዳዲሺን፣ ዩሱሲ ባ ታማሬታኮ፣ «ፋሪሳዌታ ኢርሹዋሬ ናጌቲቲ። ሄሲካ ኤንታ ጨቦቲላ።» 2 ቆንጮና ቆሴቲዲ፣ ኤሬቶና ጌሚዲ አቲያባይ አይኮይካ ባዎ። 3 ሄዛ፣ ሂንቲ ጳማን ኦዲዳባይ ኡባይ ፖግን ሲዔታና፣ ቆልዓ ጋላን ካልካሽዳባይ ዳባባን ኦዴታና።

4 «ታ ባጋቶ፣ ታ ኦዴይሳ ሲዒቲ፤ አሹዋ ዎዶሶና፤ አቲን ሃራ አይኮካ ኦላናው ዳንዳጎናይሳታሰ ባቦሬቲ።» 5 ሃናሺን፣ ሂንቲ ባባናው ቤሴይሳ ታ ሂንቲው ቆንጪሳና። ሄሲካ ዎዲዳ፤ ጌዬ ጋናማን ዩጋናው ዎልቃይ ዳዔይሳሰ ኢያው ባቢቲ። ኤ፣ ቱማ ጋይሰ፤ አያው ባቢቲ። 6 ኢቻሹ ቡቤታ ኢሲ ሳንቲሜሰ ባይዜቶኮናዬ? ሃና፤ አቲን ኤንታሬ ኢሲናካ ያሳ ሲንላን ደገቱኩ። 7 ሃሪ አቶሺን፣ ሂንቲ ሁዔ ቢናናይካ ፓይዴቲዲ ዳዔሰ። ሂዛ፣ ባቦሬቲ፤ ዳር ቡቤታ፤ ሂንቲ አዴታ።

8 «ታ ኦዴይሳ ሲዒቲ፤ አሳ ሲንላን ታው ማርካቲያ ኡባሰ አሳ ናዓይ ያሳ ኪታንቸታ ሲንላን ማርካታና።» 9 አሳ ሲንላን ታና ካዴይሳሰ ያሳ ኪታንቸታ ሲንላን ታ ኢያ ካዳና። 10 አሳ ናዓ ቦላ ካዴ ቃላ ሃሳያ ኡባይ ማርታ ዳማና፣ ሺን ጌሻ አያና ቦላ ካዴ ቃላ ኦዴቲይሲ ማሬቲና።

11 «አሲ ሂንቲና አይኪዲ አይሁዴ ዎሳ ኬላን፣ ዳይናታ ሲንላኒኔ ካዎታ ሲንላን ጎሼቺያ ዎዴ አይ ኦዳኒኮኔ ዎይጊ ዛራኒኮ ሂርጎሬቲ።» 12 ሄ ዎዴ ሂንቲ ኦዳናባ ጌሻ አያናይ ሂንቲና ታማርሳና» ያገሰ።

ዲሬ ኡራ ኤያቲላ

13 አሳ ጊድሬ ኢሲ አሲ ዩሱሳኮ ዩዲ፣ «ታ አሻይ ታው ኦ አዎ ላታ፤ ሻካና ማላ ኢያው ኦዳ» ያገሰ።

14 ዩሱሲ ዛሪዲ፣ «ላ አዲያው፣ ሂንቲ ቦላ ታና ዳይናኔ ላታ ሻኪያ ጨማ ስሊዳይ ኦኔ?» ያገሰ። 15 ቃሲካ ዩሱሲ፣ «አሳ ዳያይ ሻሎ ዳርቲላን ጊደና ጊሾ ያሬ አጊዲ ሚንጤዲ ሂንቲና ናጌቲ» ያገሰ።

12:1 ማቶ 16:6፤ ማር 8:15 12:2 ማር 4:22፤ ሉቃ 8:17 12:10 ማቶ 12:32፤ ማር 3:29 12:11 ማቶ 10:19-20፤ ማር 13:11፤ ሉቃ 21:14-15

16 ካሊዲካ ለሚሰን፡ «ጋዴይ ዳር ካሊ ኢሚያ ኢሲ ዱሬ ኡራይ ዳዔስ። 17 ሄ ኡራይ፡ ሪታ ካላ ታሊ ሺሻናው ቤሲ ጉዲዳ ጊሾ ኣይ ኦሎ?» ያጊዲ ባ ዋዛናን ቆፒስ። 18 ሂዛ፤ ያታና፤ ካሴ ዳዔያ ሻሌታ ላላዳ ሃራ ዳልጋ ሻሌታ ኬፃና። ካላኔ ታው ዳዔያባ ኡባ ኢያን ዩጋና። 19 ባ ሹምፔኮ፡ ሪታ ሹምፔቴ፡ ዳር ላይላስ ኔው ጊዲያ ሻሎ ሺሻስ። ሂዛ፡ ሹምፓዳ ማ፡ ኡያ፡ ኡፋይታ ያጋና።

20 «ሺን ያሳይ፡ ላ፡ ኤያ ኣዲያው፡ ሃቺ ቃማ ኔ ሹምፔያ ኔፔ ኤኬታዉሱ። ሂዛ፡ ኔ ሺሺዳባይ ኦዳስ ጊዳኔ?» ያጊሰ።

21 «ሂሳ ጊሾ፡ ባው ዱሬቴሲ ሳዓን ሺሺያ ኣሳስ፡ ያሳ ማታን ዱሬ ጊድና ኣሳስ ወርሴላይ ሃ ኡራይሳ ሜላ» ያጊሰ።

ኡንዔቶፊቴ
(ማቶ 6:25-34)

22 ሄሳፊ ጉዬ፡ ዩሱሲ ባ ታማሬታኮ፡ «ሂዛ፡ ታ ኡዲያባ ሲዒቴ፡ ሂንቴ ሹምፔቀስ ኣይ ሚኖ ሂንቴ ቦላስ ኣይ ማዒኖ ያጊዲ ኡንዔቶፊቴ። 23 ሹምፓይ ካላፊ ቦሊ ኣፊላፔ ኣጼስ። 24 ካፎታ ቤዒቴ ዜሮኮና፡ ኪሾኮና፡ ኤሌይካ ሻሌይካ ባዋ። ሺን ያሳይ ኤንታና ሙዜስ። ሂንቴ ካፎታፔ ዳር ኣጼታ። 25 ሃኖሺን፡ ሂንቴፊ ኡንዔቲዲ ባ ላይላ ቦላ ኢሲ ቃማ ጉጃናው ዳንዳዔይ ኦኔ? 26 ሂዛ፡ ሃ ጉላባ ኦላናው ዳንዳዎና ሂንቴ ሃራባስ ኣይስ ኡንዔቴቴ? 27 ኣኔ ጨሻቲ ዋኒዲ ዲጨያኮ ቤዒቴ። ዋዮኮናኔ ቡቆኮና። ሃሪ ኣቶሺን፡ ሶሎሞኔይ ባ ዳዔያ ቦንቾ ኡባን ኤንታፊ ኢሱዋ ሜላካ ማዒቤና። 28 ሂንቴኖ፡ ኣማኖይ ፓጨዳይሳቶ፡ ሂዛ፡ ያሳይ ሃቺ ቤንቲዲ ዋንቶ ታማን ዩጌታና ጨሻታ ሃይሳዳ ማይዚኮ፡ ሂንቴና ዋቲ ኣሊ ማይዜኔ? 29 ሂሳ ጊሾ፡ ኣይ ሚኖ ዋይኮ ኣይ ኡዩኖ ጊዲ ኡንዔቶፊቴ። 30 ሄ ኡባስ ያሳ ኣማኖና ኣሳቲ ኡንዔቶሶና። ሺን ሂንቴ ኣዋይ ያሳይ ሄሲ ኡባይ ሂንቴው ኮሹይሳ ኤሬስ። 31 ኡባፊ ኣሊዲ ያሳ ካዋቴላ ኮዩቴ ሄሲ ኡባይ ሂንቴው ጉጃ ኢሜታና።

32 «ሂንቴኖ፡ ጉላ ዳሬቶ፡ ያዮፊቴ፤ ሂንቴ ኣዋ ያሳይ ካዋቴላ ሂንቴው ኢማናው ኡፋይቴስ። 33 ሂንቴው ዳዔያባ ባይዚዲ ማንቆታስ ኢሜቴ። ካይሶይ ኤኮናሶን፡ ቢሊ ሞናሶን፡ ጨሞና ካርዒታን፡ ወርና ሻሉዋ ሳሉዋን ሺሺቴ። 34 ሂንቴ ዋዛናይ ሂንቴ ሻሎይ ዳዔያሱዋን ጊዳና።

ባርኪዲ ናሳ

35 «ቃንሳን ዳንጩዲ ገቢቲቲ፤ ሂንቲ ፆሞፔይ ፖሊዳይሳ ገደ። 36 ባንታ ጎዳይ ያጋኖፔ ሰማና ጋካናው ባርኪዲ ናገይሳታዳ፣ ጎዳይ ዪዲ ፃጊያ ዎዴ ኤሌሲዲ ደያናው ገጊዳ አሳታ ዳኒቲ። 37 ባንታ ጎዳይ ሰሚያ ዎዴ ጲስኮና ዳዒሾ ናገይሳቲ አንጃቲዳይሳታ። ቱማ ጋይሰ፤ ጎዳይ ቃንሳን ዳንጩዲ ጋይታ ዩሹዋን ኡተሲዲ ሞኬሰ። 38 ጎዳይ ላዴ ገዲን ገዲ ቢላሄ ገዲን ዎይኮ ዎንቲማሌ ገዲን ዪዲ፣ ሄሳ ማላ ጲስኮና ናገሺን ዳሚያ ሄ አይሌቲ አንጃቲዳይሳታ። 39 ሺን ሃይሳ ኤሪቲ፤ ካይሶይ አዉዴ ያኔኮ ኬላዋይ ኤሪያኮ ኬላይ ቦኬቲያ ዎዴ ሰዒ ገዲ ቤዔና። 40 ሃንቴካ ገጊዲ ናገቲ፤ አሳ ናዓይ ሃንቲ ቆፖና ዎዴ ያና» ያገሰ።

41 ጲዒርሲካ፣ «ጎዳው ሃ ለሚሱዋ ኑ ፃላላሰ ኑዳዬ ዎይኮ አሳ ኡባሴ?» ያገሰ።

42 ጎዳይ ዛሪዲ፣ «ሂዛ፣ ካላ ሙዛናው ቤሲያ ዎዲያን አማና ማላ ጎዳይ ባ አይሌታ ቦላ ሹሚዳ አማንሌይሲኔ ዎዛናማ ሃላቃይ ኦኔ? 43 ጎዳይ ሰሚያ ዎዴ ሄሳ ማላ ኦሲሾ ቤንቲያ አይሌይ ኢ አንጃቲዳይሳ 44 ታ ሃንቲው ቱማ ኦዳይሰ፤ ባ ጎዳሰ ዳዒያ ሻሎ ኡባ ቦላ ኢ ሹሚታና። 45 ሺን ሄ አይሌይ፣ ታ ጎዳይ ኤሌ ዬና» ያገዲ ባ ዎዛናን ቆፒዲ፣ ማጫ አይሌታኔ አዴ አይሌታ ዎዲኮ፣ ቃሲ ባው ኮዩዳ ማላ ሚሼኔ ኡዪሾ ማላቲኮ፣ 46 ሄ አይሌያ ጎዳይ ኢ ቆፖና ጋላሳኔ ሂርጎና ዎዴ ያና። ዪዲ ኢያ ቃንፃሬላዲ፣ ኢያ ቃዳ አማኖና አሳታራ ኦላና።

47 «ጎዳ ሹኒያዳ ገሳናይሲኔ ኢያ ጎዳይ አይ ዶሲያኮ ኤሪሾ ኦላና አይሌይ ዳር ጋራፊታና። 48 ሺን ባ ጎዳ ሹኒያ ኤርና ኦቲዲ ጋራፊታናው ቤሴይሳ ኦላዳይ ጉላራ ጋራፊታና። ጋሶይካ ዳር አሜቲዳይሳፊ ዳር ኮዬቲሰ፣ ዳር ሃዳራ ኤኪዳይሳፊካ ዳር አማና ገዲ ናገቲሰ።

ሳርቴላሰ ገደናሺን ሻኬቲላሳ
(ማቶ 10:34-36)

49 «ታኒ ዪዳይ ቢታ ቦላ ታማ ኦይላናሳ። ሃዒ ታማይ ኦይኪያኮ ታና ዋቲ ኡፋይሳንዴሻ! 50 ሃኖሺን፣ ታ ሃዒ ፃማቄቲያ ፃንቃቲይ ዳዔሰ። ኢ ፖሌታና ጋካናው ታ ዳር ኡንዔታይሰ። 51 ሳዓ ቦላ ሳርቴላ ኤሃናው ዪዳ ሃንቲው ዳኒ? ገደና፣ ታ

12:35 ማቶ 25:1-13 12:36 ማር 13:34-36 12:39 ማቶ 24:23-44
12:50 ማር 10:38

ዩዳይ ሻካናሳ። 52 ሃዲፌ ደሚዲ ዋሊ ጊደን ሻኬቲዳ ኢቻሹ ኬላ ኣሳቲ ኢሲፌ ዴዎሶና። ናምዓቲ ሃቕታ ቦላ። ሃቕቲካ ናምዓታ ቦላ። ዴንዲዲ ሻኬቶሶና። 53 ኣዋይ ናዓ ቦላ። ናዓይካ ኣዋ ቦላ። ኣያ ናዔ ቦላ። ናዔያ ኣዬ ቦላ። ኣዚና ኣያ ናዓ ማቹ ቦላ። ናዓ ማቹያ ኣዚና ኣዬ ቦላ። ዴንዲዲ ሻኬታና።»

ላይላታ ማሎ
(ማቶ 16:2-3)

54 ቃሲካ ኣሳኮ። «ወሎሃ ባጋራ ሳሎይ ሻራቲያ ዎዴ ቤዒዲ። ኤሌሲዲ። (ኢሪ ያና) ያጌታ። ሃሳዳካ ሃኔሰ። 55 ዲጌሃ ጫርኮይ ጫርኪያ ዎዴ (ሳዓይ ኣዋና) ያጌታ። ሃሳዳካ ሃኔሰ» ያጌሰ። 56 ሂንቴና። ጨቦቶ። ሳሎባኔ ሳዓባ ሻኪ ኤሬታሺን ሃ ዎዲያ ሻኪ ኤርይ ሂንቴና ዋኒዲ ያኒዴ?»

57 «ያቲን። ሂንቴ ሁዔሰ ኣይሰ ቱማ ፐርዴኬቲ? 58 ኔ ሞርኪያራ ዎላ ዳይና ሲንፋን ኤቃናው ባሹ ኦኔ ቦላ ጊጋናው ኮያ። ኔ ገሳና ኢዳኮ ሳሹቹዲ ዳይና ሲንፋ ኔና ኤፋና። ዳይናይ ኔና ፖሊሴስ ኣላ ኣማና። ኢ ኔና ዎይኔን ዩጋና። 59 ሲዒቴ። ኢሲ ባካኒ ኣቶና ጨጋ ኦንጋና ጋካናው ኔ ያፔ ኬዮናይሳ ኤራ» ያጌሰ።

13

ናጋራፔ ሲሞ

1 ሄ ዎዴ ዬሱሳኮ ኣሳይ ዩዲ ጲላዎሲ ዎዲዲ ኤንታ ሱፋራ ኤንታ ያርሹዎ ዋላኪዳ ጋሊላ ኣሳባ ኦዲዳ ኣሳቲ ሄ ቤሳን ዴዎሶና። 2 ኢ ሃይሳዳ ያጌዲ ዛሪሰ፤ «ያቲን ሄ ጋሊላ ኣሳቲ ሄ ኢታ ሃይቆ ሃይቂዳ ገሹ ጋሊላን ዴዒያ ኣሳ ኡባፌ ኣዲዳ ናጋራንቹ ዳናና? 3 ጌዴና! ጌደሺን። ሂንቴካ ማርታን ሲሞና ኢዳኮ። ኡባይ ሃሳዳ ዳያና። 4 ዎይኮ ቃሲ ሳሊሆሜ ጊያ ቤሳን ገሞቤይ ዎዲዲ ዎዲዳ ታማኔ ሆሰፑን ኣሳይ ዬራሳላሜን ዴዒያ ኣሳ ኡባፌ ኣዲዳ ናጋራንቹ ዳናና? 5 ጌዴና! ሺን ሂንቴካ ማርታን ሲሞና ኢዳኮ ኡባይ ሃሳዳ ዳያና።»

6 ቃሲካ ዬሱሲ ሃይሳዳ ጊዲ ለሚሶ ኦዲሰ። «ኢሲ ኡራሰ ዎይኔ ጋዴን ቶኬቲዳ ሳላሴ ሚሊያ ዴዓዉሱ። ኢ ኢፔ ኣይፌ ኮዩ ዩዲ ኣይኮካ ዴሚቤና። 7 ጋዲያ ሳዳይ ዎይኔ ኣሳንቹዎኮ። (ኣይፌ ዴማናው ኮያዳ ሂቭ ላይላ ሲሜሬታዳ ኣይኮካ ዴማቢኬ። ሃሳ ገሹ። ቃንፃ ዲጋ፤ ኣይሰ ቢታ ሜሊሳይ?) ያጌሰ።

12:53 ሚክ 7:6

8 «ሺን ኦሳንቸይ፣ ሳዳው፣ ኢ ዩሹዋ ኦላዳ ኦሻ ዩጋና ጋካናው ሃ ላይላሰ ኦጋርኪ። 9 ሃ ላይላ ኦይፊኮ ሎዎ፣ ኢደኮ ቃንፃ ኦጋ) » ያጊዲ ዛሪስ።

ዘኮ ኩኒዳ ማጨሲያ ፓፃሱ

10 ዩሱሲ ሳምባታ ጋላሰ ኦይሁዳ ዋሳ ኬላን ታማርሴስ። 11 ሄ ቤሳን ታማኔ ሆሰፑን ላይላ ቱና ኦያኒ ዘኮ ኩኒሲዳ ኢሲ ማጨሲያ ዳዓዉሱ። ኢያ ኩናፔ ዳንደይሳን ሱሬ ኤቃናው ዳንዳዑኩ። 12 ዩሱሲ ኢዮ ቤዒዳ ዋዳ ያጊዲ፣ «ሃ ማጨሴቲ፣ ኔ ሃርጊያፌ ፓፃዳሳ» ያጊሰ። 13 ባ ኩሺያ ኢ ቦላ ዋሊን፣ ኢያ ሶሁዋራ ሱራዳ ኤቃሱ። ያሳካ ጋላታሱ።

14 ሺን ኦይሁዳ ዋሳ ኬላ ሃላቃይ ዩሎቲዲ ኦሳኮ፣ «ኦሶ ኦሊያ ኡሱፑን ጋላሳቲ ዳዎሶና። ሄሳ ጊሹ፣ ሄ ጋላሳታን ዩዲ ፓፃቲፔ ኦቲን ሳምባታ ጋላሰ ጊዳና» ያጊሰ።

15 ሳዳይ፣ «ጨቦቶ፣ ሂንቲ ጊደፌ ቦሪ ዋይኮ ሃሬ ሳምባታ ጋላሰ ዛዳሎፔ ቢሊዲ ሃሌ ኡሻናው ኤፎናይ ኦኔ? 16 ያቲን፣ ሃ ማጨሲያ ኦብራሃሜ ናዓ ጊዳሼ ፃላሂን ቃሼታዳ ታማኔ ሆሰፑን ላይላ ኩሜላ ዳዒዳሪሰ ሳምባታ ጋላሰ ቢርሼቲላ ኮሼኔ?» ያጊዲ ኦይቸሰ።

17 ኢ ሄሳ ኦዲዳ ዋዳ ኤቁቲይሳቲ ኡባይ ዩላቲደሶና። ሺን ኦሳ ኡባይ ኢ ኦሊዳ ማላሊሲያ ኦሶ ኡባን ኡፋይቲደሶና።

18 ሄሳፌ ጉዬ፣ ዩሱሲ ሃይሳዳ ያጊሰ፣ «ዎሳ ካዋቲላይ ኦይ ዳኒ? ኢያ ኦይቢራ ዳኒሶ? 19 ዎሳ ካዋቲላይ ኢሲ ኦሲ ባ ጎሻን ቶኪዳ ዋላ ኦይፌ ሜላ። ኢ ዲጨዲ ሚላ ጊዲሰ። ሳሎ ካፎቲ ኢያ ታሺያ ቦላ ሸምፒደሶና።

20 ቃሲ፣ «ዎሳ ካዋቲላ ኦይቢራ ዳኒሶ? 21 ኢሲ ማጨሲያ ዳር ጳሌራ ዋላካዳ ሙኑቂዳ ጉላ ኢርሾ ዳኔስ» ያጊሰ።

ፀንሳ ዉላ

22 ሄሳፌ ጉዬ፣ ዩሱሲ ዩሩሳላሜ ቢሼ ኢ ካንሌያ ኦጊያን ዳዒያ ካታማታኒኔ ጉታታን ታማርሲሼ ኦጲስ። 23 ኢሲ ኦሲ ዩሱሳኮ፣ «ሳዳው፣ ኦታናይ ጉላ ኦሳ ፃላሌ?» ያጊዲ ኦይቸሰ።

ዩሱሲ ኤንታኮ፣ 24 «ሲዒቲ፣ ፀንሳ ዉላራ ጌላናው ባፃቲቲ። ዳርቲ ጌላናው ኮዮሶና ሺን ኤንታው ሃኔና። 25 ኬላዋይ ዳንዲዲ ዉላ ጎርዲዳፔ ጉዬ ሱሰ ደያርኪ» ያጊሼ ካሬን ኤቁዲ ያሲ ኦይኬታ። ሺን ኢ፣ «ሂንቲ ኦኔኮኔ ኦዉፔ ዩዳኮ ታ ኤሪኮ» ጊዲ

ዛራና። 26 ሄ ዎዴ ሂንቴ፣ ሳራ ዎላ ሚዳ፣ ኡዩዳ፣ ኑ ዳባባንካ ታማርሳዳሳ) ያጋና።

27 «ኢ ዛራዲ፣ ሳሂንቴ ኦኮኮኔ ኣወፔ ዩዳኮ ኤሪኬ። ሂንቴና፣ ጌላቶ ታፔ ሃኪቴ) ያጋና። 28 ኣብራሃሜ፣ ዩሳቃ፣ ያይቆባኔ ናቤታ ኡባ ያሳ ካዎቴላን ቤዓና፣ ሺን ሂንቴ ካሬን ዎዲዲ ኣቲያ ዎዴ ሂንቴው ዩሆኔ ኣቶ ጋርጬፎሊ ጊዳና። 29 ኣሳይ ዶሎሃፔ፣ ወሎሃፔ፣ ፑዴሃፔኔ ዲጌሃፔ ዩዲ ያሳ ካዎቴላን ጊቢራ ቦላ ኡታና። 30 ሂሳ ጊሾ፣ ሃዒ ዴላን ጉዬ ጊዲዳይሳታፔ ሲንሌ ጊዳናይሳቲ፣ ሲንሌ ጊዲዳይሳታፔ ጉዬ ጊዳናይሳቲ ዴዎሶና» ያጊሱ።

ዩሱሲ ዩሩሳላሜስ ዩኪሰ
(ማቶ 23:37-39)

31 ሄ ዎዴ ፋሪሳዊታፔ ኢሶቲ ኢሶቲ ዩዲ፣ «ሄሮዲሲ ኔና ዎዳናው ኮያ ጊሾ ሃ ቤሳፌ ዴንዳዳ ባ ጊደሶና።

32 ኢ ዛራዲ፣ «ቢዲ፣ ሄ ዎርካናሰ ሄኮ፣ ሳሃቲኔ ዎንቶ ቱና ኣያናታ ኬሳና፣ ሃርጋንቾታ ፓላና፣ ሄቫንላ ጋላሳን ኩቫ ቦላ ጋካና) ያጊሰ ጊቴ። 33 ሃናፔ ኣቲን፣ ናቤይ ዩሩሳላሜፔ ካሬን ሃይቃናው ቤሴና። ሂሳ ጊሾ፣ ሃቶ፣ ዎንቶኔ ዎንቲ ፔዒን ሄ ቤሳ ባናው ዴንዳሰ።

34 «ዩሩሳላሜ፣ ዩሩሳላሜ፣ ናቤታ ዎዲያሬ፣ ኔኮ ኪቴቲዳይሳታ ሹቻን ጫዲያሬ፣ ኩቶይ ባ ናይታ ባ ቄፊያፔ ጋርሳን ሺሺያዳ ኔ ናይታ ታ ቄሲያፔ ጋርሳን ኣፑን ቶሆ ሺቫናው ኮያዲና፣ ሺን ሂንቴ ኢፃሰ ጊዴታ። 35 ታ ሂንቴው ኡዳይሰ፤ ሂንቴ ኬላይ ካይሳታና። ጎዳ ሱንላን ዩይሲ ኣንጄቲዳይሳ ሂንቴ ጋና ጋካናው ታና ዴሜኬታ» ያጊሱ።

14

ዩሱሲ ፋሪሳዊያ ሶን

1 ኢሲ ሳምባታ ጋላሰ ዩሱሲ ኢሲ ፋሪሳዊታ ሃላቃ ሶ ካላ ማናው ጌሊያ ዎዴ ኣሳይ ጫዲ ያሎሶና። 2 ሄ ቤሳን ሻዉሄ ሃርጌን ዎዬቲያ ኢሲ ኣሲ ኢያው ሲንላ ባጋራ ዚንዒሰ። 3 ዩሱሲ ፋሪሳዊታኮኔ ሂጌ ኣሰታማሬታኮ፣ «ሳምባታ ጋላሰ ሃርጋንቾ ፓሶይ

13:27 ማዘ 6:8 13:29 ማቶ 8:11-12፤ 22:13፤ 25:30 13:30 ማቶ 19:30፤ 20:16፤ ማር 10:31 13:35 ማዘ 118:26፤ ኤር 22:5

ዋጌዬ ዋጋ ገዳኔ?» ያገዱ አይቺሱ። 4 ከንቲ ሲዒ ገደሶና።
ዩሱሲ ሃርጌቲያ ኡራ ቦቺ ፓሊዲ ሞይዚሱ።

5 «ቃሲካ ሂንቴፌ ኢሱዋስ ናዒ ዋይኮ ቦሪ ሳምባታ ጋላስ
አፎን ዉሊኮ ኤሌሲዲ ኬሶናይ ኦኔ?» ያገዱ አይቺሱ። 6 ከንቲ
ኢሲባካ ዛራናው ዳንዳዒቦኮና።

7 ዩሱሲ አማቱዋስ ጭቲዳይሳቲ ቦንቾ ቤሲ ዶሪሺን ቤዒዲ፥
ሃ ለሚሱዋ ኦዲሱ። 8 «ኢሲ አሲ ኔና ያጋኖ ጭገኮ ቦንቾ ቤሳን
ኡቶፋ። ኔፔ አጁ ቦንቾቲያ አሲ ጭታናው ዳንዳዒሱ። 9 ሂንቴና
ናምባታካ ጭቲዳይሲ ዩዲ፥ ሳይ ቤሳ ሃ አማላስ ዩዲ) ያገያ ዋይ
ኔ፤ ዩላታሼ ዚቃ ቤሲ ዋቆሳ። 10 ገደሺን፤ ኔ ጭቲዳ ዋይ
ኮይርታዳ ዚቃ ቤሲ ቤዓዳ ኡታ። ጭቲዳ ዩዲ፥ ሳታ ላገያው፥
ሃ ቦንቾ ቤሳን ኡታ» ያጋና። ሄ ዋይ ኔራ ኢሲፌ ጭቲዳ አሳ ኡባ
ሲንላን ኔ ቦንቾታና። 11 ባና ቶቁ ቶቁ አሊያ ኡባይ ካዉያና፤ ባና
ዚቁ ዚቁ ኦሊያ ኡባይ ቶቁ ቶቁ ጋና።»

12 ቃሲ ዩሱሲ ኢያ ሞኪዳ ኬፋ አዋኮ፥ «ቁማ ዋይኮ ካሆ
አማቶ ጭገያ ዋይ ኔ፤ ኩሼ ዛር ጭገና ሚላ ኔ ላጌታ ዋይኮ
ኔ አሻታ ዋይኮ ኔ ዳቦታ ዋይኮ ኔ ዲሬ ሾርታ አማቶ ጭገ።
13 ገደሺን፤ ኔ አማቶ ገገሲዳ ዋይ ማንቆታ፥ ዋቤታ፥ ጉንዳታኔ
ቆቂታ ጭገ፤ ኔ፤ አንጄታና። 14 ሃይሳቲ ኩሼ ዛራናው ዳንዳዳና
ገሾ ኩሼ ዛርይ ጌሻታ ዳንዶ ጋላሳን ኔው ሲማና» ያገሰ።

ጌታ አማቱዋ
(ማቶ 22:1-10)

15 ዩሱሳራ ዋላ አማቶ ቦላ ኡቶይሳታ ገደፌ ኢሶይ ሄሳ
ሲዒዲ፥ «ዎሳ ካዋቲላን አማቶ ቦላ ኡቲይሲ አንጄቲዳይሳ»
ያገሰ።

16 ዩሱሲ፥ «ኢሲ አሲ ጌታ አማቶ ገገሲዲ ዳር አሳታ ጭገሱ።
17 አማቶይ ሞኬቲያ ሳቲይ ገኪያ ዋይ ጭቲዳ አማላታ፥ ሳኮ
ኡባባይ ገገሱ፥ ሃ ዩቲ) ያገዱ ጭገናዳ ባ አይሊያ ከቲሱ።

18 «ሺን ኡባይካ ባንታ ጋሶ ጋሶ ሜጁደሶና። ኢሶይ፥ ሳሃ
ቡር ጋይ ሻሚዳ ገሾ ባዳ ቤዓናው ኮሽስ ሃያና ታና አጋርኪ
ያጋ) ያገሰ። 19 ሃንኮይ፥ ሳታቾ ዋላ ቦሪ ሻማስ ኤንታና ዋዎ
ቤዓና ገሾ ሃያና ታና ላንጮፋ) ያገሰ። 20 ቃሲ ሃራይ፥ ሳኮ ቡር
ሜዳን ዳዒያ ገሾ ያናው ዳንዳዒኬ) ያገሰ።

21 «አይሌይ ሲሚ ዪዲ ሄ ኡባ ባ ጎዳሰ ኦዲሰ። ሄ ዋዴ ያጋኖ አዋይ ሃንቁቲዲ አይሊያኮ፣ ለኤሌሳዳ ካታማን ዴዲያ ዋጋ ኔጌታኔ ዳጋላታ ባዳ፣ ማንቆታ፣ ዋቤታ፣ ቆቄታኔ ጉንዳታ ሃ ኤሃ» ያገሰ።

22 «አይሌይ፣ ታ ጎዳው፣ ኔ ከቲዳይሲ ኡባይ ፖሌቲስ፣ ሺን ሃዳካ ቤሲ ዴዴሰ» ያገሰ።

23 «ጎዳይ አይሊያኮ፣ ለሆርጋታ ቦላኔ፣ ጋዴ ጊዶ ኦጌታ ኬያ፣ ታ ከላይ ኩማና ጋካናው ዴሚዳ ኡባ ያና ሜላ ኦላ። 24 ታ ሂንቲው ኦዳይሰ፤ አማቶቲዳይሳታፔ ኦኒካ ታ ጊቢራፔ ሞናይሳ ኤሪቴ» ገሰ።

ጎዳ ካሎይ ያርሺሴስ

25 ዳር አሳይ አያራ ዋላ ቢሺን ዩሱሲ ኤንታኮ ጉዬ ሲሚዲ፣
26 «ታኮ ያ ኡባይ ባ አዋኔ ባ አዪው፣ ባ ማቺውኔ ባ ናይታ፣ ባ አሻታኔ ባ ሚቹታ፣ ሃሪ አቶሺን ባ ዴዐቀ ኢያናይ ታ ታማሪ ጊዳናው ዳንዳዔና። 27 ባ ማሰቃሊያ ቶኪዲ ታና ካሎናይ ታ ታማሪ ጊዳናው ዳንዳዔና።

28 «ሂንቴፌ አሲ አሲ ሹቻ ከሌ ከፃናው ኮይኮ፣ ከላ ከፂዲ አንጋናው አይ ሜላ ሚሹ ኮሺያኮ ኮይርቲዲ ኤራናው ቆፒ ቤያናይ ኦኔ? 29 ሄሳ ጊዶና ኢዲኮ፣ ሃ ኡራይ ባሶ ሹቻ ሂዲን ቁሰቴሌ ያኒኮ፣ 30 ቤዲያ ኡባይ፣ ሃ ኡራይ ገምቤሌ ኦይከን ቁሰታናው ኢያ ያኒሰ» ያገዲ ቦርሶና።

31 «ዋይኮ አሲ ካዋይ ሃራ ካዋራ ኦሌታናው ዳንዲሽ ላታሙ ሙኩሉ ኦላንቸታ ኤኪ ያ ካወዋራ ታሙ ሙኩሉ ኦላንቸታራ ኤቄታናው ዳንዳዓናይሳኔ ዳንዳያናይሳ ኡቲዲ ዘራቶናይ ኦኔ?
32 ኤቄታናው ዳንዳዔቶናባ ጊዲኮ፣ ሄ ሃራ ካወዋራ ሃሆን ዴዲሺን ጊጋናው ኮይርቲዲ ጨማ ዩዲዲ ኦይቹሰ። 33 ሄሳዳካ፣ ሂንቴፌ ኦኒካ ባው ዴዲያባ ኡባ አጎና ኢዲኮ ታ ታማሪ ጊዳናው ዳንዳዔና።

34 «ማዲኔይ ሎዖ፣ ሺን ማዲኔይ ባ ማልዑዋ አገኮ፣ ዋኒዲ ማዲኔ ጌቲታናው ዳንዳዒ? 35 ቢታቴላሰካ አራዳቴላሰካ ማዶናባ ጊዲያ ገሾ ዋራ ዩጌቴሰ። ሂዛ፣ ሲዲያ ሃይሌ ዴዲያ አሲ ሲዖ» ያገሰ።

15

ጳጳሩ ደርሳ

(ማጥ 18:12-14)

1 ኢሲ ጋላስ ቃራፃ ቃንጻይሳተኔ ናጋራንቸቲ ዩሱሳ ተሚርቲያ ሲጻፍው ኢያ ዩሹዋን ሸቂደሶና። 2 ሺን ፋሪሳዌቲኔ ሂጌ አስታማራቲ፣ «ሃይሲ ኡራይ ናጋራንቸታ ሸሺዲ ኤኬስ፣ ኤንታራ ኢሲፌ ሜስ» ያጊዲ ዙዙሚደሶና።

3 ዩሱሲ ያጊዲ ሃይሳ ለሚሶ ኤንታው ኦዲስ፣ 4 «ሂንቲ ጊደፌ ኢሱዋስ ጻቱ ደርሳቲ ዳዒያባ ጊዲኮ ኤንታፌ ኢሶይ ጳጳሱ ኡዲፋን ታማኔ ኡዲፋናታ ባዘን አጊዲ ጳዮይሳ ዳማና ጋካናው ኮዮናይ ኦኔ? 5 ዳሚዳ ዋዴ ኡፋይቲዲ ባ ጋናን ቶኪዲ፣ 6 ባ ሶ ሲሜስ። ባ ላጌታኔ ሾርታ ኢሲፌ ጻጊዲ፣ ጳጳሩ ታ ደርሳ ዳማስ፣ ታራ ኢሲፌ ኡፋይቲቲ» ያጌስ። 7 ሄሳዳካ፣ ማርቲ ኮሾና ኡዲፋን ታማኔ ኡዲፋን ጻሎታፔ አሊዲ ማርታን ጌሊያ ኢሲ ናጋራንቸታ ጋሶን ሳሎን ጌታ ኡፋይሲ ጊዳስ።

8 «ዋይኮ ታሙ ቢሪ ዳዒያ ኢሲ ማጫሲያ ታማፌ ኢሲያ ጳጳሱ ዳማና ጋካናው ያሞፔ ኦይላዳ ኬላ ፒታዳ ሚንላ ኮዮናራ ኦኔ? 9 ዳሚዳ ዋዴ ባ ላጌታኔ ባ ሾርታ ጻጋዳ ጳጳሩ ታ ኢሲ ቢራ ዳሚዳ ጊሾ ታራ ኡፋይቲቲ» ያጋወሱ። 10 ሲዒቲ፣ ሄሳ ሜላ ኢሲ ማርቲላን ጌሊያ ናጋራንቸታን ያሳ ኪታንቸታ ሲንላን ኡፋይሲ ጊዳስ» ያጌስ።

ጳጳሩ ናዓ

11 ዛሪዲ ዩሱሲ፣ «ኢሲ ኡራስ ናሞዑ ናይቲ ዳዖሶና። 12 ኤንታፌ ካሎ ናዓይ ባ አዋኮ፣ ታ አዋው፣ ኔ ሻሉዋፔ ታ ጊሹዋ ታው አማ» ያጌስ። አዋይ ባ ሻሉዋ ባ ናይታስ ሻኪስ። 13 ጉላ ጋላሳፔ ጉዬ ካሎ ናዓይ ባ ጊሹዋ ኡባ ቃቺ ኤኪዲ ሃሆ ቢታ ቢስ። ያን አልታጫን ሻሉዋ ቶቺዲ ኦንጊስ። 14 ኢ ባው ዳዒያባ ኡባ ወርሲዳፔ ጉዬ ሄ ቢታ ኡባን ሚኖ ኮሺ ኬዩን ሜቶቲስ። 15 ሄሳ ጊሾ፣ ሄ ቢታ አሳፔ ኢሱዋ ሶ ጋታ ጌሊስ። ኡራይ ኢያ ጉዲንላ ሄማና ሜላ ባ ሞላ ዩዲስ። 16 ጉዲንላቲ ሚያ ሃርቁዋፌ ማናው አሞቲስ፣ ሺን ኢዮካ ኢያው አሚያ አሲ ቤንቲቤና። 17 ዋዛኒ ሲሚን፣ ሳፑን ታ አዋ አይሌታስ ካሊ ዋራ ዋጲን ታ ሃይሳን ኮሻራ ሃይቃናው ጋካዲና? 18 ዳንዳዳ ታ አዋኮ ባዳ፣ ታ አዋው፣ ሳሎን ያሳ፣ ሳዓን ኔና ቆሃስ። 19 ሂዛፔ

ኔ ናባ ጌቲታዳ ጭታናው ታው ቤሶና ጊሾ ኔ ሶን ደዒያ አይሌታፔ ኢሱቀዳ ታና ፓይዳ) ያጋና» ያገሰ። 20 ሄሳ ጊሾ፣ ዴንዲዲ ባ አቀኮ ቢሰ።

«ሃኖሺን፣ ኢ ቡሮ ሃሆን ደዒሺን አቀይ ቃጴቲዲ፣ ኢያኮ ዋዒ ቢዲ ኢዲሚዲ ዬሪሰ። 21 ናባይካ፣ ታ አቀው ሳሎን ያሳ፣ ሳባን ኔና ታ ቆሃሰ። ሂዛፔ ኔ ናባ ጌቲታዳ ጭታናው ቤሲኬ) ያገሰ።

22 «ኢያ አቀይ አይሌታ ጭታዲ፣ ሳሌሲዲ ኡባፌ ሎዎ ጊዲዳ ማዎ ኡሂዲ ኢያ ማይዚቲ፤ ኢያ ቢራጴን ሳጋዮ፣ ኢያ ቶሁዋን ጫማ አሊቲ። 23 ሞጶ ጋታርሜንሶ ኡሂዲ ሹኪቲ፣ ሞሰ፣ ኡፋይቶሰ። 24 ታ ናባይ ሃይሲ ሃይቂሰ፣ ሺን ሃዒ ፓዒሰ፤ ጳይሰ፣ ሺን ቤንቲሰ) ያገሰ። ሄሳፌ ጉዬ፣ ኡፋዬቴሊ ኦይኪዶሶና።

25 «ሄ ዋዳ ባይራ ናባይ ሳሻ ጋዴን ደዒሰ። ያፔ ዩሼ ሶ ማቲሺን ዬሊኔ ጉፋ ገርሲ ሲዒሰ። 26 ኢ፣ አይሌታፔ ኢሱቀ ጭታዲ ሃኒያባይ አይቤኮ ኤራናው ኦይቺሰ። 27 አይሌይ፣ ሳ ኢሻይ ሳሮ ዩዳ ጊሾ ኔ አቀይ ሞጶ ጋታርሜንሶ ኢያው ሹኪሰ) ያገሰ።

28 «ባይራ ኢሻይ ዩሎቲዲ ሶ ጌላናጫካ ኮዩቤና። አቀይ ካሬ ኬዩዲ ሶ ጌላና ማላ ኢያ ዋሲሰ። 29 ሺን ኢ ባ አቀኮ፣ ሳኮ፣ ሃይሳ ማላ ላይሊ ታ ኔው አይሌታዳ ኔ ኪታፔ ኢሱቀካ ፓጪሶና ኔው ኪቲቲን ታ ታ ላጌታራ ኡፋይታና ማላ ሃሪ አቶሺን ኢሲ ላቃ ዴሼ ኢማባካ። 30 ሃኖሺን፣ ሃይሲ ኔ ናባይ ኔ ሻሉቀ ላይማታራ ደሚሲዲ ዩን ሞጶ ጋታርሜንሶ ሹካዳሳ) » ያገሰ።

31 «አቀይካ፣ ታ ናባው፣ ኔኒ ኡባ ዋዳ ታራ ደዒሳ፣ ታባይ ኡባይ ኔሳ። 32 ሃይሲ ኔ ኢሻይ ሃይቂሰ፣ ሺን ፓዒሰ፤ ጳይሰ፣ ሺን ቤንቲሰ። ሄሳ ጊሾ፣ ዳሮ ኡፋይታናው ቤሲሰ) ያጋና» ያገሰ።

16

አማኔቶና ሹማ ለሚሶ

1 ዬሱሲ ባ ታማሬታኮ፣ «ኢሲ ዱሬ ኡራሰ ኢያፔ ጋርሳራ ኢሲ ሹማይ ደዒሰ። ሄ ሹማይ ባ ጎዳ ሻሉቀ ቶቼሰ ያገያ ዋሬይ ኬላቀ ጋኪሰ። 2 ኬላቀይ ሹማ ጭታዲ፣ ታኒ ዋይጊያባ ሲዒዲና? ሂዛፔ ኔኒ ታ ኬላሰ ሹማ ጊዳዳ ኦላናው ዳንዳያና ጊሾ ታ ሻሉቀ ታው ሹጳ) ያገሰ።

3 «ሄ ሹማይካ ባ ዋዛናን ሃይሳዳ ያገዲ ቆፒሰ። ታ ጎዳይ ታና ሹማቴላፌ ዋላና ሃኔሰ፣ ጎያ አቃናው ዋልቂ ባዋ፣ ዋሳ ማናው

ዩላዬስ፤ ያቲን ታ ዋኖ? 4 ሹማቴላፌ ታ ዋዲያ ዎዴ ኣሳይ ታና ሞካና ማላ ኦላና ታ ኤራይስ) ያገሰ።

5 «ሃሳ ገሹ፣ ኢያ ጎዳ ኣጮይ ዴዲያ ኣሳ ኢሱዋ ኢሱዋ ያገ ኤሂዲ ኮይሮ ኡራኮ፣ ነጎ ቦላ ታ ጎዳ ኣጮይ ኣይ ማሊ ዴዲ?» ያገዲ ኣይቸሰ።

6 «ኢ፣ ላታሙ ባርሜሌ ዛይቲ ኣጮይ ዴዲስ) ያገሰ። «ሹማይ፣ ሰሌ ዋርቃቲያ ሄዴ፣ ኤሌሳዳ፣ ታሙ ባርሜሌ ዛይቲ ኣጮይ ዴዲስ ጋዳ 94) ያገሰ።

7 «ሃሳፊ ካሊዲ ናምዓንሱዋኮ፣ ነጎው ኣቸኒ ዴዲ?» ያገሰ። «ኢ፣ (370 ኩንታሌ ገሰቲ ኣጮይ ዴዲስ) ያገሰ።

«ሹማይ፣ ነጎ ወሌ ዋርቃቲያ ሄዴ፣ ኤሌሳዳ፣ 296 ኩንታሌ ያገዳ 94) ያገሰ። 8 ኩላዎይ ኣማኔቲቦና ሹማ ኢያ ቢላማቴላስ ናሸሰ። ሃ ኣላሚያ ናይቲ ኣሴ ኣይላን ፖፖ ናይታፔ ኣዲዳ ዋካናማታ።

9 «ሃሳ ገሹ፣ ታ ሂንቲው ኦዳይስ፤ ሃ ኣላሚያ ሚሹይ ወሪያ ዎዴ ማሪና ኩላን ሞኬታና ማላ ሃ ሚሹያራ ሂንቲው ላጌታ ሻማቲ። 10 ኡባፊ ጉላባን ኣማኔቲዳይ ዳርባን ኣማኔቲዳይሳ ገዴስ። ቃሲ ኡባፊ ጉላባን ኣማኔቶናይሲ ዳርባን ኣማኔቲና። 11 ሂዛ፣ ሃ ኣላሚያ ሚሹን ሂንቲ ኣማኔቶና ኢዲኮ ቱማ ሚሹ ሂንቲው ኦኒ ሃዳራ ኣማኔ? 12 ሂንቲ ሃራ ኣሳ ሚሹን ኣማኔቶና ኢዲኮ፣ ሂንቲ ቡዞ ሚሹ ሂንቲው ኦኒ ኣማኔ?

13 «ኢሲ ኣይሌይ ናምዑ ጎዳታስ ሃራታናው ዳንዳዴና። ኢሱዋ ኢዲኮ ሃንኩዋ ዶሴስ ዎይኮ ኢሱዋኮ ሸቁኮ ሃንኩዋ ካዴስ። ሃሳዳካ፣ ሂንቲ ያሳሲኔ ሚሹስ ሃራታናው ዳንዳዴኬታ።»

14 ሚሹ ዶሴያ ፋሪሳዌቲ ሃሳ ሲዲዳ ዎዴ ዩሱሳ ቁልቁሲዶሶና። 15 ኢ፣ «ሂንቲ ሂንቲና ኣሳ ሲንላን ያሊሴታ፣ ሸን ያሳይ ሂንቲ ዎካና ኤሬስ። ኣሳ ሲንላን ቦንቸቲዳይሲ ያሳ ሲንላን ቦሬቲዳይሳ።

16 «ሙሴ ሂጌይ ናቤታ ኪታይ ዮሃንሳ ጋካናው ሂንቲው ኦዴቲሹ ጋምዲስ። ሃሳፊ ጉዬ፣ ያሳ ካዎቴላ ዎንጌላይ ሳባኬቲሹ ጋምዲስ። ኣሲ ኡባይ ያ ጌላናው ዳፊቲስ። 17 ገደሸን፣ ሂገያፊ ኢሲ ላፋ ፒዳሌይ ኣታናፔ ሳሎይኔ ሳዳይ ኣዴይሲ ካወዬስ።

18 «ባ ማቸው ዩዲዲ ሃራ ኤኪያ ኡባይ ላሚስ። ባ ኣዚናፔ ኣንጃቲዳሮ ኤኬይሲካ ላሚስ» ያገሰ።

16:13 ማቶ 6:24 16:16 ማቶ 11:12-13 16:17 ማቶ 5:18 16:18 ማቶ 5:32፤ 1ቆሮ 7:10-11

ዲሬ ኡራኔ አላዛሪ

19 «አልዎኔ አሌቆ አፊላ ማዲያ፣ ሳዒ ኢንጆቲን ጋላስ ጋላስ ኡፋይሳን ዳዲያ ኢሲ ዲሬ አሲ ዳዴስ። 20 ሃሪ ቃሲ አሳቴላይ ኩሜሊ ማዲንጂዳ ኢሲ አላዛሪ ጌቲቲያ ማንቆይ ሄ ዲሬ ኡራ ካሪን ዩጌቲዲ አቲዳይሲ ዳዴስ። 21 ኮሻፕ ዳንዶይሳን ዲሬ ኡራ ጋይታፔ ዎጂያ ቲፊያ ማናው አሞቲሼ ዳዴስ። ሃሪ አቶሺን፣ ካናቲ ዩዲ ኢያ ማዲንጎ ላጮሶና።

22 «ሄ ማንቆይ ሃይቂስ፤ ከታንቸቲ ኢያ አብራሃሜ ከዑዎ ኤፊዶሶና። ቃሲ ዲሬ ኡራይካ ሃይቂዲ ሞጌቲስ። 23 ሲዎሌን ኡንዔቲዲ ዳዲሼ ቶቆ ጊዲ ሃሆን አብራሃሜኔ ኢያ ከዶን ዳዲያ አላዛሪ ቤዒስ። 24 ኢ፣ ለአዎው አብራሃሜ፣ ታው ቃጂታርከ፤ ሃ ላጮ ታማን ኡንዔታዳ ዳዲያ ጊሾ አላዛሪ ባ ቢራጂያ ሃላን ዩዲዲ ታ ኢንግርሳ ላኮላና ሜላ ሃያና ኢያ ዩዳርኪ» ያጊዲ ዋሲስ።

25 «ሺን አብራሃሜይ ኢያኮ፣ ሓ ናዓው፣ ኔ ሳዒን ዳዲያ ዎዴ ሎዎባታ ኤኪዳይሳ፣ ቃሲ አላዛሪ ኢታባታ ኤኪዳይሳ አከካ። ሺን ሃዒ ኢ ሃይሳን ኡፋይቲስ፣ ቃሲ ኔኒ ዋዩታሼ ዳዒሳን ያጊስ። 26 ሃ ኡባፊ አጂዲ፣ ሃፔ ሂንቲኮ፣ ሂኒፔ ሃ ኑኮ አጃናው ኮዩይሳቲ ፒናና ሜላ ኩሲኔ ሂንቲስ ጊዶን ጌታ አፎይ ዳዴስ» ያጊስ።

27 «ዲሬ ኡራይ፣ ለአዎው፣ ያኮ አላዛሪ ታ አዎ ሶ ከታና ሜላ ታ ኔና ዎሳይስ። 28 ታው ኢቻሹ አሻቲ ዳዲዶሶና፣ ኤንቲካ ሃ ዋዩ ቤሳ ሶና ሜላ ኤንታው ቢዲ ማርካቶ» ያጊስ።

29 «ሺን አብራሃሜይ፣ ለኤንታው ሙሴራኔ ናቤታራ ዳዎሶና፤ ኤንቲ ኑዲያባ ሲዎና» ያጊስ።

30 «ዲሬ ኡራይ፣ ለአዎው አብራሃሜ፣ ሄሳሉ ጊዳና፤ ኢሲ አሲ ሃይቆፔ ዳንዲዲ ቢኮ ኤንቲ ማርታን ጌላና» ያጊስ።

31 «አብራሃሜይ፣ ለሙሴኔ ናቤታ ሲዎና ኢጂኮ፣ ሃሪ አቶሺን ሃይቆፔ ኢሲ አሲ ዳንዲ ኦዲኮካ አማኖኮና» ያጊስ።»

17

ኦይሺሲያ አዎቴላ

1 ዩሱሲ ባ ታማራታኮ፣ «አሴ ቶቤሊዲ ናጋራን ጌልሲያባይ ዮና አጌና። ጊዶሺን፣ ናጋራን ጌላና ሜላ ኦሊያ ኡራ አዬ» ያጊስ።
2 ሄ ኡራይ ካሎታፔ ኢሱዋ ባሌላናፔ ዎፃ ባ ቆጂን ቃቸዲ አባን ዉሊኮ ኢያው ሎዎ። 3 ሄሳ ጊሾ ናጌቲቲ።

«ኔ አሻይ ናጋራ ኦሊኮ ሃንቁታ፤ ቁርቲዲ ማርቲላን ሲሚኮ፤ ኢያው አቶ ያጋ። 4 ኢሲ ጋላሳን ላፑን ቶሆ ቆሃዲ፤ ላፑን ቶሆ፤ ታኒ ታ ባላ ኤራስ ታና ማራ» ያጊዲ ኔኮ ዪኮ ኢያው አቶ ጋ።»

5 ሃዋሬቲ ጎዳኮ፡ «አማኖ ኮስ ጉጃርኪ» ያጊደሶና።

6 ጎዳይ፡ «ጋሼ አይፌ ማላ አማኖይ ሂንቲው ዳዒኮ ሳሃሳ ዋላ ሾዴታዳ አባ ጊደን ቶኬታ» ያጊኮ ሂንቲው ኪቲታና» ያጊሰ።

7 ጉጃዲካ ዬሱሲ፡ «ሂንቲ ጊደፌ ኢሱዋስ ጎሻንቾይ ዋይኮ ደርሴ ሃሚያ አይሌይ ዳዒኮ ኦሶ ጋዴፕ ዋይኮ ዉዴፕ ሶ ሲሚያ ዋይ ሳሌ ሃያዳ ካሊ ማናው ኡታ» ያጊይ ዳዒ? 8 ዳና፡ ታው ካሆ ጊሊሳ፤ ታኒ ማዳ፡ ኡያዳ አጋና ጋካናው ኡቃዳ ሙዛ። ሃሳፌ ጉዬ፡ ኔኒ ቃሲ ማሳኔ ኡያሳ» ያጊኔኔ? 9 ሂዛ፡ ጎዳይ፡ አይሌይ ኪታ ፖሊዳ ጊሾ አንጃዬ? 10 ሃሳ ጊሾ፡ ሂንቲካ ኪቲቶይሳ ኡባ ፖሊዳ ዋይ ሳ ፓሶና አይሌታ፤ አላናው ቤሲያ ኦሶዋ ፖሊዳ» ያጊጡ።

ባር ሃርጊያፌ ጌዱዳ ታሙ አሳታ

11 ዬሱሲ ዬሩሳሌሜ ቢሼ ሳማሪሴኔ ጋሊላ ቢታስ ጊደራ ካንሊዲ አቋሰ። 12 ኢሲ ጉታ ጌሊያ ዋይ ባር ሃርጊን አይኬቲዳ ታሙ አሳቲ ኢያ ዳሚደሶና። ኤንቲካ ሃሆን ኤቂዲ፤ 13 «ጎዳ ዬሱሳ፡ ኮስ ቃቆታርኪ» ያጊዲ ዋሲደሶና።

14 ኢ ኤንታ ቤዒዳ ዋይ «ቢዲ ሂንቲናቲላ አይሁዳ ካሂኔ ቤሲቲ» ያጊሰ። ኤንቲ ኦጊያ ቦላ ቢሼ ፓደደሶና።

15 ኤንታፌ ኢሶይ ባ ፓፀዋ ቤዒዳ ዋይ ቆቁ ጊዳ ቃላን ያሳ ቦንቸሼ ዬሱሳኮ ሲሚሰ። 16 ኢ ሳማሬ ቢታ አሲ፡ ሺን ዬሱሳ ቶሁዋ ቦላ ጉፋኒዲ ኢያ ጋላቲሰ።

17 ዬሱሲ፡ «ፓዲዳይ ታሙ አሳታ ጊደኮናዬ? ያቲን፡ ኡዱፋናቲ አው ቢደና? 18 ሃ አላጋ ኡራፔ * አቲን ሃሪ ሲሚዲ ያሳ ጋላቲይ ዳና ጉሴዬ?» ያጊዲ አይቸሰ። 19 ኡራኮ፡ «ኔ አማኖይ ኔና ፓሊሰ፤ ዳንዳዳ ባ» ያጊሰ።

**ያሳ ካዋቲላ ዩሳ
(ማቶ 24:23-28፣ 37-41)**

20 ፋሪሳዊቲ፡ «ያሳ ካዋቲላይ አዉዳ ያኔ?» ጊዲ ዬሱሳ አይቸደሶና። ኢ፡ «ያሳ ካዋቲላይ ቤንቲያ ማላን ዬና። 21 ቃሲካ ኢዮ፡ ሳሂና ዋይኮ ሂኒና ያጋናው ዳንዳዴና። አይሰ ጊኮ፡ ያሳ ካዋቲላይ ሂንቲ ጊደን ዳዴሰ» » ያጊዲ ዛሪሰ።

17:14 ሉቁ 14:1-32 * 17:18 ሃ አላጋ ኡራፔ፡ ባር ሃርጊያፌ ፓዲዳ ኡራይ አላጋ ጌቲቲዳይ ኢ አይሁዳ ጊደና ጊሾሳ።

22 ዩሱሲ ባ ታማሪታኮ፡ «አሳ ናዓ ጋላሳታፔ ኢሱዋ ቤዓናው ሂንቲ አሞቲያ ዋዴይ ያና፡ ሺን ሂንቲ ቤዔኬታ። 23 አሳይ፡ ሩኢ ያን ዴዔስ) ዋይኮ፡ ሳሂይሳን ዴዔስ) ያጋና፡ ሺን ኤንታና ካሊዲ ቦፒቲ። 24 ዋልዓንሉ ዋልዓሚዲ ሳሉዋ ጋፃፔ ጋፃ ፖዒሲያ ማላ አሳ ናዓ ዩሳ ጋላሳይ ሄሳዳ ሃናና። 25 ሺን ሄሲ ሃናናፔ ሲንሉ አሳ ናዓይ ዳሮ ዋያናወኔ ሃ ዩሌቴላን ኢፃታናው ቤሴስ። 26 ናሄ ዋዴ ሃኒዳይሳ ማላ አሳ ናዓ ዋዲያንካ ሄሳዳ ሃናና። 27 ናሄይ ማርካቢያን ጌሊዳ ቃማ ጋካናው አሳይ ሚሼኔ ኡዩሼ፡ ኤኪሼኔ ጌሊሼ ዴዒሺን ጳዮ ሃላይ ዩዲ ኡባ ጳይሲስ። 28 ሎፃ ላይላንካ ሄሳሉ ሃኒስ። አሳይ ሚሼኔ ኡዩሼ፡ ሻሚሼኔ ባይዚሼ፡ ቶኪሼኔ ኬፃሼ፡ ጋምዒዶሶና። 29 ሎፃይ ሶዶሚፔ ኬዩዳ ጋላስ ዲኔ ጌቴቲያ ፀጊያባይ ሳሎፔ ቡኪዲ ኡባ ጳይሲስ። 30 አሳ ናዓይ ቆንጨያ ዋዴካ ሄሳዳ ሃናና።

31 «ሄ ጋላሳን ኦኒካ ካሬን ዴዔይ ኬላ ጊዶን ዴዒያባ ኤካናው ሶ ጌሎፖ። ሄሳዳካ፡ ጋዴን ዴዒያ አሲ አይኮሰካ ሶ ሲሞፎ። 32 ሎፃ ማቸው አኬኪቲ፤ 33 ባ ሺምፒው አሻናው ኮያ አሲ ኦኒካ ጳይሳና፤ ባ ሺምፒው አሉ ኢሚያ ኦኒካ ኢ አሻና። 34 ታ ሂንቲው ኦዳይስ፤ ሄ ጋላሳን ናምዑ አሳቲ ኢሲ አርሳን ዘንዓና። ኢሶይ ኤኬታና፡ ሃንኮይ አታና። 35 ናምዑ ማጫሳቲ ዋላ ጋጨሺን ኢሲያ ኤኬታና፡ ሃንኪያ አታና። 36 ናምዑ አሳቲ ዋላ ጋዴን ገዩይሳታፔ ኢሶይ ኤኬታና፡ ሃንኮይ አታና» † ያገሰ።

37 ኤንቲ፡ «ሳዳው አው ኤኬታኔ?» ያገዲ ኦይቺዶሶና። ኢ፡ «ባወቲ ዴዒያ ቤሳን አንኮቲ ሺቆሶና» ያገሰ።

18

ሚኒዲ ዋሳና ማላ ታማርሲስ

1 ዩሱሲ ባ ታማሪታ አዛሎና ኡባ ዋዴ ዋሳና ማላ ታማርሳናው ኮዩዲ ያገዲ ለሚሶ ኦዲስ፡ 2 «ኢሲ ካታማን ያሳስ ያሹቶና አሳሰካ ዩላቶና ኢሲ ዳይኒ ዴዔስ 3 ሄ ካታማን ኢሲ አምዒያ ዳዓወሱ። ኢያካ፡ ታወኔ ታ ሞርኪያስ ጊዶን ዴዒያ ሞቲዋ ፒርዳ) ያጋዳ ኡባ ዋዴ ሄ ዳይናኮ ሲሜሬታውሱ። 4 ዳይናይ ጉላ ዋዴስ ኢ ኦዳ ሲዖና ኢዲስ፡ ሺን ጉዬፔ ባ ዋዛናን፡ ታኒ ያሳስ

17:26 ሜዴ 6:5-8 17:27 ሜዴ 7:6-24 17:28 ሜዴ 18:20-19:25
 17:31 ማቶ 24:17-18፤ ማር 13:15-16 17:32 ሜዴ 19:26 17:33 ማቶ 10:39፤ 16:25፤ ማር 8:35፤ ሉቃ 9:24፤ ዮሃ 12:25 † 17:36 ኢሲ ኢሲ ማፃፋታን ፓይዶ 36 ዳና።

ያየና፤ አሳስ ዬላቶና ኢዲኮካ፣ 5 ሃ አምራያ ታና ዋይሲያ ገሾ ኢው ፐርዳና፤ ያቶና ኢዲኮ ኡባ ዋዴ ያዳ ታና ሳሌላና) ያገዲ ቆፒስ» ያገሰ።

6 ጎዳይካ፣ «ጌላ ዳይናይ ገዳይሳ ሲዲዴታ፤ 7 ያሳይ ቃማኔ ጋላስ ኢያኮ ዋሲያ ባ ደሪዳይሳታስ ፐርዴኔዬ? ኤንታና ማዳናው ጋምዲዬ? 8 ታ ሂንቴው ኦዴይሳ ሲዲቴ፣ ኤሌሲዲ ፐርዳና። ገደሺን፣ አሳ ናዳይ ያ ዋዴ ሳዓ ቦላ አማኖ ዴማንዴሻ?» ያገሰ።

ፋሪሳዊያኔ ቃራፃ ቃንዲሴይሳ

9 ቃሲ ዛሪዲ፣ ዬሱሲ፣ ባንታና ዲሎ አሳዳ ኦሊዲ ጩቁቴይሳታሲኔ ሃራታ ካዴይሳታስ ሃይሳዳ ያገዲ ለሚሶ ኦዲስ። 10 «ናምው አሳቲ ዋሳናው ያሳ ከሌ ቢደሶና። ኢሶይ ፋሪሳዌ ሃንኮይ ቃሲ ቃራፃ ቃንዲሴይሳ ኣሲ። 11 ፋሪሳዌይ ኤቁዲ ባው ዋሲሼ፣ ሮሳው ታኒ ሃራታ ሜላ ቦንቃንቸ፣ ጌላኔ ላይማቲያ ኣሲ፣ አዲዳ ቃሲ ሃ ቃራፃ ቃንዲሴይሳ ኡራ ሜላ ገደና ገሾ ኔና ጋላታይስ። 12 ሳሚንታፌ ናምው ቶሆ ያማይስ፣ ታ ዴሚያባ ኡባፌ ኣሲራታ ከሳይስ) ያገሰ።

13 «ሺን ቃራፃ ቃንዲሴይሴ ቃሲ ሃሆን ኤቁዲ ሃሪ አቶሺን ሳሎ ቶቁ ገዲ ያላናዉካ ያዬዲ ባ ቲራ ኢጪሼ ሮሳው፣ ታና ናጋራንቸዋ ማራርኪ) ገዲ ዋሲስ። 14 ታ ሂንቴው ኦዴይሳ ሲዲቴ፤ ፋሪሳዊያፔ ሃይሲ ቃራፃ ቃንዲሴይሴ ያሳ ሲንላን ዲሎ ገዲዲ ባ ሶ ስሚስ። ኣይስ ገኮ፣ ባና ቶቁ ቶቁ ኦሊያ ኣሲ ካዉያና፣ ባና ካዉሺያ ኣሲ ቶቁ ቶቁ ጋና» ያገሰ።

ዬሱሳኔ ዮጋ ናይታ

(ማቶ 19:13-30፤ ማር 10:13-31)

15 ዬሱሲ ዮጋ ናይታ ቦላ ባ ኩሺያ ዋሊዲ አንጃና ሜላ አሳይ ኢያኮ ኤሆሶና። ዬሱሳ ታማራቲ ሄሳ ቤዲዲ ኣይስ ዬሱሳኮ ኤሄቲ ያገዲ ካጪደሶና። 16 ሺን ዬሱሲ ናይታ ባኮ ያገዲ፣ «ዮጋ ናይቲ ታኮ ያናይሳ ዲጎፊቴ፤ ዮ ገቲ። ኣይስ ገኮ፣ ያሳ ካዋቴላይ ኤንታዳ ሃኒዳይሳታሳ። 17 ታኒ ሂንቴው ቱማ ኦዳይስ፤ ያሳ ካዋቴላ ዮጋ ናይታሶ ኤኮናይ ኦኒካ ያ ጌሌና» ያገሰ።

ዲሬ ኡራ ኦይሻ

(ማቶ 19:16-30፤ ማር 10:17-31)

18 ኣይሁዴ ሃላቃታፔ ኢሶይ፣ «ኬሃ ኣስታማሪያው፣ ሜሪና ዴዑዋ ዴማናው ኣይ ኦሶ?» ያገዲ ኦይቸስ።

18:14 ማቶ 23:12፤ ሉቃ 14:11

19 ዩሱሲ ኢየሱስ፡ «አይሰ ታና ከሃው ያጋዳ ዪጋይ? ኢሲ ያሳፌ አቲን ሃሪ ከሂ ባዋ። 20 ለሞፋ፣ ዎቶ፣ ካይሶቶ፣ ዋርዶ ማርካቶ፣ ኔ አዋኔ ኔ አዪው ቦንቻ ያጊያ ኪታ ኤራይ» ያጊዲ ኦይቺሰ።

21 ኡራይካ፡ «ሄሳታ ኡባ ታኒ ናዓቴላፌ ዶማዳ ናጋሼ ጋምዓሰ» ያጊሰ።

22 ዩሱሲ ሄሳ ሲዲዳ ዎዴ «ሂዛ፣ ኔው ኢሲባይ ፓጩሰ፤ ኔው ዴዲያባ ኡባ ባይዛዳ ማንቆታሰ ኢማ፤ ሳሎን ኔና ሻሎይ ናጌሰ። ያታ ሲማዳ ታና ካላ» ያጊሰ። 23 ሺን ኡራይ ሄሳ ሲዲዳ ዎዴ ኢያው ዳሮ ሻሎይ ዴዲያ ጊሾ ዳሮ ቁርቲሰ።

24 ዩሱሲ ኡራ ቤዲዲ፡ «ዱሬ አሳሰ ያሳ ካዎቴላ ጌሎይ ዋኒዲ ኡንዓንዴሻ? 25 ዱሬይ ያሳ ካዎቴላ ጌላናይሳፌ ጊማሌይ ናርፔ ሉሆራ ካንጩይሲ ካዉዬሰ» ያጊሰ።

26 ሄሳ ሲዲዳ አሳይ፡ «ሄሳ ጊዲኮ ኦኒ አታኔ?» ያጊዶሶና።

27 ዩሱሲ፡ «አሳሰ ዳንዳዔቶናባይ ያሳሰ ዳንዳዔቴሰ» ያጊሰ።

28 ጳጳርሲ፡ «ሄኮ ኦኒ ኦባ ኡባ አጊዲ ኔና ካሊዳ» ያጊሰ።

29 «ዩሱሲ ቱማ ታ ሂንቴው ኦዳይሰ፤ ያሳ ካዎቴላሰ ጊዲ ባ ኬላ ዎይኮ ባ ማቺው ዎይኮ ባ ኢሻታ ዎይኮ ባ አዋኔ ባ አዪው ዎይኮ ባ ናይታ አጊዳይ፤ 30 ሃ ዎዲያን ዳኮ ዳሮ፣ ያና አላሚያን ሜሪና ዴዑዋ ኤኮናይ ኦኒካ ባዋ» ያጊሰ።

ዩሱሲ ባ ሃይቁዋባ ዛሪ ኦዲሰ
(ማቶ 20:17-19፤ ማር 10:32-34)

31 ዩሱሲ ታማኔ ናምዓታ ባኮ ዪጊዲ፡ «አኔ ዬሩሳሌሜ ቦሰ፣ ናቤቲ አሳ ናባባ ፃፊዳባ ኡባይ ያን ፖሌታና። 32 ኢ አይሁዴ ጊዶና አሳሰ አጲዲ ኢሜታና። ኤንቲ ኢያ ቶቻና፣ ጫያናኔ ኢያ ቦላ ጩታና። 33 ኢያ ጋራፊዳፔ ጉዬ ዎቆና፣ ሺን ሄቫንሉ ጋላሳን ኢ ሃይቆፔ ዳንዳና» ያጊሰ።

34 ሺን ኢያ ታማሬቲ ሄሳ ኡባፌ ኢሲባካ አኬኪቦኮና። ኢያ ፀራይ ኤንታው ቆሴቲዳ ጊሾ ኢ ዎይጊዳኮ ኤሪቦኮና።

ቆቄ ኡራይ ያሊሰ
(ማቶ 20:29-34፤ ማር 10:46-52)

35 ዩሱሲ ኢያርኮ ማታቲያ ዎዴ ኢሲ ቆቄ ኡራይ ኦጌ ጋፃን ኡቲዲ ዎሴሰ። 36 ቆቄ ኡራይ አሳይ ሄ ቤሳራ አጲሺን ሲዲዲ፡

«ኢ አይቤ?» ገዲ ኦይቸሰ። 37 ኤንቲ፣ «ናዚሬቲ ዩሱሲ ሃይሳራ ኣጼሰ» ያገደሶና።

38 ኢ፣ «ዳዊቲ ናዓው፣ ዩሱሳ፣ ታና ማራርኪ» ያገዲ ዋሲሰ።

39 ሲንጼ ሲንጼ ቢያ ኣሳቲ፣ «ሲዒ ጋ» ገዲ ሃንቄቲዶሶና።

ሺን ኢ፣ «ዳዊቲ ናዓው፣ ታና ማራ» ያገዲ ዳርሲ ዋሲሰ።

40 ዩሱሲ ኤቁዲ ኡራ ባኮ ኤሃና ሜላ ኪቲሰ። ኡራይካ፣ ኢያኮ

ሺቁን፣ 41 «ታ ኔው ኣይ ኣላና ሜላ ኮያይ?» ያገዲ ኦይቸሰ።

ቆቄይ፣ «ጎዳው ታ ጸላናው ኮያይሰ» ያገሰ።

42 ዩሱሲ፣ «ጻለ፣ ኔ ኣማኖይ ኔና ፓሊሰ» ያገሰ። 43 ኡራይ

ሶሁዋራ ጸሊ ኣገሰ። ያሳ ቦንቸሽ ዩሱሳ ካሊሰ። ኣሳ ኡባይ ሄሳ

ቤዒዲ ያሳ ጋላቲዶሶና።

19

ቃራፃ ቃንፂሲያ ዛኪዮሳ

1 ዩሱሲ ኢያርኮ ጌሊዲ ኣጼሰ። 2 ያን ዛኪዮሳ ጌቲቲያ ቃራፃ

ቃንፂሲይሳታ ሃላቃይ ዳዒሰ። ኢ ዳር ዳሬ። 3 ኢ ዩሱሲ ኦኔኮ

ቤዓናው ኮዩሰ። ኢ ቃንጸ ገዲያ ገሾ ኣሳ ዳርቲላፊ ዳንደይሳን

ዩሱሳ ቤዓናው ዳንዳዒቤና። 4 ዩሱሳ ቤዓናው ኮዩዲ ኢ ቢያ

ኦጊያሰ ሲንጼ ዋፂ ቢዲ ኢሲ ቦባ ሚላ ቦላ ኮዩሰ።

5 ዩሱሲ ሄ ቤሳ ጋኪሽ ጶቁ ገዲ ቤዒዲ፣ «ዛኪዮሳ፣ ሃቺ

ታ ኔ ሶን ፔዓናው ቤሲያ ገሾ ኤሌ ዋጳ» ያገሰ። 6 ኢ ኤሌሲ

ዋጲዲ ኡፋይሳን ዩሱሳ ሞኪሰ።

7 ሄ ቤሳን ዳዒያ ኣሳ ኡባይ ሄሳ ቤዒዲ፣ «ናጋራንቸዋ ሶ

ጌሊዲ ሞኬታንው ሃኔሰ» ያገዲ ዙዙሚዶሶና። 8 ገደሺን፣

ዛኪዮሲ ኤቁዲ ጎዳኮ፣ «ጎዳው፣ ሄኮ ታው ዳዒያ ሻሎ ኡባፊ

ባጋ ማንቆታሰ ኢማና። ኣሳፔ ኣይባካ ዋርዶን ባሌላዳ ኤኪዳባ

ገዲኮ ኦይዲ ኩሽ ዛራና» ያገሰ።

9 ዩሱሲ ቃሲ፣ «ሃ ኡራይ ኣብራሃሜ ናዓ ገዲዳ ገሾ ሃቺ

ኣቶቲላይ ሃ ሶ ዩሰ። 10 ኣሳ ናዓይ ዩዳይ ቋዩዳይሳ ኮያናሳኔ

ኣሻናሳ» ያገሰ።

ታው ሚናኔታ ሌሚሱዋ

(ማቶ 25:14-30)

11 ኣሳይ ሄሳ ሲዒያ ዋዶ ዩሱሲ ዩራሳላሜ ማታቲዳ ገሾኔ

ያሳ ካዋቲላይ ሃዒ ማታራ ቆንጫና ዳኒዳ ገሾ ኤንታው ሌሚሶ

ኦዲሰ። 12 ሄሳ ገሾ፣ ዩሱሲ፣ «ኢሲ ገታ ኣሲ ዳዒይሲ ባው

ካዎቹሊ ኤኪዲ ያናው ሃራ ቢታ ቢሰ። 13 ኢያው ኦሊያ አይሌታፔ ታማታ ያገዲ ኢሱቀሰ ኢሱቀሰ ታሙ ሚናኔ * ኢሚዲ ሳታ ሰማዳ ያና ጋካናው ሃ ሚሺያራ ዛልዲቴ) ያገሰ።

14 «ሄ ቢታ አሳይ ኢያ ኢዲያ ገሾ ሃ ኡራይ ኑ ቦላ ካዎታና ማላ ኑ ኮዮኮ ያገዲ አሴ ኢያ ጉዬራ ከተደሰና።

15 «ገደሺን፣ ሄ ኡራይ ካዎ ገዲዲ ባ ቢታ ሰሚሰ። ሄ ታሙ አይሌቲ ኢ ኢሚዳ ሚሺያን አይ ማላ ዛልዲዲ ዎዲሲዳኮ ኤራናው ኮዩዲ ኤንታና ያገሰሰ።

16 «ኮይሮይሲ ዩዲ፣ ሳዳው፣ ኔ ታው ኢሚዳ ሚሼይ ሃራ ታማ ዎዲሰ) ያገሰ።

17 «ኢያ ጎዳይ፣ ሳኖ አማኔቲዳ አይሊያው ሎዎ ኦላዳሳ። ኔኒ ጉላባን አማኔቲዳ ገሾ ኔው ታሙ ካታማታ ቦላ ማታ ኢማሰ) ያገሰ።

18 «ናምዓንላይካ ዩዲ፣ ሳዳው፣ ኔ ታው ኢሚዳ ሚሼይ ሃራ ኢቻሻ ዎዲሰ) ያገሰ።

19 «ጎዳይ ኢያኮ፣ ሳኔወካ ቃሲ ኢቻሹ ካታማታ ቦላ ማታ ኢማሰ) ያገሰ።

20 «ሃኮ ሄሻንላይ ዩዲ፣ ሳዳው፣ ታ ጨርቃን ፃፃዳ ናገዳ ኔ ሚሺያ ሃናሹ። 21 አይሰ ገኮ፣ ኔኒ ኔባ ገደናባ ኤኬይሳኔ ኔ ዜሮናባ ቡጨያ ኢታ አሲ ገዲያ ገሾ ኔው ያያሰ) ያገሰ።

22 «ኢያ ጎዳይ ዛሪዲ፣ ሳኖ ኢታ አይሊያው ኔ ዶናዎ ታ ኔና ፐርዳና። ታ ዎሶናባ ኤኬይሳኔ ዜሮናባ ቡጨያ አሲ ገዳይሳ ኔ ኤሪኮ፣ 23 ታ ያዳ ታ ሚሺያ ዎዲራ ኤካና ማላ ዛልዲያ አሳሰ አይሰ ኢማሰኪ?)

24 «ኢያ ጎዳይ ሄ ቤሳን ኤቁዳይሳታኮ፣ (ኢያራ ዳዲያ ሚሺያ ኤኪዲ ታማ ዎዲሲዳይሳሰ ኢሚቴ) ያገሰ።

25 «ኤንቲ፣ ሳዳው፣ ኢያው ካሴካ ታሙ ሚናኔይ ዳዴሰ) ያገደሰና።

26 «ጎዳይ፣ ታ ሂንቲው ኦዳይሰ፤ (ዳዲያ ኡባሰ ሃሪ ጉዜታና፣ ሸን ባይናይሳፌ ሃራይ አቶ ኢያው ዳዲያራካ ኤኬታና።

27 ገደሺን፣ ታ ኤንታ ቦላ ካዎቶና ማላ ኮዩዳይሳታ ሄ ታ ሞርኬታ ሃ ታ ሲንሐ ኤሂዲ ጎይሪቴ) ገሰ» ያገሰ።

* 19:13 ሚናኔ፣ ሚናኔይ ገሪኬ ዶና። ኢሲ ሚናኔይ ኢሲ ጋላሳ ኦሳንቸሰ ሄሹ አኒና ዳሞዜ ገደሰ። 19:26 ማቶ 13:12፣ ማር 4:25፣ ሉቃ 8:18 19:27 ማቶ 25:14-30

ዩሱሲ ገታ ቦንቸን ዩሩሳሌም ጌሊስ
(ማቶ 21:1-11፤ ማር 11:1-11፤ ዮሃ 12:12-19)

28 ዩሱሲ ሄሳ ኦሚዳይሳፌ ጉዩ ኤንታፌ ሲንጤ አጁ ሃሙተዲ ዩሩሳሌም ቢስ። 29 ሻማሆ ዳሪያ † ቦላ ዳዲያ ቤቴፋንጌ ቢታኒያ ማታቲዳ ዎዴ ባ ታማሬታፔ ናሞባታ ያገዲ ከቲስ። 30 «ሂንቴ ሲንሳን ዳዲያ ጉታ ቢቴ፤ ሂንቴ ያ ጋኪያ ዎዴ ኦኒካ ቶጎና ቃሼቲዲ ዳዲያ ሃሬ ማሪ ዳማና። ኢያ ቢሊዲ ሃ ኤኪ ዪቴ። 31 ኦኒካ፣ «ኣይስ ቢሉቲ?» ገዲ ኦይቸኮ፣ ሳዳይ ኢያ ኮዬስ) ያገቲ» ያገሰ።

32 ከቴቲዳይሳቲ ቢዲ ኢ ገዳይሳዳ ሃኒን ቤዲዶሶና። 33 ኤንቲ ሃሬ ማራ ቢሊሺን ጎዳቲ ቤዲዲ፣ «ሃሬ ማራ ኣይስ ቢሉቲ?» ያገደሶና።

34 ኤንቲ ዛሪዲ፣ «ጎዳይ ኢያ ኮዬስ» ያገደሶና።

35 ያፔ ሃሬ ማራ ዩሱሳኮ ኤሂደሶና። ባንታ ማዑዎ ሃሬ ማራ ዘኮን ዩጊዲ ዩሱሳ ሃሬ ማራ ቦላ ኡቲሲደሶና። 36 ኣሳይካ ኢ ቢያ ኦጊያ ቦላ ባንታ ማዑዎ ሂጂደሶና።

37 ሻማሆ ዳሪያ ዲጌላ ዎጲሲያ ኦጊያኮ ማቲያ ዎዴ ታይቦን ከሂ ዳር ኣሳይ ኤንቲ ቤዲዳ ማላሊሲያባን ኡፋይቲዲ ባንታ ቃላ ቶቁ ኦሊዲ፣

38 «ጎዳ ሱንሳን ያ ካዎይ ኣንጃቲዳይሳ ሳሉዋን ሳርይ

ኡባፌ ቶቃ ሳሉዋን ቦንቸይ
ያሳስ ገደ።»
ያገዲ ያሳ ጋላቲደሶና።

39 ኣሳ ገደፌ ኢሲ ኢሲ ፋሪሳዌቲ ዩሱሳኮ፣ «ኣስታማሪያው፣ ኔ ታማሬታ ሃይዚቴ ጋዳ ሃንቁታ» ያገደሶና።

40 ኢ ኤንታኮ፣ «ኤንቲ ሲዲ ገኮ ሹቻቲ ዎሳና» ያገሰ።

41 ዩሱሲ ዩሩሳሌም ማቲሼ ካታማ ቤዲዲ ኢያው ዩኪስ።

42 «ኔው ሳር ገዳናይሳ ሃቸ ኔ ኤሪዳባ ገዲያኮሺን፣ ሃዲ ኔ ኣይፊያፔ ጌሚስ። 43 ኔ ሞርኬቲ ኔ ዩሹዎ ዲሪዲ ዲማ ዲማ ኦጊያራ ኔና ቴቁዲ ኡንዔሊያ ዎዴይ ያና። 44 ኔና ኔ ዲርሳ ጋርሳን ዳዲያ ኔ ናይታ ቆይሳና። ኢሲ ኢሲ ሹቹ ዳንሊዲ ላላና፣ ኣይስ ገኮ ያሳይ ኔና ኣሻናው ያ ዎዲያ ኤራባካ» ያገዲ ኢው ዩኪስ።

† 19:29 ሻማሆ ዳሪያ፡ ሻማሆይ ዳር ደሊያ ዳሬ ጉሱ። 19:38 ማዘ 118:26

45 ሃሳፌ ጉዬ፣ ዩሱሲ ያሳ ኬሌ ጌሊዲ ዛሬ ይሰጣታ ያፔ ጎዲሰ። 46 ቃሲ፣ « ታ ኬላይ ያሳ ዋሲያ ኬሌ ጌዳና ጌዲ ዓፌቲሰ፣ ሺን ሂንቲ ታ ኬላ ፓንጋታ ጎንጎሎ ኦሊዴታ» ያገሰ።

47 ጋላስ ጋላስ ያሳ ኬላን ታማርሴሰ። ካሂኔታ ሃላቃቲ፣ ሂጌ አስታማሪቲኔ ዴሪያ ጨማቲ ኢያ ዋቆናው ኦጌ ኮዮሶና።

48 ጊደሺን፣ አሳ ኡባይ ኢያ ቲሚርቲያ ባንታ ዋዛና ዩጌዲ ሲዲያ ጊሾ ኤንታው ኦላናባይ ቆይሰ።

20

ዩሱሳ ማታይ አይሁዴታስ ኦይሾ ጊዲሰ
(ማቶ 21:23-27፤ ማር 11:27-33)

1 ኢሲ ጋላስ ዩሱሲ ያሳ ኬላን አሳ ታማርሴሺኒኔ ዋንጌላ ማርካቲሺን፣ ካሂኔ ሃላቃቲ፣ ሂጌ አስታማሪቲኔ ዴሪያ ጨማቲ ኢሲፌ ኢያኮ ዩዲ፣ 2 «ኔኒ ሃይሳታ አይቢ ማታን ኦሊያኮ ኦስ ኦዲ። ሃ ማታ ኔው አሚዳይ ኦኔ?» ያገዲ ኦይቸደሶና።

3 ኢ ኤንታኮ፣ «ታካ ሂንቲና ኢሲባ ኦይቻና፣ ኦኔ ታው ዛሪቲ። 4 ዓማቂያ ዮሃኒሳ ጂንቃቲይ ያሳፌዬ አሳገፔ?» ያገሰ።

5 ኤንቲ ዋሊ ጊደን ያገዲ ዘሬቲደሶና፣ «ያሳፌ ጊኮ ያቲን፣ አይሰ አማኒቤኬቲ?» ያጋና።

6 «አሳገፔ ጊኮ፣ አሳ ኡባይ ዮሃኒሲ ናቤ ጌዴይሳ አማኒያ ጊሾ ኦና ሹቻን ጫዳና።»

7 ያኒያ ጊሾ፣ «አዉፔኮ ኦ ኤሮኮ» ያገዲ ዛሪደሶና።

8 ዩሱሲ ዛሪዲ፣ «ሂዛ፣ ታካ አይ ማታን ሃይሳታ ኦሊያኮ ሂንቲው ኦዲኬ» ያገሰ።

ጎሻንቸታ ለሚሱዋ
(ማቶ 21:33-46፤ ማር 12:1-12)

9 ሃሳፌ ጉዬ፣ ዩሱሲ ያገዲ ሃ ለሚሱዋ አሳሰ ኦዲሰ፣ «ኢሲ አሲ ዋይኔ ቶኪሰ። ጎሻንቸታስ ኬራ አሚዲ ዳሮ ዋዴ ጋምዲዲ ያናው ሃራ ቢታ ቢሰ። 10 ዋይኔ አይፊያ ማጂያ ዋዴይ ጋከን ዋይኒያ አይፊያፔ ኢያው ዩዳና ማላ ጎሻንቸታኮ ባ አይሊያ ከቲሰ። ሺን ጎሻንቸቲ ሄ አይሊያ ኦይኪዲ ዋቆዲ ማላ ኩሾ ዩዲደሶና። 11 ካሊዲካ ሃራ አይሊያ ከቲሰ። ቃሲ ጎሻንቸቲ ኢያ ዋቆዲ፣ ካዉሺዲ ማላ ኩሾ ዩዲደሶና። 12 ሃባካ ዛሪዲ

ሄዘን፤ አይሊያ ከተሰ። ጎሻንቸቲ ኢያካ ማዲንዲሲ ወይኒያ ገደፌ ጋፃ ከሲዲ ዩጊደሶና።

13 «ወይኒያ ጎዳይ፣ ማተን ታ አይ አሉ? እኔ ቃሲ ታ ደሲያ ታ ናዓ ዩዳና፤ ኦኒ ኤሪ ኤንቲ ኢያ ቦንቸና አጎኮና) ያገሰ።

14 «ሺን ጎሻንቸቲ ኡራ ናዓ ቤዒዳ ወዴ ላይሲ ኢያ ላቴይሳ፣ ሃ ዩቴ ኢያ ወዳና፣ ያቴኮ ላታይ ኑሰ ገዳና) ያገዲ ዘሬቲደሶና።

15 ወይኒያ ገደፌ ጋፃ ከሲዲ ወዳደሶና።

«ማተን፣ ወይኒያ ጎዳይ ሄ አሳታ ወታኔ? 16 ዩዲ ሄ ጎሻንቸታ ዳይሳና፣ ወይኒያ ቤሳ ሃራ አሳታሰ ኢማና። አሳይ ሄሳ ሲዒዳ ወዴ (ሺንቻሌ ሄሳ ማላባ ኤሆፕ) ያገደሶና።

17 ዩሱሲ ኤንታ ጫዲ ያሊዲ፣

«ማተን ለገሞቤ ከዲያ አሳቲ ቦሪዳ ሹቻይ፣ ከላሰ ማላኔ ማኖቴሉ ኢሚያ ኡባፌ አዲያ ሹቸ ገዲሰ) ጌቲቲዲ ዓፊቲዳይሳ ቢርሼላይ አይቤ? 18 ሄ ሹቻ ቦላ ኩንዲያ ኡባይ ቆፃታና፣ ሹቻይ ኢያ ቦላ ወዳያ ኡባይ ሊቀና» ያገሰ።

19 ሂጌ አስታማሬቲኔ ካሂኔ ሃላቃቲ ሃ ለሚሶይ ኦዴቲዳይ ኤንታ ቦላ ገዴይሳ ኤሪዲ ሄ ወዴ ኢያ ኦይካናው ኮዩደሶና፣ ሺን አሳሰ ባቢደሶና።

ገራባ
(ማቶ 22:15-22፤ ማር 12:13-17)

20 ሄሳ ገሹ፣ ዩሱሳ ዳሪያ ሃሪያ ሮሜ ካወዋ ማታሰ አሉ ኢማናው ኮዩዲ ኢያ ደናፔ ባላ ቃላ ናጎሶና። ሄሳ ፖሊሳናው ዲሎ ዳኒዲ ጨሚያ አሳታ ኢያኮ ከቲደሶና። 21 ከቲቲዲ ቢዳ አሳቲ፣

«አስታማሪያው፣ ኔኒ ኦዴይሲኔ ታማርሴይሲ ሊኬ ገዴይሳ፣ ቃሲ ያሳ ኦጊያ ቱማቴላን ታማርሴይሳኔ ኦናካ ሻኮናይሳ ኑ ኤሮሰ።

22 ሃናሺን፣ ሮሜ ካወዋሰ ገራ ገራናው ቤሲ ቤሴኔ?» ያገዲ ኢያ ኦይቸደሶና።

23 ሺን ኢ ኤንታ ወዳና ኢታቴላ ኤሪዳ ገሹ 24 «እኔ ታና ኢሲ ሳንቲሜ ቤሲቲ፣ ኢያ ቦላ ዳዒያ ሚሲሌይኔ ሱንላይ ኦዴባዬ?» ያገሰ።

ኤንቲ ዛሪዲ፣ «ሮሜ ካወዋ ቄሳራይሳ» ያገደሶና።

25 ኢ ዛሪዲ፣ «ማተኮ፣ ቄሳራይሳ ቄሳራሪ፣ ያሳይሳ ያሳሰ ኢሚቴ» ያገሰ።

26 ሄሳ ገሹ፣ ኢ ዛሪዳ ዛራዋን አሳ ሲንላን ባላ ዳማናው ዳንዳዒቦኮና። ኢያ ዛራዋን ማላሌቲዲ ሲዒ ገደሶና።

ሃይቆፔ ዴንደባ
(ማቶ 22:23-33፤ ማር 12:18-27)

27 ሃይቆፔ ዴንደይ ባዋ ያጊያ ሳዲቃዊታፔ ኢሶቲ ኢሶቲ ዩሱሳኮ ዩዲ፣ 28 «አስታማሪያው፣ ኢሲ አሲ ማቾ ኤኪዲ ናዓ ዩሎና ሃይቁኮ፣ ኢያ አሻይ ሄ ማጫሲው ኤኪዲ ናይታ ዩሊዲ ባ አሻሰ ዜሬሉ አሻና ሜላ ሙሴይ ፃፊሰ። 29 ሄኮ ላፑን አሻቲ ዴዎሶና። ኮይሮይሲ ማቾ ኤኪዲ ናዓ ዩሎና ሃይቁሰ። 30 ናዋዓንላይ ኢዮ ኤኪዲ ናዓ ዩሎና ሃይቁሰ። 31 ሄቫንላይካ ሄሳላ ሃኒሰ። ላፑናቲ ኡባይ ሄሳዳ ሃኒዲ ኢዮ ኤኪደሶና፣ ሺን ናዓ ዩሎና ሃይቁደሶና። 32 ወርሴላን ማጫሲያ ሃይቃሱ። 33 ሄዛ፣ ላፑን አዴይ ኢዮ ኤኪዳ ጊሾ ሃይቆፔ ዴንዲያ ዋዴ ኢያ ኦዴ ማቾ ጊዳኔ?» ያጊዲ ኦይቺደሶና።

34 ዩሱሲ ዛሪዲ፣ «አሳይ ሃ ዋዲያን ኤኮሶናኔ ጌሎሶና። 35 ሺን ሃይቆፔ ዴንዲዲ ያና አላሚያን ዳናው ቤሴይሳቲ ኤኮኮናኔ ጌሎኮና። 36 ኤንቲ ኪታንቾ ሜላ ጊዲያ ጊሾ ሲንላፊ ሃይቆኮና። ሃይቆፔ ዴንዲዳ ጊሾ ኤንቲ ዎሳ ናይታ። 37 ሙሴይ ጎዳ፣ (ኣብራሃሜ ጎዳ፣ ዩሳቃ ጎዳ፣ ያይቆባ ጎዳ) ጊዲ ቱሺያ ጊደን ፀጌቲያ ታማ ታሪኪያ ፃፊዳይሳን ሃይቁዳ አሳይ ዴንዴይሳ ቤሴሰ። 38 ኡባይ ኢያው ዴዎን ዴዔይሳታ ጊዲያ ጊሾ ኢ ዴዎን ዴዔይሳታ ጎዳፔ አቲን ሃይቁዳይሳታ ጎዳ ጊዴና» ያጊዲ ዛሪሰ።

39 ሂጌ አስታማሪታፔ ኢሶቲ ኢሶቲ፣ «አስታማሪያው፣ ሎዎባ ኦዳዳሳ» ያጊደሶና። 40 ሄሳፊ ጌዬ፣ ሃራ ኦይሾ ኦይቻናው ያዩደሶና።

ኪሪሰቶሲ ኦዴ ናዔ
(ማቶ 22:41-46፤ ማር 12:35-37)

41 ኢያፔ ካሊዲ ዩሱሲ ኤንታኮ፣ «አሳይ ኪሪሰቶሳ ዋቲዲ ዳዊቲ ናዓ ያጎና? 42-43 አይሰ ጊኮ፣ ዳዊቲይ ባ ሁዔን ባ ማፃፋን፣

«ዎሳይ ታ ጎዳኮ «ታ ኔ ሞርኬታ ኔ ቶሆይ ዩዲያሶ ኦላና ጋካናው ታፔ ኡሻቻ ባጋን ኡታ» ገሰ» ያጊሰ።

44 «ሄዛ፣ ዳዊቲይ ኪሪሰቶሳ፣ ሳዳ ጊዲ ዪጊሼ ኢያው ናዓ ዋኒዲ ጊዲ?» » ያጊሰ።

20:27 ሃ.ኦ 23:8 20:28 ዛሬ 25:5 20:37 ኪሳ 3:6 20:42-43 ማዝ 110:1

45 ዳዕይ ኡባይ ሲቢሽን ባ ታማሬታኮ፡ 46 «አዲሳ ማዖ ማዒዲ ዩሽ ዳሴይሳታ፡ ጊያን ቦንቾ ሳርቶ፡ አይሁዳ ዋሳ ኬላን ቦንቾ ኦይዳ፡ ሞኬቲያ ሶንካ ቦንቾ ቤሲ ኮያ ሂጌ አስታማሬታ፤ ናጌቲቲ፡፡ 47 ኤንቲ አምዔታ ኬላ ካሎዮሶና፡ ዪሎ አሲ ዳኒዲ ዋሳ አዲሶሶና፡ ኤንቲ ኢታ ፐርዳ ኤካና» ያገሰ፡፡

21

አምዔ ሙፃታ
(ማር 12:41-44)

1 ዴሬ አሳይ ያሳ ኬላን ሙፃታ ሳዒኒያን ዩጊሽን ዩሱሲ ጶቁ ጊዲ አሳ ቤዒሰ፡፡ 2 ቃሲ ኢሲ ማንቆ አምዒያ ናምዑ ሲከና ዩጊሽን ቤዒዲ፡፡ 3 «ታ ሂንቴው ቱማ ኦዳይስ፤ ሃ ማንቆ አምዒያ ኡባሬ አላዳ አማሱ፡፡ 4 አይስ ገኮ፡ ሃ አሳ ኡባይ ባንታው ዴዒያባ፤ አማደሶና፡ ሽን ኢያ ባ ፓጩያ፤ ባው ዴዒያ አቁዋ ኡባ አማሱ» ያገሰ፡፡

ዉርሴላ ዋዲያ ማላታታ
(ማቶ 24:3-14፤ ማር 13:3-23)

5 ዩሱሳ ታማሬታ፤ ኢሶቲ ኢሶቲ ያሳ ኬላይ ዳር ሎዒያ ሹቻኒኔ አሳይ ያሳሰ አሚዳ አምታን ሎዒዳይሳ ኦዳቶሶና፡፡ 6 ሽን ዩሱሲ፡ «ሃ ሂንቴ ቤዒያባይ ኡባይ ላሌቶና፡ ሹቺ ሹቻ ቦላ ገምቤቲዳ ሜላ አቶና ዋዴይ ያና» ያገሰ፡፡

7 ኤንቲካ፡ «አስታማሪያው፡ ሃ ኡባይ ሃናይ አዉዴ? ቃሲ ሃይሲ ሃናይሳሰ ማላታይ አይቤ?» ያገዲ ኦይቺደሶና፡፡

8 ዩሱሲ ያገዲ ኤንታው ዛር አሚሰ፡ «ባሌቶና ሜላ ናጌቲቲ፡፡ ደርቲ፡ ታኒ ከሪሰቶሳ፡ ዋዴይ ማታቲሰ» ያገሼ ታ ሱንላን ያና፡ ሽን ሂንቴ ኤንታ ካሎፊቲ፡፡ 9 ሂንቴ ኦላባኔ አሳ ጌላቴላ ሲዒያ ዋዴ ዳጋሞፊቲ፡፡ ሄሲ ሲንላቲዲ ሃናይሲ አቶናባ ጊዲያ ገሾ ዋዴያ ዉርሴላይ ኤሌሲዲ ዩና» ያገሰ፡፡

10 ካሊዲካ፡ «ዳሬይ ዳሪያ ቦላ፡ ካዎቴላይ ካዎቴላ ቦላ ዴንዳና፡፡ 11 ጌታ ቢታ ቃፆይ ሃናና፡ ኮሻይኔ ጋዶይ ዴማ ዴማ ቤሳን ዳራና፡ ያሽያባይኔ ጌታ ማላታቲ ሳሎ፤ ቆንጫና፡፡ 12 ሽን ሃ ኡባይ ሃናና፤ ሲንጼ ታ ሱንላ ገሾ ጊዲ አሳይ ሂንቴና ጎዳናኔ ኦይካና፡፡ አይሁዳ ዋሳ ኬላኒኔ ቃሾ ኬላን ሂንቴና ዩጋና፡፡ ካዎታ ሲንጼኔ ዳሪያ ሃሪይሳታ ሲንጼ ሂንቴና ኤፋና፡፡ 13 ሄሲካ ታባ ሂንቴ ኤንታው ማርካታናው ሎዖ ኦጌ ጊዳና፡፡ 14 ሄሳ ገሾ፡ ሂንቴ ኦይሹቲያ ዋዴ ዋይጊዲ ዛር አማኔ ጊዲ ሂንቴ ዋዛናን

ኢንዱቶና ማላ አከከቱ። 15 አይስ ጊኮ፡ ሂንቴ ሞርኬቴ ሂንቴራ ኤቄታናውኔ ፓላማናው ዳንዳያና ዶናኔ ጨንጫቴሌ ታ ሂንቴው ኢማና። 16 ሃሪ አቶሺን፡ ሂንቴና ዩሊዳይሳቲ፡ ሂንቴ አሻቲ፡ ሂንቴ ዳቦቲኔ ላጌቲ ሂንቴና አሌ ኢማና። ሂንቴ ጊዶፌ ኢሶታ ኢሶታ ዎቆና። 17 ታ ሱንሳ ጊሾ አሳ ኡባ ሲንሳን ሂንቴ ኢጻቲዳይሳታ ጊዳና። 18 ሺን ሃሪ አቶሺን፡ ሂንቴ ቢናናፔ ኢሶይካ ቆይና። 19 ፖሎ ዳንዳዳን ሂንቴ፡ ሂንቴ ሽምፑዎ አሻና።»

20 «ዩራሳላሜ ካታማይ ዎታዳሬን ዲሬቲዲ ኡቲዳሺን ሂንቴ ቤዲኮ ኢያው ቆይይ ማታቲዳይሳ ኤሪቲ። 21 ሄ ዎዴ ዩሁዳን ዴዲያ ኡባይ ዴሪያኮ ባቃቶ፡ ካታማን ዴዴይሳቲ ያፔ ከዮ፡ ገፃሪያን ዴዴይሳቲ ካታማ ጌሎፖ። 22 አይስ ጊኮ፡ ሃ ፃፌቲዳባይ ፖሎታና ማላ ሄሲ ያሳይ ኩሽ ዛሪያ ዎዴ። 23 ሳዓ ቦላ ጊታ ማቶይ ያና፡ ሄሳንካ አሳ ቦላ ያሳ ሃንቆይ ያና። ሄሳ ጊሾ፡ ቃንሳቲዳይሳታኔ ቆንሌይሳታ አይ። 24 ኤንቲ ማሻን ሃይቃና፡ አሳ ኡባይ አላጋ ቢታ ዲዴታና። አይሁዴ ጊዶና አሳ ዎዴይ ፖሎታና ጋካናው ዩራሳላሜይ ኤንታናን ዩጼቲዳይሳ ጊዳና።

25 «አዎን፡ አጌናኒኔ፡ ያለንቶታ ቦላ ማላታቲ ሃኒዲ ቤንታና። አባፌኔ ዙሊያ ዴሹዎፔ ዴንዳይሳን ቢታን ዴዲያ አሳይ ኢንዱታናኔ ያርካና። 26 ሳሉዎ ዎልቃቲ ቡቄታና ጊሾ አሳይ ያሻኒኔ ቢታ ቦላ አይቢ ሃናንዴሻ ጊዲ ናንን ባንታና ባሌታና። 27 ሄ ዎዴ አሳ ናዓይ ዎልቃኒኔ ጊታ ቦንቹዎን ሻራራ ዩሺን ኤንቲ ቤዳና። 28 ሂንቴ አቶቴላይ ማታቲዳ ጊሾ ሃ ሃኖቲ ፖሎቴሌ ኦይኪያ ዎዴ ጊጌቲ ኤቄቲ፡ ሂንቴ ሁዲያ ቆቄ ኦሊዲ ጻለቲ» ያጊሰ።

29 ካሊዲካ፡ ሃይሳዳ ጊዲ ለሚሶ ኦዲሰ፡ «ባላሴ ሚላኔ ሃራ ሚላታ ኡባ ቤዒቲ። 30 ኤንቲ አጨያ ዎዴ ቶርቹይ ማታቲዳይሳ ሂንቴ ኤሬታ። 31 ሄሳዳ ሃ ሃኖቲ ፖሎቲሺን ሂንቴ ቤዒኮ ያሳ ካዎቴላይ ማታቲዳይሳ ኤሪቲ።

32 «ታ ሂንቴው ቱማ ኦዲይሰ፤ ሃ ኡባይ ፖሎታና ጋካናው ሃ ዩሎቴላይ አጼና። 33 ሳሉይኔ ሳዓይ አቆና፡ ሺን ታ ቃላይ አጼና።

34 «ሂዛ፡ ቆሲ ባይና ዴያን፡ ኡሻ ዳርኒኔ ዲሳባሰ ኢንዱቴላን ሂንቴ ዎዛናይ ኦይኪቶና ማላኔ ሄ ቃማይ አኬኮና ጻሂዳ ሂንቴ ቦላ ጋኮና ማላ ናጌቲቲ። 35 ሄ ቃማይ ቢታ ኩሚላን ዴዲያ ኡባ

21:14 ሉቃ 12:11-12 21:22 ሆሴ 9:7 21:25 ኢሳ 13:10፤ ሂዛ 32:7፤ ኤር 2:31፤ ዮ.ቆ 6:12 21:27 ዳኔ 7:13፤ ዮ.ቆ 1:7

ቦላ ጋካና። 36 ሄሳ ገሾ፣ ያ ኢታፔ ኣታናወኔ ኣሳ ናዓ ሲንጻን ኤቃናው ዳንዳና ማላ ኡባ ዎዴ ማኒዲ ዎሲቱ» ያገሰ።

37 ጋላስ ጋላስ ዩሱሲ ያሳ ኬጻን ታማርሲሼ፣ ቃማ ቃማ ሻማሆ ዳሪያ ቦላ ኬዪዲ ኣቁሰ። 38 ኣሳይ ኡባይ ኢያ ሲዓናው ዎንታ ጉራ ኢያኮ ያሳ ኬሌ ዮሶና።

22

ዪሁዲ ዩሱሳ ኣሌ ኢማናው ማቁቲስ

(ማቶ 26:1-5፣ 14፣ 16፣ ማር 14:1-2፣ 10-11፣ ዮሃ 11:45-53)

1 ሄ ዎዴ (ፋሲካ) ያገያ ኡይፋ ባሌይ ማቲስ። 2 ካሂኔ ሃላቃቲኔ ሂኔ ኣስታማሪቲ ኣሳስ ያዪዳ ገሾ ዋቲዲ ዩሱሳ ባንታ ገደፌ ጳይሳኔኮ ኦኔ ኮዮሶና። 3 ያላሂይ ታማኔ ናሞታፔ ኢሱዋ ገዲዳ ኣስቆርታ ዪሁዲ ጌቲቲይሳ ገደ ጌሊስ። 4 ዪሁዲ ካሂኔ ሃላቃታኮኔ ያሳ ኬፋ ናጌይሳታ ሃላቃታኮ ቢዲ ዩሱሳ ዋቲ ኣሌ ኢማኔኮ ኤንታራ ማቁቲስ። 5 ኤንቲካ ሄሳን ኡፋይቲዲ ማሼ ኢማናው ኢያራ ዘሪቲደሶና። 6 ኢካ ዘሪቲፋን ገገሰ። ኣሌ ኤንታው ኢማናው ኣሲ ባይና ኢንጃ ዎዴ ናገሼ ዳዔስ።

ወርሴፋ ካሁዋ

(ማቶ 26:17-25፣ ማር 14:12-21፣ ዮሃ 13:21-30)

7 ሄሳፌ ጉዬ፣ ፋሲካ ደርሳይ ሹኬቲያ ኡይፋ ባሌይ ጋኪስ። 8 ዩሱሲ፣ «ፋሲካ ካሁዋ ማና ማላ ቢዲ ኑስ ገገሰቲ» ያገዲ ጳደርሳኔ ዮሃኒሳ ኪቲስ። 9 ኤንቲ፣ «ኑ ኣወን ገገሳና ማላ ኔ ኮያይ» ያገዲ ኦይቺደሶና። 10 ኢ ኤንታኮ፣ «ሂኮ ሂንቲ ካታማ ጌሊሺን ሃላ ኦቶ ቶኪዳ ኣዳይ ሂንቲራ ጋሂታና። ኢ ቢዲ ጌሊያ ኬፋ ኢያ ካሊዲ ጌሊቲ። 11 ኬፋዎኮ ኣስታማሪይ፣ ታ ታ ታማሪታራ ዎላ ፋሲካ ካሁዋ ማናው ኢማፋ ኬሌ ኣወኔ? ያገሰ» ገቲ። 12 ኢ ፖቂያ ቦላ ሂፃቲዲ ገገዲ ዳዒያ ዳልጋ ኪፊሌ ሂንቲና ቤሳና፣ ያን ገገሰቲ» ያገሰ። 13 ኤንቲ ቢዲ ዩሱሲ ገዳይሳዳ ሃንገ ዳሚደሶና። ፋሲካ ባሌ ካሁዋ ያን ገገሰደሶና። 14 ሳቲይካ ጋኪዳ ዎዴ ዩሱሲ ሃዋሪታራ ዎላ ካሁዋ ቦላ ኡቲስ። 15 ኢ ኤንታኮ፣ «ታ ዎዬ ኤካናፔ ሲንጻ ሃ ካሁዋ ሂንቲራ ማናው ዳር ኣሞታስ። 16 ሂዛ፣ ሲዒቲ! ያሳ ካዎቲፋን ሃይሳስ ቢርሼላይ ፖሌታና ጋካናው ሃ ካሁዋ ዛራዳ ማኬ» ያገሰ። 17 ኡሻ ኤኪዲ ጋላቲ ሲሚዲ፣ «ሂዒቲ ሃይሳ ሂንቲ ገደን

ሻኬቲቴ። 18 ሲባይ! ያሳ ካዎቴላይ ያና ጋካናው ሃቺፌ ደማዳ ሃ ዎይኔ ኡሻፌ ዛራዳ ኡዩኬ» ያገሰ።

19 ኡይላ ኤኪዲ፣ ጋላቲ ሲሚዲ፣ «ሃይሲ ሂንቴው ኢሜቲያ ታ ኣሹዋ። ሃይሳ ኦሊሼ ታና ቆፒቴ» ያገዲ ሜንሊዲ ኤንታው ኢሚሰ።

20 ሄሳዳካ፣ ካሁዋፔ ጉዬ ኡሻ ኤኪዲ፣ «ሃ ኡሻይ ሂንቴው ጉኪዳ ታ ሱላን ገዲያ ኦራላ ጫቁዋ። 21 ገደሺን፣ ታና ኣሊ ኢማና ኡራ ኩሼይ ታራ ኢሲፌ ጋይታና። 22 ኣሳ ናዓይ ኢያው ጌቴቶይሳ ማላ ሃይቃናው ዴዔስ፣ ሺን ኢያ ኣሊ ኢሚያ ኡራ ኣዬ» ያገሰ። 23 ኤንቲ ባንታ ገደን፣ «ሃይሳ ኦኒ ኦላኔ» ገዲ ዎሊ ኦይቺደሶና።

24 ቃሲ ኤንታ ገደን ገታ ገደናይ ኦኔ ገያ ፓላሚ ማዴቲሰ። 25 ዬሱሲ ኤንታኮ፣ «ዴሪያ ካዎቲ ባንታ ኣሳ ዎልቃን ሃርሶና፤ ባንታ ዴሪያ ቦላ ጎዳቴይሳታሰካ ባንታና፣ (ሎያ ኦሊይሳታ) ያገዲ ጭጎሶና። 26 ሺን ሂንቴ ገደን ሄሳ ማላ ገደፖ። ሂንቴ ገደን ባይራቴይ ካሎዳ ሃና፤ ካሌሌይሲ ካሌይሳዳ ሃና። 27 ሃናሺን፣ ሞኬይሳፌኔ ሞኬቴይሳፌ ኣዉሲ ኣዲ? ሞኬቴይሳ ገደኔዬ? ሺን ታኒ ሂንቴ ገደን ሞኬይሳ ማላ።

28 «ሂንቴካ ታ ሜቱዋን ታፔ ሻኬቶና ታራ ሚኒዲ ኤቂዳይሳታ። 29-30 ሂንቴ ታ ጋይታፔ ማና ማላ፣ ኡያና ማላኔ ኣራታታ ቦላ ኡቲዲ ታማኔ ናሞፀ ኢሰራዔሌ ሹሻታ ቦላ ፒርዳና ማላ ታ ኣዎይ ታና ሹሚዳይሳዳ ታካ ሂንቴና ታ ካዎቴላን ሹማና» ያገሰ።

31 ካሊዲካ ዬሱሲ፣ «ሲሞና፣ ሲሞና፣ ፃላሄይ ሂንቴና ገሰቴዳ ሃርቃናው ዎሲሰ። 32 ሺን ታኒ ኔ ኣማኖይ ቆዮና ማላ ኔው ጋናታሰ። ኔካ ሲሚዳ ዎዴ ኔ ኢሻታ ሚንላ» ያገሰ።

33 ሲሞኒ፣ «ጎዳው፣ ታኒ ኔራ ቃሹታናዉኔ ሃይቃናው ገጌታሰ» ያገሰ።

34 ዬሱሲ ጳዴርሳኮ፣ «ታ ኔው ኦዳይሰ፤ ሃቺ ኩቶይ ዋሳናፔ ሲንሌ ኔ ታና ሄቩ ቶሆ ካዳና» ያገሰ። 35 ካሊዲካ፣ ዬሱሲ ኤንታኮ፣ «ታኒ ሂንቴና ኮሮጃይ፣ ካርጳቴይኔ ጫሚ ባይና ከቲዳ ዎዴ ሂንቴው ፓጪዳባይ ዴዒ?» ያገዲ ኦይቺሰ።

22:20 ኤር 31:31 22:21 ማዝ 41:9 22:24 ማቶ 18:1፤ ማር 9:34፤ ሉቃ 9:46 22:25 ማቶ 20:25-27፤ ማር 10:42-44 22:26 ማቶ 23:11፤ ማር 9:35 22:27 ዮ.ቆ 13:12 22:29-30 ማቶ 19:28 22:35 ማቶ 10:9-10፤ ማር 6:8-9፤ ሉቃ 9:3

ኤንቲ ዛሪዲ፡ «አይኮይካ ፓጨቤና» ያገደሰና።

36 ኢ ኤንታኮ፡ «ሃዒ ኮርጅይኔ ካርዒቲይ ዴዔይ ኦይኮ፤ ማሺ ባይናይ ባ አፊላ ባይዚዲ ማሻ ሻሞ። 37 ሃ ሲዒቲ! ጌላታራ ታይቤቲስ» ጌቲቲዲ ፃፊቲዳይሲ ታናን ፖሌታናው ቤሴስ። ኤ፥ ታ ገሺ ፃፊቲዳባይ ፖሌቲይሲ ቱማቲስ» ያገሰ።

38 ኢያ ታማሬቲ፡ «ጎዳው ሃይሳን ናሞዑ ማሺ ዴዔስ» ያገደሰና።

ኢ፡ «ገዳና» ያገሰ።

ዩሱሲ ሻማሆ ዴሪያ ቦላ ዋሲስ

(ማቶ 26:36-46፤ ማር 14:32-42)

39 ዩሱሲ ካሴ ሜዘቲዳይሳዳ ዴንዲዲ ሻማሆ ዴሪያ ቦላ ከዩስ። ኢያ ታማሬቲ ኢያ ካሊደሰና። 40 ሄ ቤሳ ጋኪዳ ዋዴ «ፓጨን ጌሎና ሜላ ዋሲቲ» ያገሰ። 41 ኤንታፌ ሹቺ ሆሊን ጋኪያ ሶ ሜላ ሃኪዲ ጉልባቲዲ ዋሲስ። 42 «ታ አዋው፥ ኔ ሹኔ ገደኮ ሃ ሜቱዋ ታፔ አላ። ሺን ታ ሹኔ ገደፖ ኔ ሹኔይ ሃና» ያገደደ ዋሲስ። 43 ኪታንቸይ ሳሎፔ ቆንጨዲ ሚንሊስ። 44 ዳር ኤንዔቲዲ ሚንሊዲ ዋሴስ። ኢያ ጫዋይካ ሱሊ ያኪያዳ ሳዓን ያኬስ።

45 ዩሱሲ ዋሳ ዉርሲዲ ባ ታማሬታኮ ዩስ። ኤንቲ፡ አዛኒያፔ ዴንደይሳን ዳቡሪዲ ጳስኪዳሺን ዴሚዲ፥ 46 «አይስ ጳስኬቲ? ፓጨን ጌሎና ሜላ ዴንዲዲ ዋሲቲ» ያገሰ።

ዩሱሲ ኦይኬቲስ

(ማቶ 26:47-56፤ ማር 14:43-50፤ ዮሃ 18:3-11)

47 ኢ ቡሮ ኦዳ ቦላ ዴዒሺን ዳር አሳቲ ዩደሰና። ታማኔ ናሞዓታፔ ኢሶይ ዩሁዳ ጌቲቲይሲ ኤንታና ካሌሌስ። ኢ ዩሱሳ ዩራናው ማቲ ሸቂስ። 48 ሺን ዩሱሲ፡ «ዩሁዳ፥ አሳ ናዓ ዩራዳ አላ አማኔ?» ያገሰ።

49 ዩሱሳ ታማሬቲ ሄ ሃኑዋ ቤዒዲ፡ «ጎዳው ማሻን ሾጨና?» ያገደሰና። 50 ኤንታ ገደፌ ኢሶይ ካሂኔ ሃላቃ ኦሳንቸዋ ሾጨዲ ኡሻቻ ሃይላ ቃንፃዲ ዩገሰ።

51 ሺን ዩሱሲ፡ «አጋ! ዲጎፊቲ» * ያገሰ። ኡራ ሃይላ ቦቺዲ ፓሊስ።

22:37 እሳ 53:12 * 22:51 አጋ! ዲጎፊቲ፡ ዩሱሲ ሃ ቤሳን አጋ ያገደይ ኢያ አሻናው ገደ አሳቲ ኡራ ሃይላ ቃንፃይሳ አጋ ቃንፃፋ ገደይሳኔ፥ ሃራቲ ኢያ ኦይካናው ዩዳይሳታ ዲጎፊቲ ሃዒ ኤንታ ዋዴ ያገደይሳ ናሞዑ ቆፋታ ዋሊ ጋሊዲ ኦይኪስ።

52 ሄሳፌ ጉዬ፣ ዩሱሲ ባና ኦይካናው ዪዳ ካሂኔ ሃላቃታኮ፣ ያሳ ከላ ናጌይሳታ ሹማታኮኔ ጨማታኮ፣ «ፓኖ ኦይኪያ ኣሳዳ ማሼኔ ፃምዓ ኦይኪዲ ዪዳቲ? 53 ኡባ ጋላስ ያሳ ከላን ታ ሂንቴራ ዴዲያ ዎዴ ታ ቦላ ኩሼ ዎሊቤኬታ። ሺን ሃይሲ ዱማ ካዎቴሳይ ሃሪዳ ዎዴኔ ሂንቴ ዎዴ» ያገሰ።

ጳጳሮሲ ዩሱሳ ካዲስ
(ማቶ 26:57-58፣ 67-75፤ ማር 14:53-54፣ 66-72፤ ዮሃ 18:12-18፣ 25-27)

54 ሄሳፌ ጉዬ፣ ዩሱሳ ኦይኪዲ ካሂኔ ሃላቃ ዛባ ኤፊደሶና። ጳጳሮሲ ሃሆን ዩሱሳ ካሌስ። 55 ኣሳቲ ካሂኔ ሃላቃ ዛባን ታማ ኤሌዲ ዎላ ኡቲዳሺን ጳጳሮሲ ኤንታራ ኢሲፌ ኡቲስ። 56 ኢሲ ኣይሊያ ጳጳሮሲ ታማ ማታን ኡቲዳይሳ ጫዳ ፃላዳ፣ «ሃ ኡራይ ኢያራ ዴዴስ» ያጋሱ።

57 ሺን ጳጳሮሲ፣ «ሃ ማጫሴቴ ታ ሄ ኡራ ኤሪኬ» ያገዲ ካዲስ።

58 ጉላ ዎዴፕ ጉዬ ኢሲ ሃራ ኣዳይ ኢያ ቤዒዲ፣ «ኔካ ኤንታፌ ኢሱዎ» ያገሰ።

ሺን ጳጳሮሲ፣ «ሃ ኣዲያው ታና ገዲኬ» ያገሰ።

59 ኢሲ ሳቲ ማላ ጋምዒዳፕ ጉዬ ኢሲ ሃራ ኣዳይ ቲሊሲዲ፣ «ሃ ኡራይ ጋላላፕ ገዲያ ገሾ ሲዴይ ባይና ኢያራ ዴዴስ» ያገሰ።

60 ሺን ጳጳሮሲ፣ «ሃ ኣዲያው፣ ኔ ጌይሳ ታ ኤሪኬ» ያገሰ። ኢ ሄ ኦዳ ኦንጎና ዴዲሺን ኩቶይ ዎሲስ።

61 ጎዳይ ጉዬ ሲሚዲ ጳጳሮሳ ፃሊስ። ጳጳሮሲ፣ «ሃቺ ኩቶይ ዎሳናፕ ሲንሌ ኔ ታና ሄቩ ቶሆ ካዳና» ያገዲ፣ ጎዳይ ኦዲዳ ቃላ ኣኬኪስ። 62 ጳጳሮሲ ካሪ ከዪዲ ዳሮ ኮኮሪዲ ዩኪስ።

63 ዩሱሳ ናጊያ ኣሳቲ ኢያ ለቂሶኔ ዳሼላ ኦይኪደሶና። 64 ኢያ ኣይፊያ ጎዲዲ «ኣኔ ቲንቢቴ ኦዳ፤ ኔና ዴቺዳይ ኣኔ?» ያገዲ ኦይቸሶና። 65 ሃራ ዳሮ ጫሼ ጫዪዲ ካወሾሶና።

ዩሱሲ ጲላያሳ ሲንሌኔ ሄርዲሳ ሲንሌ ሺቂስ
(ማቶ 26:59-66፤ ማር 14:55-64፤ ዮሃ 18:19-24)

66 ሳዒ ዎንቴያ ዎዴ ኣይሁዳ ቢታ ጨማቲ፣ ካሂኔ ሃላቃቲኔ ሂጌ ኣስታማሬቲ ሺቂዲ፣ ዩሱሳ ባንታ ሲንሌ ሺሺደሶና።

67 ኤንቴ፣ «ኔኔ ኪሪስቶሴ? ኣኔ ኑስ ኦዳ?» ያገዲ ኦይቺደሶና።

ዮሴፊ፡ «ታ ኦሊያኮ አማኔኬታ። 68 ታ ኦሊያኮ ዛሬኬታ።
69 ሺን አሳ ናዓይ ሃይሳፊ ጌዳ ባጋን ዋልቃማ ያሳ ኡሻቻ ባጋን
ኡታና» ያገሰ።

70 ሄ ዋዴ ኡባይ፡ «ያቲን፡ ኔኒ ያሳ ናዔ?» ያገደሶና።

ኢ፡ «ታ ያሳ ናዓ ገዴይሳ ሂንቴ ገዴታ» ያገሰ።

71 ኤንቲ፡ «ሂዛ፡ ሃራ ማርካ አይ ኮሺ? ኢ ባ አንፃርሳን
ኡዲሺን ኑ ሰዒዳ» ያገደሶና።

23

ዮሴፊ ጲላዎሳ ሲንሳን

(ማቶ 27:1-2፣ 11-14፣ ማር 15:1-5፣ ዮሃ 18:28-38)

1 ሄ ቤሳን ሸቂዳ ሻንጎቲ ኡባይ ዳንዲዲ ዮሴፊ ጲላዎሳኮ
ኤፊደሶና። 2 «ሃ ኡራይ ኑ አሳ ባሌሊሺን፡ ካዉቀሰ ገራ ገርና
ሜላ ዲገሺኒኔ ቃሲ፡ ታኒ ከሪሰቶሳ ሂንቴ ካዉቀ) ያገሺን
ዴሚዳ» ያገዲ ሞቲደሶና።

3 ጲላዎሲ ዮሴፊ፡ «ኔኒ አይሁዴታ ካዎዬ?» ያገዲ ኦሊቸሰ።

ዮሴፊ፡ «ኤ፡ ኔ ገዴይሳ ሜላ» ያገሰ።

4 ጲላዎሲ ካሂኔ ሃላቃታኮኔ አሳኮ፡ «ሃ ኡራ ቦላ ታኒ ኢሲ
ባላካ ዴማቢኬ» ያገሰ። 5 ሺን ኤንቲ፡ «ሃ ኡራይ ጋሊላፔ ደሚዲ
ሃይሳ ጋካናው ዩሁዳ ኩሜሳ ኢታባሰ ዴንሌሌሰ» ያገዲ ሚንሌ
ኡዲደሶና።

6 ጲላዎሲ ሄሳ ሰዒዳ ዋዴ ዮሴፊ ጋሊላ አሴኮ ኤራናው
ኮዩዲ ኢያ ኦሊቸሰ። 7 ዮሴፊ ሄርዲሳ ቢታፊ ዩዳ አሲ ገዴይሳ
ጲላዎሲ ኤሪዳ ዋዴ ሄርዲሲ ሄ ዋዴ ዩሩሳሌሜን ዴዒያ ገሾ
ኢያኮ ዩዲሰ።

8 ሄርዲሲ ዮሴፊ ቤዓናው ዳር ዋዴፔ ኮዩሼ ዴዒያ
ገሾ ኢያ ቤዒዳ ዋዴ ዳር ኡፋይቲሰ። አይሰ ገኮ፡ ኢያባ
ሰዒዳ ገሾ ማላሊሲያባ ኦሊን ቤዓናው አሞቲሼ ዴዒሰ።

9 ሄርዲሲ ዮሴፊ ዳር ኦሊቸሰ ኦሊቸሰ፡ ሺን ኢ አይኮካ
ዛሪቤና። 10 ካሂኔታ ሃላቃቲኔ ሂጌ አሰታማሬቲ ያን ኤቂዲ
ሚንሌዲ ኢያ ሞቶሶና። 11 ሄርዲሳራኔ ኢያ ዋታዳሬታራ ዮሴፊ
ካጲደሶናኔ ለቂሲደሶና። ቦንቸ አፊላ ማይዚዲ ጲላዎሳኮ ዛሪዲ
ዩዲደሶና። 12 ሄርዲሳራኔ ጲላዎሳራ ካሴ ሞርኬሺን ሄ ጋላሰ
ዋላ ገገደሶና።

13 ጲላዎሲ ካሂኔ ሃላቃታ፡ አሳ ሃሪይሳታኔ አሳ ያገዲ፡ 14 «ሃ
ኡራይ አሳ ጌላቴሳሰ ዴንሌሌሰ) ገዲ ታኮ ኤሂዴታ። ታካ ሂንቴ
ሲንሳን ፐልጋዳ ሂንቴ ሺሺዳ ሞቲዋሰ አይቢ ባላካ ዴማቢኬ።

15 ሄሮዲስ፣ ሄሳቶ አይቢ ባላካ ኢያ ቦላ ዳሚቦና ጊሾ ኑኮ ዩዲስ። ተማካ ሃ ኡሪይ ሃይቆስ ጋሴያ አይቢ ባላካ ኦሴቤና።
 16 ሄሳ ጊሾ፣ ኢያ ጋራፋዳ ቢላ ዩዳና» ያገሰ። 17 ሄሳ ኢ ጊዳይ ፋሲካ ባሌ ዋዴ ኢሲ ኣሲ ኤንታው ቢላናይሲ ኢያው ኣቶናባ ጊዲያ ጊሾሳ።

18 ዳሬይ ኡባይ ኢሲ ቦላ፣ «ሃ ኡሪ ጌዴ ዲጋ፣ ኑስ ባርባና ቢላ» ያገዲ ዋሲዶሶና። 19 ባርባኒ ካታማ ጊዶን ኣሳ ኢታባሰ ዳንጹሲዲ ኣሴ ዋዲዲ ቃሼቲዳ ኣሲ።

20 ጲላዖሲ ዩሱሳ ቢላናው ኮዩዲ ኣሳሰ ዛሪ ኦዲስ።
 21 ጊዶሺን፣ ኣሳይ፣ «ካቃ! ካቃ!» ያገዲ ዋሲዶሶና።
 22 ጲላዖሲ ሄዳን፣ «ሃ ኡሪይ ቆሂዳባይ አይቤ? ዋዲስ ጋሴያ ባላ ታ ዳማቢኮ። ሄሳ ጊሾ፣ ጋራፋዳ ዩዳ ኣጋና» ያገሰ።

23 ኤንቲ ባንታ ቃላ ጶቁ ኦሴዲ፣ «ካቋታናው ቤሴስ» ጊዲ ሚንሌ ዋሲዶሶና። ኤንታ ዋሶይካ ዖኒስ። 24 ኤንታ ኦይሻ ጊሾ ጊዲ ጲላዖሲ ኢያ ቦላ ፒርዲስ። 25 ኣሳ ኢታባሰ ዳንጹሴይሳኔ ኣሴ ዋዲዲ ቃሼቲዳይሳ ቢላና ሚላ ዋሲዶ፣ ሄ ኡሪ ኤንታው ቢሊስ። ሺን ዩሱሳ ኤንቲ ኮዩዳባ ኦላና ሚላ ኤንታው ኣሌ ኢሚስ።

ዩሱሳ ካቋዶሶና
 (ማቶ 27:31-44፤ ማር 15:21-32፤ ዮሃ 19:17-27)

26 ዩሱሳ ኦይኪዲ ኤፊሺን ሲሞና ጊያ ቂሬና ቢታ ኣዳይ ጋፃሬፔ ዩሺን፣ ዳሚዲ ማሰቃሊያ ቶሲዲ ዩሱሳ ካሊዲ ባና ሚላ ኡንዔሊዶሶና። 27 ዳር ኣሳይኔ ባንታ ቲሪ ኢጨሽ ዩኪያ ማጨሳቲ ኢያ ጉዩያሪ ካሎሶና።

28 ሺን ዩሱሲ ኤንታኮ ጉዩ ሲሚዲ፣ «ሂንቲኖ፣ ዩሩሳላሚ ማጨሳቶ፣ ሂንቲ ሁዔሲኔ ሂንቲ ናይታስ ዩኪቲፔ ኢቲን ታው ዩኮፊቲ። 29 ሂኮ ማይንላቲ፣ ዩሎና ኡሎቲኔ ቋንሶና ቋንላቲ ኣንጃቲዶሶና ሂንቲ ያጋና ጋላሳይ ያና። 30 ሄ ዋዴ ዳሬታ፣ ኩ ቦላ ኩንዲቲ፣ ዙማታካ፣ ኩና ካሚቲ ያጋና። 31 ሂዛ፣ ቃዩ ሚላ ሄሳቶ ኦሴኮ ሚላ ሚላ ዋታንዴሻ?» ያገሰ።

23:30 ሆሴ 10:8፤ ዮ.ቆ 6:16

32 ኢያራ ዋዳናው ሃራ ናምዑ ዋራንኸታ ኤፊደሶና። 33 ቁራኒዮ * ጌቲቲያ ቤሳ ጋሊዲ ካቂደሶና። ዋራንኸታ፤ ኢሱዋ ኡሻቻ ባጋራ ሃንኩዋ ሃዲርሳ ባጋራ ካቂደሶና። 34 ዩሱሲ፡ «ታ አዋው፣ ኤንቲ ኣይ ኦሊያኮ ኤርና ጊሾ ኔኒ ኤንታው ኣቶ ያጋ» ያጊሰ።

ኤንቲ ኢያ ኣፊላ ቦላ ሳማ ዩጊዲ ሻኬቲዲ ኤኪደሶና።

35 ኣሳይ ኤቁዲ ያሎሶና፤ ሺን ዴሪያ ሃራይሳቲ፡ «ሃራታ አሺሰ፤ ያሳይ ደሪዳ ኪሪሰቶሲ ኢያ ጊዲኮ ኣኔ ባና አሾ» ያጊዲ ሊቁሲደሶና። 36 ዋታዳሬቲ ኢያኮ ሺቂዲ፡ ጫላ ዋይኔ ኡሻ አሚደሶና። 37 ያቲዲ፡ «ኔኒ ኣይሁዴታ ካዋ ጊዲኮ ኔ ሁዲያ አሻ» ያጊዲ ሊቁሲደሶና።

38 ኢያው ሁዔ ባጋራ፡ «ሃይሲ ኣይሁዴታ ካዋ» ያጊያ ፀፊይ ዴዔስ። 39 ካቂቲዳ ዋራንኸታ፤ ኢሶይ ጫሼ ሳዓራ ጎቺሼ፡ «ኣኔ ኔኒ ኪሪሰቶሳ ጊዲኮ፡ ኔናካ ኦናካ አሻ» ያጊሰ።

40 ሺን ሃንኮ ዋራንኸይ፡ «ኔኒ ሃይሳ ሚላ ፐርዳን ዴዓሼ ሃሪ ኣቶሺን፤ ያሳሰ ያዩኪ? 41 ኦኒ ኦ ባላሰ ቤሲያ ፐርዳ ኤኮሰ፤ ሺን ሃ ኡራይ ኢሲ ኢታባካ ኦሊቤና» ያጊዲ ሃንቂቲስ።

42 ቃሲካ፡ «ዩሱሳ፡ ኔ ኔ ካዋቴላራ ያ ዋዴ ታና ቆፓ» ያጊሰ።

43 ዩሱሲ፡ «ታ ኔው ቱማ ኦዳይሰ፤ ሃቺ ኔኒ ታራ ጋናቴን ጊዳና» ያጊሰ።

44-45 ሄ ጋላሰ ኡሱፑን ሳቴፔ ቢዲ ኡዱፋን ሳቴ ጋካናው ኣዋይ ፖዑዋ ዲጊዲ ጊሾ ቢታ ኡባ ቦላ ቆማ ጊዲሰ። ያሳ ኬላ ማጋራጃይ ዳኬቲዲ ናምዓን ሻኬቲስ። 46 ዩሱሲ፡ ቃላ ቆቂ ኦሊዲ፡ «ታ አዋው፣ ታ ታ ሸምፐው ኔ ኩሼን ሸዳይሰ» ያጊዲ ሃይቂስ።

47 ማቶ ሃላቃይ፡ ሃኒዳይሳ ቤዒዲ፡ «ሃይሲ ኡራይ ቱማካ ያሎ» ያጊዲ ያሳ ጋላቲስ። 48 ሃ ሃኒያባ ቤዓናው ሄ ቤሳ ሸቂዳ ኣሳ ኡባይ ሃኒዳባ ቤዒዳ ዋዴ ባንታ ቲራ ኢጪሼ ባንታ ሶ ሰሚደሶና። 49 ጊደሺን፡ ዩሱሳ ማታን ኤሪያ ኣሳ ኡባይ፡ ሃሳዳካ ጋለላፔ ካሊዲ ዩዳ ማጫሳቲ ሄሳ ቤዒሼ ሃሆን ኤቂደሶና።

* 23:33 ቁራኒዮ፡ ቁራኒዮ ጌይሲ ጌሪኬ ደና። ኣራማይኬ ደናን «ጎልጎታ» ዋይኮ «ሁዔ ጉኔ» ጉሱ። ቁራኒዮ ጊያ ሰንሳይ አሚቲዳይ ዩሱሲ ካቂቲዳይ ኣሳ ሁዔ ጉኔ ዳኒያ ቤሳን ጊዲያ ጊሾሳ። ሄ ቤሳይ ሮሚ ካዋቴላይ ዋራንኸታ ካቂያ ቤሲ። (ማቶ 27፡ 33፤ ማር 15፡22፤ ዮሃ 19፡17) 23:34 ማዝ 22፡18 23:35 ማዝ 22፡18፤ ማዝ 22፡7 23:36 ማዝ 69፡21 23:44-45 ኬሳ 26፡31 23:46 ማዝ 31፡5 23:49 ሉቃ 8፡2

50-51 አይሁዳ ሻንጎታፔ ኢሶይ፣ ዮሴፋ ጌቴቲያ ኡራይ ዳዔስ። ኢ ኦርማቲያሳ ጌቴቲያ ዩሁዳ ካታማፔ ዩስ። ኢ ሎዎኔ ዊሎ ኣሲ ጊዲያ ጊሾ ያሳ ካዎቴላ ዩሳ ናጌስ። ሻንጎታፔ ኢሱዋ ጊዲሾ ኤንታ ዞራቴላኒኔ ኦሱዋን ዳና። 52 ሄ ኡራይ ጲላዎሳኮ ቢዲ፣ ዩሱሳ ኣሃ ሞጋናው ታው ኢማ ጊዲ ዋሲስ። 53 ጲላዎሲ ኤካ ያጊን፣ ዩሱሳ ኣሃ ዎጲሲዲ ኣፊላራ ፃዒስ። ዛላፌ ዎጪዲ ኬሲዲ ሃራ ኣሲ ሞጌቶና ኦራላ ዲፎን ዎሊስ። 54 ሳምባቲ ጌላና ሃኒያ ጊሾ ሄ ጋላሳይ ጌቴላ ቃማ።

55 ጋለላፔ ዳንዲዲ ዩሱሳ ካሊዲ ዩዳ ማጫሳቲ ዮሴፋራ ቢዲ ኢያ ኣሃ ዋቲ ሞጊያኮ ዱፋዎ ኣኬኪዲ ቤዒዶሶና። 56 ያፔ ሲሚዲ ሸቶኔ ቁባቲያ ገገሲዶሶና። ሃጌይ ኪቴይሳ ማላ ሳምባታ ጋላስ ሸምፔ ፔዒዶሶና።

24

ዩሱሲ ሃይቆፔ ዳንዲስ

(ማቶ 28:1-10፤ ማር 16:1-8፤ ዮሃ 20:1-10)

1 ሳሚንታፊ ኮይር ጋላስ፣ ዎጋ ዎዴ ዎንታ ዳር ጉራ፣ ማጫሳቲ ባንታ ገገሲዲ ሸቲዎ ኤኪዲ ዱፋዎ ቢዶሶና። 2 ኤንቲ ያ ጋኪያ ዎዴ ዱፋዎ ዶናን ዳዒያ ሹቻይ ጎንዴሬቲዲ ከቻይሳ ዳሚዶሶና። 3 ኤንቲ ዱፋዎ ጋሊ ጌሊዶሶና፣ ሸን ጎዳ ዩሱሳ ኣሃ ዳሚሶኮና። 4 ኤንቲ ያን ኤቂዲ ኣይቢ ሃኒዴ ጊዲ ቆፐሽን ኣኬኮና ዳር ጰሊያ ኣፊላ ማዒዳ ናምቡ ኣሳቲ ኤንታ ማታን ኤቂዶሶና። 5 ማጫሳቲ ያሸቲዲ ባንታ ሁዒያ ሳዒን ዘቂ ኦሊዲ ዳዒሽን፣ ኣሳቲ ኤንታኮ፣ «ዳዎን ዳዒይሳ ሃይቆታ ጊዶን ኣይስ ኮዬት? 6-7 ኢ ሃይሳን ዳና፤ ሃይቆፔ ዳንዲስ፣ «ኣሳ ናዓይ ናጋራንቸታ ኮሼን ኣጲ ኣሜታና፤ ኤንቲካ ኢያ ካቃና። ኢ ሄሻንሉ ቃማን ሃይቆፔ ዳንዲና) ያጊዲ፣ ኢ ሃንቴራ ጋለላን ዳዒሹ ሃንቴው ኦዲዳ ቃላ ቆፐቲ» ያጊስ።

8 ማጫሳቲ ሄ ዎዴ ኢያ ቃላ ቆፐዶሶና። 9 ማጫሳቲ ዱፋዎፔ ሲሚዲ ሃኒዳባ ኡባ ታማኔ ኢሶታሲኔ ሃራታሲካ ኦዲዶሶና። 10 ሄሳ ሃዋሬታሰ ኦዲዳይ ማግዳላ ማይራሞ፣ ዮሃና፣ ያይቆባ ኣዩው ማይራሞኔ ኤንታራ ዳዒያ ሃራ ማጫሳታ። 11 ሸን ኤንታው ማጫሳቲ ኦዲዳይሲ ኤልሞ ዳኒን ኣማኒሶኮና። 12 ሸን ጳዒርሲ ዳንዲ ዎዒዲ ዱፎ ቢስ። ሄ ቤሳ

23:56 ኪሳ 20:10፤ ዛሬ 5:14 24:6-7 ማቶ 16:21፤ 17:22-23፤ 20:18-19፤ ማር 8:31፤ 9:31፤ 10:33-34፤ ሉቃ 9:22፤ 18:31-33

ጋኪዲ ሆኪ ጋሌ ያሊያ ዎዴ ሞጎ አፊላ ፃላላ ቤዒሰ። ሃኒዳባን ማላሌተሼ ባ ሶ ሲሚሰ።

ኤማሁሴ ኦጊያ ቦላ
(ማር 16:12-13)

13 ሄ ጋላስ ካሊያ ታማሬታፔ ናምዓቲ ዩሩሳላሚፔ ታማኔ ኢሲ ኪሎ ሚቲሬ ሃኪያ ኤማሁሴ ጉታ ቦሶና። 14 ኤንቲ ዎላ ሃኒዳባ ኡባ ኦዴቶሶና። 15 ኤንቲ ሄ ሃኖታባ ቆፒሼኔ ኦዴቲሼ ቢያ ዎዴ ዩሱሲ ባ ሁዒን ሺቂዲ ኤንታራ ቤሰ። 16 ሃኖሺን፣ ኤንቲ ኢያ ኤሮና ሜላ ኤንታ አይፌይ ኦይኬቲሰ።

17 ኢ፣ «ሂንቲ ዎላ ኦጌ ቦላ ዳዒሼ ኦዴቲይሲ አይቤ?» ያጊሰ።

ኤንቲ አዛኒዲ ሲዒ ጊዲ ኤቂዶሶና። 18 ኤንታፌ ኢሶይ ቄሊዮጳ ጌቲቲይሲ፣ «ሃ ቃማታ ጊዶን ዩሩሳላሚን ሃኒዳባ ኤሮናይሲ፣ ኔ ቢታሰ ኢማሌዬ?» ያጊሰ።

19 ኢ ዛሪዲ፣ «ኢ ሃኒዳይሲ አይቤ?» ያጊዲ ኦይቺሰ።

ኤንቲ፣ «ዎሳ ሲንጻኒ ኣሳ ሲንጻን ኦሶኒኔ ኦዳን ሚኖ ናቤ ጊዲዳ ናዚሬቲ ዩሱሳባ። 20 ኢያ ካሂኔ ሃላቃቲኔ ኑና ሃሬይሳቲ ሃይቆ ፒርዳሰ አሌ ኢሚዲ፣ ካቂዶሶና። 21 ኮኒ ኢሰራዔሌ አሳ ዎዛንዴ ጊዲ ኡፋይቲዲ ናጊዳሺን ሃይሲ ሃኒን ሃቺ ሄዳንጻ ቃማ። 22 ቃሲ ኑ ጊዶፌ ኢሲ ኢሲ ማጫሳቲ ኑና ማላሊሲዶሶና። ኤንቲ ሃቺ ዎንታ ጉራ ዱፋዎ ቢዶሶና። 23 ኢያ አሃ ቆዩዳ ዎዴ ሲሚ ዩዲ፣ ሳኢ ገፃ ዳዔሰ) ያጊያ ኪታንቸቲ ቆንጪን ቤዒዳ ያጊዲ ኦዲዶሶና። 24 ኑ ጊዶፌካ ኢሶቲ ኢሶቲ ዱፋዎ ቢዲ ማጫሳቲ ኦዲዳይሳላ ሃኒን ቤዒዶሶና፣ ሺን ኢያ ቤዒቦኮና» ያጊሰ።

25 ኢ ኤንታኮ፣ «ሂንቲኖ፣ አኬኮና አሳው፣ ሂንቲ ዎዛናይ ናቤቲ ኦዲዳባ ኡባ አማናናው ጋምዔይሳቶ፣ 26 ኪሪሰቶሲ ሃ ሜቱዎ ኤካናወኔ ባ ቦንቹዎን ጌላናው ቤሴኔ?» ያጊሰ። 27 ሙሴፔኔ ናቤታ ኡባፌ ዳንዲዲ ጌሻ ማፃፋን ኢያባይ ፃፊቲዳይሳ ኡባ ኤንታው ቆንጪሲሰ።

28 ኤንቲ ቢያ ጉታኮ ማታቲዳ ዎዴ ዩሱሲ አጂዲ ሃሆ ሶ ቢያ ዳኒን፣ 29 ኤንቲ፣ «ሳባይ ቃሚዳ ጊሾ ኑራ አቃ» ያጊዲ ሚንሌዲ ዎሲዶሶና። ሄሳ ጊሾ፣ ኤንታራ አቃናው ጌሊሰ።

30 ኤንታራ ኢሲፌ ጋይታ ቦላ ኡቲዲ፣ ኡይሳ ዳንሌዲ፣ ሚንሌ አንጂዲ ኤንታው ኢሚሰ። 31 ሄ ዎዴ ኤንቲ ኤራና ሜላ ኤንታ አይፌይ ዶዩቲሰ። ኤንቲካ ኤሪዶሶና። ሺን ኢ ኤንታፌ ጌሚሰ። 32 ኤንቲ፣ «ኑ ኦጊያ ቦላ ዳዒሺን ኢ ኑሰ ጌሻ ማፃፋ ቢርሺሺኒኔ ኑና ሃሳዩሲሺን ኑ ዎዛናይ ፀጌቲቤኔ?» ያጊዶሶና። 33 ሄ ዎዴ

ዳንዲዲ ጉዬ ዩሩሳላሜ ዩደሶና። ታማኔ ኢሶቲኔ ሃራቲ ኢሲ ቦላ ሸቂዲ ዳዊሺን ዳሚደሶና። 34 ከንቲ፣ «ጎዳይ ቱማ ዳንዲሰ፤ ሲሞናስ ቆንጨሰ» ያገደሶና።

35 ሄ ናሞቡ ታማሬቲ ኤማሁሴ ኦጊያ ቦላ ዳዊሺን ሃኒዳይሳኔ ኡይላ ማንሱዳ ዎዴ ዋቲ ኢያ ኤሪዳኮ ከንታው ኦዲደሶና።

ዩሱሲ ባ ታማሬታስ ቆንጨሰ

(ማቶ 28:16-20፤ ማር 16:14-18፤ ዮሃ 20:19-23፤ ሃ.ኦ 1:6-8)

36 ናሞቡ ታማሬቲ ሃሳ ኦዳ ቦላ ዳዊሺን፣ ዩሱሲ ከንታ ገደን ኤቂዲ፣ «ሳሮይ ሂንቲው ገደ» ያገሰ።

37 ገደሺን፣ ከንቲ ዳጋሚዲ፣ ሞይቲሌ ቤዒዳ ዳኒን ያዩደሶና።

38 ኢ ከንታኮ፣ «ኣይሰ ባቢዳቲ? ኣይሰ ሲጴይ ሂንቲ ዎዛናን ጌሊዳ? 39 ታ ኩሺያኔ ታ ቶሁዋ ቤዒቲ፤ ታኒ ታና። ቃሲ ኦይኪዲ ቤዒቲ፤ ታናን ሂንቲ ቤዒይሳዳ፣ ሞይቲሌስ ኣሾይኔ ሜቄሲ ባዎ» ያገሰ።

40 ያገዲ፣ ባ ቶሁዋኔ ባ ኩሺያ ከንታ ቤሲሰ። 41 ከንቲ ኡፋይሳፌ ዳንደይሳን ኣማኖና ማላሌቲላን ዳዊሺን፣ ዩሱሲ ከንታኮ፣ «ሃይሳን ሂንቲው ሚያባይ ዳዊ?» ያገሰ።

42 ከንቲ ኢሲ ጫጩቲዳ ሞሎ ኢያው ኢሚደሶና። 43 ኢ ኤኪዲ ከንታ ሲጎላን ሚሰ።

44 ኢ፣ «ታ ሂንቲራ ጋሞዒዳ ዎዴ ኡባን ሙሴ ማፃፋታን፣ ናቤታ ማፃፋታኒኔ ማዘሙሬ ማፃፋታን፣ ታ ገሾ ፃፌቲዳባይ ኡባይ ፖሌታናው ቤሴሰ ያጋዳ ታ ሂንቲው ኦዲዳ ቃላይ ሃይሳ» ያገሰ።

45 ሄ ዎዴ ጌሻ ማፃፋታ ኣኬካና ሜላ ዎዛና ከንታ ደዩሰ።

46 ሃሳዳካ፣ «ከሪሰቶሲ ዋዬ ኤካና፣ ሃዡንሉ ቃማን ሃይቆፔ ዳንዳና ያገዲ ፃፌቲሰ። 47 ዩሩሳላሜ፣ ዳንዲዲ ኣሳ ኡባሰ ናጋራፔ ማርቲላይኔ ኣቶቲላይ ኢያ ሱጎላን ማርካታና። 48 ሂንቲ ሃሳሰ ማርካታ። 49 ሃኮ፣ ታካ ታ ኣዋይ ኢሚዳ ኡፋይሳ ሂንቲው ዩዳና። ሂንቲ ሳሎፔ ዎልቃ ማዳና ጋካናው ዩሩሳላሜ ካታማን ጋሞዒቲ» ያገሰ።

ዩሱሲ ዳንዲሰ

(ማር 16:19-20፤ ሃ.ኦ 1:9-11)

50 ሃሳፌ ጉዬ፣ ቢታኒያ ካታማ ከንታና ኤኪዲ ቢሰ። ባ ኩሺያ ዳንሱዲ ኣንጂሰ። 51 ከንታና ኣንጂሼ ከንታፌ ሻኬቲዲ ፑዴ ሳሎ ኤኬቲሰ። 52 ከንቲ ዘጊ ጎይኒዲ ዳር ኡፋይሳን ዩሩሳላሜ ሲሚደሶና። 53 ያሳ ኡባ ዎዴ ጋላቲሼ ያሳ ኬላን ጋሞዒደሶና።

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 21 Feb 2024 from source
files dated 29 Jan 2022
c35d6c73-3843-5482-b53e-7559d35deee5